

L'aranés e l'occitan general Quatre estudis

BIBLIOTECA TÈCNICA DE POLÍTICA LINGÜÍSTICA DOCUMENTS OCCITANS



L'aranés e l'occitan general Quatre estudis

BIBLIOTECA TÈCNICA DE POLÍTICA LINGÜÍSTICA DOCUMENTS OCCITANS

Obra sotmesa a una llicència Creative Commons d'ús obert, amb reconeixement d'autoria i sense obra derivada

Resum de la llicència: <http://creativecommons.org/licenses/by-nc-nd/2.5/es/deed.ca>

Llicència completa: <http://creativecommons.org/licenses/by/2.5/es/legalcode.ca>



© Generalitat de Catalunya | Departament de la Vicepresidència | Secretaria de Política Lingüística

Disseny de la col·lecció: Pepa Estrada

ISBN: 978-84-393-8245-4

Primera edició: maig de 2010

Presentacion

Er Estatut d'Autonomia hè oficiau era lengua occitana en Catalonha. Se concrète en Art 6.5.: *Era lengua occitana, nomenada aranés en Aran, ei era lengua pròpria d'aguest territòri e ei oficiau en Catalonha, cossent damb çò qu'establissem aguest Estatut e es leis de normalizacion lingüística.* Ua des responsabilitat qu'a d'assumir era institucion, ei a díder era Generalitat e eth Conselh Generau d'Aran, en procès de metuda era practica dera oficialitat dera lengua occitana, ei era sua referéncia lingüistica. Ua lengua a de besonh uns referents clars entà mostrar ua coeréncia normatiua.

S'era lengua ei ua, era occitana, ua a d'èster era nòrma de referéncia maugrat que pòden èster diuèrses es interpretacions e aplicacions.

Era aplicacion der Estatut hè de besonh era contínua relacion damb aguesta nòrma referent e damb era sua forma l'aplicacion. En cas der aranés aguesta nòrma occitana se concrète enes Nòrmes ortografiques der aranés que ja an mès de vint-e-cinc ans d'emplec sociau (escòla, administracion, ...).

Es elements fonamentaus d'aguesta nòrma referent son longaments acceptats en tot eth territori lingüistic, mès mos cau concretar e èster eth maxim de rigorosi, donques qu'era sua gestion non ei tostemp clara e evidenta. Sense aguest rigor es decisions non serien competentes e serioses. Ei plan per açò que, per manca d'ua autoritat normatiua de tot eth territori lingüistic, era Secretaria de Politica Lingüistica s'a dotat der assessorament d'un Grop de Lingüistica Occitana (GLO) format per setze personnes prestigioses en estudi dera lengua occitana, qu'amasse fòrça des sensibilitats existentes. Entre es compausants deth Grop i a tres membres der Institut d'Estudis Aranesi que garantissen eth respècte per aguesta varietat.

Mès, eth GLO non ei era autoritat, non cree nòrma, sonque l' administre e assessore ara SPL ena sua aplicacion. Trabalhe ena perspectiva dera unitat lingüistica, e eth respècte dera varietat aranesa, sense hèr nòrma.

Ath torn der ahèr *aranés-occitan* s'a produsit un debat, en fòrça escadences reiteratiu, sus er ensemblatge dera varietat aranesa e dera sua nòrma damb era varietat generau (hugim de denominacions coma *estandard* o *referenciaus* entà non entrar en competéncies pròpies dera autoritat lingüistica). Agesta varietat generau a estat denominada d'ues autes formes per diuèrsi autors: *occitan larg*, *occitan comun*, *neolan-guedocian*, *occitan ortopedic*, *occitan referenciau*,...

Eth trabalh que ven a contunhacion ei ua contribucion ad aguest debat. Es sòns autors son professionaus dera lengua, boni coneishedors dera varietat aranesa e dera varietat generau dera lengua occitana. Damb eri eth debat non s'acabe, ne s'inície, sonque se contunhe.

Toti eri arreceberen era encomana d'aportar reflexions ara *Distància entre er occitan generau e er occitan aranés*, e açò an hèt.

Voi destacar que cadun a escrit ena varietat dialectau que li a semblat mès adequada e donques eth document mos apòrte tanben ua imatge dera varietat deth debat e der entramat païsatge der occitan. Auem respectat era grafia de cadun d'eri pr'amor que partissen de postulats que toti compartim, maugrat que fin finau an estat interpretadi pes sòns autors. Aguest ei un debat que mos cau contunhar enes encastres professionaus e per qué non, tanben politics. Cadun des autors defen damb era practica es sues coeréncies e mos illustre bèth un des possibles camins que podem empréner.

Entà acabar, sonque è interès en deishar plan clar que dempús dera experiéncia e damb era aportacion de fòrça reflexions, entre es quaus aguestes quate, era forma d'escriuer aranés, segons es directritzes des *Nòrmes Ortografiques der aranés* e der Institut d'Estudis Aranesi, non entre en contradiccion damb era propòsta de nòrma generau der occitan. Dit d'ua auta manèra, as aranesi no les cau cambiar era forma qu'an utilizat enes darrers 30 ans. Quan escriuen en aranés, escriuen en occitan. Bères votzes escandaloses qu'an volut hèr a veir qu'ara calerie cambià'c tot non an cap arrason d'èster.

Ath delà, cau auer fòrça present, que d'aguest debat, e des accions que ne pogue generar, er aranés non ne gesserà transformat e desconeishut; ne gesserà reforçat. E açò, per un motiu basic: er aranés ei era arrason fonamentau entara declaracion dera oficialitat dera lengua occitana en Catalunya. Hèr-li'n pagar eth còst serie non solaments ua incoeréncia mès tanben ua imprudència e un acte suicidari.

Jusèp Loís Sans Sucasau

Director del "Programa per la creacion de l'Oficina Occitan en Catalunya"

Secretaria de Política Lingüística

Departament de la Vicepresidència

Sumari

| | |
|---|----------|
| Presentacion | 4 |
| Estudi 1 | |
| Distància lingüistica occitan-aranés/occitan-general | |
| Patrici Pojada | 7 |
| Estudi 2 | |
| Contribucion ara elaboracion d'un occitan comun: distància entre eth aranés escript e 'th lengadocian literari preconizat per L. Alibèrt | |
| Bernat Arrous | 31 |
| Estudi 3 | |
| Aranés de referéncia e occitan referenciau. Eth besonh d'un modèl sople | |
| Jordi Suïls | 71 |
| Estudi 4 | |
| Distància entre occitan aranés e occitan referencial o estandard | |
| Jacme Taupiac | 83 |

Estudi 1.

Distància lingüística occitan-aranés/occitan-general

Patrici Pojada

L'apartenéncia del territori aranés al domeni lingüistic occitan es pas de desmostrar. Un ramat d'estudis, ancians o mai recents, ja n'an parlat e, dempuèi "totjorn", la Val d'Aran es considerada coma una tèrra gascona¹, doncas una tèrra d'òc. Ara plan, çò que nos sembla una evidéncia lingüistica pòt trucar amb los sentiments dels locutors e - l'un e l'autre essent ligats - amb una subrevalorizacion de diferéncias idiomaticas tengudas coma pròprias e/o identitàries, sovent en rason de l'existéncia d'una frontera politica e de la rompedura de las vièlhas e estreitas relacions umanas. D'aquel fenomèn, la Val d'Aran n'es un exemple màger, d'ont mai que lo territori es petit (620 km²) e coneis un desenvolopament economic e una creissença demografica fòrts que ne capviran tota la vida relationala e las solidaritats ancianas. En mai d'aquò, la siá lengua - l'occitan aranés - es reconeguda coma una de las tres lengas oficiales de la Val - e la primièra lenga introdusida a l'escòla, per aprene a legir e escriure - e, a costat, l'occitan (sens autra precision: "Era lengua occitana, denominada aranés en Aran, ei era lengua pròpria d'aguest territori e ei oficiau en Catalonha [...]", article 6-5 de l'estatut d'autonomia de Catalonha, acceptat per referendum del 18 de junh de 2006) venguèt oficial dins Catalonha sencera en agost de 2006.

A partir d'aquí, una tension mai fòrta s'entrevei entre lo manten d'una forma locala de lengua (oficiala per solament 620 km² e unes 8 000 estatjants) e una forma generala de la meteissa lengua (un occitan "larg", "general", "estandard", "referencial", etc.), non reconeguda enlòc mas que poiriá concernir los 200 000 km² e los 15 000 000

¹ Per exemple: M. E. Belloc, « *Dialecte et toponymie du Val d'Aran et des pays voisins* ». Association française pour l'avancement des sciences, Toulouse, 1910, tome IV, pp. 41-55.

d'estatjants d'Occitània: tot d'un còp, l'escala càmbia. L'escomesa es que los aranèses se consideren pas mai coma un isclòt al mièg dels Pirenèus qu'auríá conservat una identitat pròpria contra los autres, mas coma una partida d'aquel ensemble lingüistic e cultural vast que donèt los Trobadors a l'Euròpa medievala e un Prèmi Nobel a la literatura mondiala (Frederic Mistral, 1904). Aquela tension que ne parlavi adès se pòt resumir per un questionament: quina forma d'occitan serà oficiala en Catalonha? La locala d'Aran o una mai "generala"? E dins la Val d'Aran ela meteissa, quin estatut auràn las differentas formas? Aquò a d'implicacions importantas ja que se paua lo problema de çò que la Generalitat, al moment de definir de prioritats de finançament, causirà de sosténer... La forma locala d'Aran pr'amor que la Val es en Catalonha e que, se l'occitan es oficial en Catalonha es per qu'es parlat en Aran? Una forma "generala" pr'amor que concernís mai de personas e un territòri mai bèl? Del meteis biais qu'es lo francés general qu'es oficial en Belgica o al Quebec e pas un "di-alècte" local o l'alemand en Soïssa (mas los parlars alemanics locals i son presents dins la vida publica e son vius). Las doas?... Concrètament, la question se paua a l'escasença de la realizacion d'un traductor occitan-catalan-occitan. Es vertat que la Generalitat acceptèt de ne finançar doas versions: una en occitan-aranés e una en occitan "general". Mas poiràn èsser doblas totas las autres publicacions? Sabèm que la situacion lingüistica, sociolingüistica e subretot socio-politica de l'occitan "obliga" los editors a preveire mantunas versions d'un meteis producte (cf. las revistas pels mainatges *Plumalhon* e *Papagai*, per exemple), al detriment d'una diversitat de produccions. Es una obligacion o respond a una idèa que nos fasèm de la lenga? Una idèa que nos fasèm de la lenga e que los lòcs ont es ensenhada (Calandretas, classas bilinguas de l'Educacion nacionala francesa) fan pas res per cambiar? I auriá pas, almens dins una cèrta mesura, la possibilitat de cercar - e de trobar - una distància mendre entre las causidas retengudas per tala o tala autre forma de lenga? Fonciona o fonciona pas, l'occitan, coma una lenga es a dire un sistèma que permet a totes los que l'emplegan de se comprene al delà de las diferéncias constitutivas de tota lenga?

Alavetz, lo cas aranés e del traductor catalan-occitan-catalan illustra la question e seriá interessant de l'estudiar. Dins un cas, avèm de nòrmas ortograficas mesas al punt i a unes 25 ans, per una comission d'expèrts que prengueron coma basa la grafia classica de l'occitan - dins un contèxt dificil e fòrça oposicions -, çò que permetèt d'ancorar l'aranés dins una istòria plan longa - qu'es tanben la siá, coma o veirem mai bas - e una practica d'ensenhament, de mèdias, de presència publica, d'oficialitat, etc., mai o mens plan establida. Dins un autre cas, avèm una comission d'expèrts venent de l'ensemble del territori occitan (ont l'occitan, çò mai sovent, a pas cap d'estatut legal e es pas reconegut oficialament) qu'ensajan de reténer las formas mai apropiadas per un traductor automatic. Se las concepcions lingüisticas e l'amira dels membres de la comission son, globalament, las meteissas (malgrat quelques divergèncias de vista...), demòra, pr'aquò, un risc d'alunhar (benlèu artificialament) la lenga introdusida dins lo traductor "occitan general" e la introdusida dins lo traductor "aranés". Per estudiar la question, me prepausi, per començar, de veire çò que n'es de l'aranés dins l'ensemble gascon, puèi en relacion amb aquel nomenat "occitan referencial" (dins lo sens de referé-

cia causida dins lo traductor). Me permeti tanben, per donar mai de prigondor a l'estudi e tanben per aver una vision amb mai de recul e d'elements, de far una incursion istorica e, doncas de capvirar l'estructura que nos èra prepausada. D'aquí, veirem quinas proposicions pòdon èsser faitas per evitar, dins cada costat, l'esclatament e lo bocinejament de la lenga. E tot aquò serà fait sens cap de pretencion exaustiva qu'es pas possible de far un inventari complèt de la situacion.

L'aranés: un parlar gascon

Lo gascon es l'ensemble, lo grop de parlars, lo dialècte, l'idiòma² mai especific e caracterizat de l'occitan, encara que presenta sus sos confins amb lo lengadocien parlars pro vesins del lengadocien. Lo gascon pòt pas èsser redusit a una sola forma, foguès la forma mai coneuguda (per exemple lo(s) gascon(s) de Bearn) qu'es sonque representativa d'ela meteissa e non del dialècte tot.

Lo gascon s'espandís sus quicòm coma 44 000 km² dins lo "triangle aquitan" definit per l'Ocean Atlantic a l'oèst, los Pirenèus al sud e Garona, de Bordèu a Tolosa, puèi per una linha anant de Tolosa als Pirenèus aproximativament.

Caracteristicas principales del gascon

L'aranés, per èsser gascon, a las caracteristicas generalas enonciadas dins aquesta part. Las caracteristicas seràn donadas segon lo lengadocien (tengut aicí coma "referéncia"):

A) Caracteristicas fonéticas

- F- se muda en H- (aspirada dins la màger part del domeni). Es una de las caracteristicas mai emblematicas del gascon e, per aquò, plan coneuguda e sovent escarnida.
- pèrda de -N- intervocalica (*per la hièstra deu graèr que podem véser la lua de gèr*);
- desenvolopament d'una A- prostetica davant R-: *l'arrat que minja l'arrassim que's nèga dens l'arriu*;
- tractament particular de la geminada -LL- intervocalica latina: -TH en finala, -R- en posicion intervocalica: *aqueth ausèth sus aquera branca qu'espia las bèras garias que devaran deu castèth*;
- vocalizacion de las otras -L en finala: *sau, ostau, mau, mèu, hiu* coma dins una brava part del domeni occitan (provençal tot, lengadocien oriental, màger (?)) part del nòrd-occitan);
- passatge dels grops -MB- e -ND- a -M- e -N-: *comba > coma, palomba > paloma, landa > lana*;

2

Es pas question de dintrar aicí dins la batèsta dels mots a l'entorn del gascon.

- conservacion dels grops latins GU- e QU-: *quate, guardar;*
- abotiment a -ÈR del latin -ARIU: *lo/eth pomèr deu/deth vaquèr qu'ei mei/mès gran que lo/eth perèr deu/deth bordèr;*
- -CT latin > -IT (trait aquitano-pirenenc mas tanben auvernhat e, mai esporadicament, vivaro-alpenc e nòrd-lemosin; aqueste trait concernís a quicòm prèp la mitat del domeni occitan e lo parteja amb lo catalan): *nueit, hèit;*
- reducccion a [ɛj], de còps [ɛ] del diftong -AI- (es un trait que despassa lo gascon per tocar lo lengadocian del sud): *qu'èi hèit un ahèr quan èi venut la lèit* (Aran: “È hèt un ahèr quan è venut era lèit”); comparar amb lengadocian oriental [basa de l’occitan del traductor occitan-catalan-occitan], per ex. (*ai fach un afar quand ai vendut lo lach*) e lo lengadocian foissenc (*è(i) feit un afèr quand è(i) vendut la lèit*)³;
- importància de las metatèsis: *cabra > craba; cambra > cramba; dormir > dromir; etc.* Aqueste fenomèn despassa lo gascon ja que tòca una brava part del lengadocian.
- frequenta reducccion dels grops BR, DR, TR en B, D, T: *que i a quate lèbes dens lo camp deu mèste. Nòste, aute...*

De còps, los traits se conjugan çò que dona al gascon una fisionomia particular. Ex.: *galina > garia* (-LL- > -R- + casuda de -N- intervocalica); *genièr > gèr;* etc.

B) Características sintaxicas e morfológicas

- usatge de las particulas ditas enonciativas: *que, be, ja, e. Uei, que hè calor. B'ac vòs? Ja i vau. J'ac sabi! E l'as entenut?* Lo *que*, tant emblematic, s'utiliza pas pertot, pr'aquò.
- flexions verbals plan específicas pels imperfaits de l'indicatiu dels verbs en -IR e -ER (dromiva; arridè/arridèva), preterits (cantè/cantà -rar-, dromí, batò; condicional (cantaré, dromiré, bateré), imperfect del subjontiu (dromisse, dromiscó/-oc). Notem que la morfologia verbal es plan cambiadissa dins lo domeni gascon (veire M. Grosclaude e G. Nariòo, *Repertoire des conjugaisons occitanes de Gascogne*, Pau, Per Noste/La Civada, 1998, 159 p.). **Cal insistir, sul pic, qu'aquesta caracteristica importanta del gascon concernís pas la zòna pirenenca orientala del gascon, doncas concernís pas l'aranés que se compòrta, dins la conjugason, coma l'occitan general.**

C) Lo lexic

Lo lexic gascon es a pus près lo meteis que lo de la rèsta de l'occitan mas trobam vocables que venon segurament d'un vièlh fons aquitano-pirenenc; es mai que mai dins los Pirenèus qu'aqueste còrpus apareis. Ex.: *avajon, jordon, lagast...* Una part d'aqueles tèrmes se limita pas al gascon ja que se retròba en

3

Lengadocian tolosan, carcassonés, narbonés: “èi fait un afar quand èi vendut la lait”.


lengadocian pirenenc, en catalan, en aragonés.

Tanben senhalem quelques mots particulars coma dia (per jorn dins lo demai de l'occitan) mas es pas tanpauc general en gascon ja que concernís sonque la part sud (de Bearn a Coserans, benlèu pas qu'un quart de l'airal gascon). Entre lexic e morfologia, la preposicion entà (e varianta) es tanben caracteristica mas tota una part nòrd del domeni la coneis pas.

La division intèrna del gascon

Coma o ditz justament, me sembla, J. Ronjat (*Grammaire istorique des parlers provençaux modernes*), es malaisit de divisir lo gascon en grops de parlars (coma o faguèt per exemple L. Alibèrt pel lengadocian⁴), pr'aquò Ronjat balha una division. La mapa publicada per G. Rohlf en annèx de son estudi sul gascon, permet, en trasent las isoglòssas lexicalas de pauc d'interès per nòstre prepaus, de destriar quatre types de parlars:

- 1- los del nòrd (Medòc-Girona) que son dessaparats del demai del gascon par quatre isoglòssas;
- 2- los garoneses;
- 3- los pirenencs;
- 4- los centrals.



⁴ Remarquem que L. Alibèrt divisís lo lengadocian en parlars (tolosan, central, carcinòl, albigés, etc.) mas ne dona pas jamai de limits (çò que se comprend en rason de las dificultats!) e las denominacions que dona son, sovent, istoricas e/o geograficas (per exemple, parla de "carcinòl" mas a l'estudi se vei plan que i a pas cap de parlar "carcinòl" mas unes parlars occitans parlats dins una entitat istorica sonada "Carcin"; i a un parlar "roergat"? E lo foissenc?).

⁵ Mapa publicada en annèx de G. Rohlf, *Le gascon. Études de philologie pyrénéenne*, Tübingen, Max Niemeyer Verlag, 1970.


S'aquesta division me sembla pas falsa, me pareis pro incomplèta. A partir de diferents critèris, ai ensajat de far una sintèsi rapida e, segurament, superficiala, de la division del gascon; i apareisson 5 a 8 grops:

- lo del nòrd;
- landés nòrd e centre;
- landés sud en relacion amb lo seguent;
- bearno-bigordan amb lo Gèrs del sud;
- pirenenc oriental (qu'es lo que paua mens de problema, plan estudiat per P. Bèc dins *Les interférences linguistiques...*);
- lo gascon central-oriental amb un jos-grop garonés.

Se comparan aquesta mapa amb ciò que ditz J. Ronjat, vesèm que n'es pas plan alunhada. A partir de tot aquò, podèm prepausar la division seguenta, en 5 grands gropes de parlars gascons, que ne prepausi çai-jos una ulhada rapida e incomplèta e que permetrà de melhor situar l'aranés:

1) lo nòrd medoquin e girondin (fins a Arcaishon aproximativament)

- -ARIU, -A > -ÈIR, -ÈIRA (*prumeir, prumèira*);
- focus > huc; folia > fulha; oculus > ulh; noctis > nuit; longe > lunh (lo demai de l'occitan, levat lo montpelherenc a -UÈ-);
- -N- intervocalica demòra: una luna;
- -ND- demòra;
- pas de A- prostetica davant R-: rat, riu;
- enclisi e assillabisme dels pronoms rars;
- infix incoatiu -ISS- (present de l'ind. e del subj.); segon los parlars las doas primièras personas del present de l'indicatiu an o pas l'infix incoatiu (ex.: bas-tissem, bastissetz / bastim, bastitz);
- articles contractats particulars: de + lo => dau (gascon general *deu*); de + los => das; per + lo => prau;
- preterits:



| -AR | -IR incoatiu e non incoatiu | -ER |
|------------|------------------------------------|----------------------|
| -èri | -iri | -uri (-oi a Vasats) |
| -èt | -it | -ut (-ot a Vasats) |
| -èren | -iren | -uren (-ón a Vasats) |

2) lo lanusquet e lo gascon de Baiona:

- present del subjontiu en -I (que cau que cantis);
- infix incoatiu en -ISS- (-ISH- a Baiona);
- pas d'infix incoatiu a las doas primièras personas del plural del present de l'indicatiu (bastim, bastitz);
- imperfaits de l'indicatiu dels verbs en -AR en -ÈVA (cantèva) mas pas a Baio-

na⁶; per contra, lo fenomèn se tròba a Arcaishon e en Labrit (Albret, a l'entorn de Nerac);

- realizacion en [œ] dels -e- e de -a- de l'article definit femenin (parlar néguer): las Lanas [lœs 'lançes];
- -ARIU, -A > -ÈIR, -ÈIRA;
- a Baiona: luna > lua > ['liβœ]; una > ua > ['iβœ];
- preterits:

| -AR | | -IR incoatiu e non incoatiu | -IR incoatiu | -ER | |
|------------|-------------|--|---------------------|------------|--------|
| Lanas | Baiona | Lanas | Baiona | Lanas | Baiona |
| -èri | -èri / oi? | -iri | -ishoi | -ori | -oi |
| -èt | -à / ó? | -it | -ishó | -ot | -ó |
| -èren | -èren / ón? | -iren | -ishón | -oren | -ón |

3) lo bearnés e lo bigordan: es lo tipe segurament mai illustrat per la literatura, sovent considerat coma lo gascon classic çò qu'a pas de fondament lingüistic:

- -N finala muda;
- infix incoatiu -EISH (al present de l'indicatiu; -ESC- al present del subjontiu), absent a las doas primièras personas del plural del present de l'indicatiu (bastim, bastitz);
- subjontiu en -I dins la partida occidental;
- pronomes enclitics e assillabics;
- los parlars de la montanha (levat la Val d'Ossau) an los articles pirenencs (eth, eths, era, eras);
- preterits:

| -AR | -IR incoatiu e non incoatiu | -ER |
|-----------------|------------------------------------|------------|
| -èi | -ii | -oi |
| -è / à (oèst) | -í | -ó |
| -èn / àn (oèst) | -ín | -ón |

4) gascon central:

- enclisis e assillabisme dels pronomes rars;
- infix incoatiu -ISS- al present e a l'imperfait de l'indicatiu, -ISC- al preterit, al present e a l'imperfait del subjontiu;
- infix incoatiu utilizat a las primièra e segonda personas del plural, coma en occitan general (bastissem, bastissetz; bastissèvam);
- plurals sensibles pels mots acabats per -S, al nord e a l'est;

6 Sembla que lo preterit siá pauc (o pas) utilizat a Baiona ; las formas son de mal trobar.

- preterits:

| -AR | -IR incoatiu e non incoatiu | -ER |
|------------|------------------------------------|------------|
| -èi | -iscoi | -oi |
| -èc | -sicoc | -oc |
| -èn | -iscón | -ón |

La partida èst (garonenca, a l'est d'Aush) es fòrça interferenciala amb lo lengadocien (cf. mapa de G. Rohlfs): pas de -A prostetica davant R-, pas de *que* enonciatiu, encara mai a l'est -N- intervocalica mantenguda, dins una febla benda nòrd-èst mantien del grop -ND-.

5) gascon pirenenc oriental: Comenge (amb Luishonés), Val d'Aran, Coserans. Sa caracteristica principala es sa morfologia verbala qu'es diferente del demai del gascon mas qu'es la meteissa que la rèsta de l'occitan: indicatiu imperfect del tip *aviá*, preterit del tip *cantèc-cantèren*, condicional del tipe *cantariá*, subjontiu imperfect del tip *cantèsse*:

- enclisi e assillabisme dels pronoms;
- articles pirenencs (levat suls marges del nòrd e de l'est ont los parlars son fòrça vesins del lengadocien);
- -N final demòra dins la partida oèst (Comenge, baish e mièg Aran);
- infix incoatiu -ISS- en Comenge e Val d'Aran, -ISH- en Coserans, -EISH- en luishonés;
- plurals sensibles en -i/-is pels adjectius e pels substantius (òssi/òssis; polidi/polidis);
- preterits:

| -AR | IR incoatiu e non incoatiu | -ER |
|------------|-----------------------------------|------------|
| -è / -èri | -í / -iri | -í / -eri |
| -èc | -ic | -ec |
| -èren | -iren | -eren |

III- Lo gascon aranés

Qualques caracteristicas mai sens cap de pretencion a l'exaustivitat. Per mai d'entre-senhias se consultaràn, en particular, los trabalhs de Joan Coromines, *El parlar de la Vall d'Aran. Gramàtica, diccionari i estudis lexicals sobre el gascó*, Barcelona, Curial, 1990, 773 p. e Aitor Carrera, *Gramatica aranesa*, Lhèida, Pagès editors, 2007, 287 p.

A) Fonetica

- A finala atòna mai o mens conservada mas passada a [es] al plural, a la 2^a persona dels verbs; [en] a la 3^a persona del plural dels verbs mentre que la 3^a pers. del sing. dels verbs en -AR fa [e] (canti, cantes, cante, cantam, cantatz, canten); se restaca a la morfologia. La caracteristica es pas pròpiament aranesa que concernís (al mens per -A atòna > -ES) d'altres parlars pirenencs, gascons coma lengadocians, e mai luènh alpencs...
- -v- intervocalica prononciada [w] mas pas dins lo naut Aran; una brava part del gascon fa çò meteis.
- -N finala prononciada (levat dins lo naut Aran) mas pas al plural: *gascon* [gas'kun] → *gascons* [gas'kus], en acòrdi amb lo demai del gascon que pronòncia la -N finala;
- pas d'aspiracion de H (levat a Canejan e Bausen); aquesta non aspiracion pòt aver de consequéncias en fasant desaparéisser l'element consonantic inicial e en permetent d'elisions que se poirián pas produsir dins lo demai del domeni gascon ni mai occitan (coma, per ex., *eth mes d'hereuèr* per *eth mes de heurèr/lo mes de febrièr*)
- podèm notar tanben la prononciacion [ɔ] dins *pònt*, *hònt*, *nòm* quand l'occitan generala a *pont*, *font*, *nom* amb [u].
- la tendéncia aranesa es d'utilizar, coma lo catalan e l'españòl (mas tanben l'italian e lo portugués) de mots proparoxitons (*política*, *música...*) inconeguts del demai de l'occitan (a l'excepcion de la franja niçarda e cisalpina).

D'un biais general, la fonetica e la fonetica sintaxica de l'aranés es la meteissa que la de l'occitan aquitano-pirenenc definit per P. Bèc dins *La langue occitane e Manuel pratique d'occitan moderne*, en particular per tot çò que tòca a las assimilacions consonanticas que funcionan exactament coma çò que trobam dins los parlars gascons e lengadocians. Sus aquel punt, l'unitat es prigonda.

B) Morfosintaxi (qualques aspectes, a bèl talh, que pòdi pas far una descripcion completa de la gramatica aranesa)

a/ los articles:

En Aran, s'utilizan los articles pirenencs: *eth* (er davant vocala) e *era*. Una caracteristica, comuna amb lo luishonés es l'existéncia d'una forma epicèna al plural: *eth* e *era* fan *es* (*eth papèr* e *era taula* → *es papèrs* e *es taules*);

En acòrdi amb lo gascon e tanben lo lengadocian foissenc (coma en catalan e espanyòl), i a pas de partitiu mentre que s'utiliza *de* en occitan general.

2/ los pronoms:

- enclisi dels pronoms personals a l'infinitiu (*passejà-se*) e amb lo participi present (*escridassant-la*);
- pronom datiu *le* (Baish Aran); utilizacion tanben de *au* (forma de Canejan) e *li* dins la rèsta de la val;

3/ los plurals:

- plurals sensibles pels noms e pels adjectius masculins en -i: *gròssi tavassi*; los plurals en -i e subretot en -is son coneguts dins un airal pro vast gascono-lengadocien meridional mas en general son reservats als adjectius (per ex., en lengadocien foissenc, se ditz: *son polits/polidis aquelis gròssis passes* ont l'occitan “general” diria: *son polits aqueles gròsses passes*; aranés: *son polits/polidi aqueri gròssi passi*).

4/ los possessius: aquí la tièra dels possessius singulars arano-comengeses:

- masculin: eth mèn, eth tòn, eth sòn, eth nòste, eth vòste, eth lor [lu] (Comenge)/eth sòn (Aran);
- femenin: era mia, era tia (Com.)/era tua (Ar.), era sia (Com.)/era sua (Ar.), era nòsta, era vòsta, era lor [lu] (Com.)/era sua (Ar.);

5/ la negacion:

La forma mai correnta es *non* coma encara se tròba dins unes parlars occitans, en particular pirenencs (mas pas solament): *non canti*. La particula de reforçament es mai que mai *cap* coma dins tot lo comenjo-coseranés mas tanben lo catalan de Ribagorça e Palhars: *non canti cap. Pas* (pan-occitan) se pòt tanben utilizar (*non canti pas*). Tanben, coma es general dins tot lo domeni occitan, la negacion pòt èsser redusida a *pas* (e *cap* en Aran, tanben) pòstverbal: *canti pas/canti cap.* Atal, l'utilizacion de *canti pas, sap pas*, etc., es identica en occitan comun.

6/ pas de que enociatiu dins la màger part dels cases coma en occitan general mas al contrari de çò que se passa dins una granda part del gascon;

7/ verb e morfologia verbala: una de las caracteristicas de l'occitan parlat en Val d'Aran, coma dins tot Comenge e Coserans, es que sa morfologia verbala (al delà de quelques caracteristicas localas) es la del demai de l'occitan e non pas del gascon⁷. Doncas, se i a de diferéncias amb l'occitan “referencial” son plan mendres que las de parlars gascons de Bearn, per exemple. Per la descripcion precisa de la conjugason, remandam als trabalhs de J. Coromines e A. Carrera, citats, e a V. Barès e autres autors, *Es verbs conjugadi. Morfologia verbau aranesa*, Barcelona, Llibres de l'Índex, 2003. Contentem-nos de quelques remarques.

- quelques infinitius especifics: *creir* (gascon *créser~créder*), *veir* (gascon *véser~véder*) coma *quèir* (*càser~càder*), *plòir* (gascon *plàver*), *mòir* (gascon *màver*),etc.;
- primièra pers. del futur en -è (cantarè), restacant l'aranés a un domeni mai vast, e mai lengadocien del sud;

⁷ Ça que la, dins lo naut Aran, i a (en contacte amb lo catalan nòrd-occidental) de formes que revèrtan las dels gascon (ex. *bateva*).

- preterits en -èc (vèrbs en -AR); -ec pels autres vèrbs (diguec). Se daissam de caire l'oposicion -èc/-ec (vèrbs en -AR/autres vèrbs), los preterits en -èc concernisson tanben una granda part del lengadocian e lo fenomèn se tròba tanben dins los Alps.

- del meteis biais, subjontiu imperfect en - èsse (cantèsse) e -esse (volesse);
 - quelques aspectes de la morfologia verbala: imp. ind. de *hèr*: hègen; imp. ind. de *díder* (3^a pers. del sing.): diguie (notar l'oposicion entre la 1^a pers. –cantava- e la 3^a –cantave-); èster: sò (1^e pers. ind. pres.), sigue (3^a pers. subj. pres.); veir -> veigui (1^a pers. ind. pres.); morisqui: 1^a pers. pres. ind. dels vèrbs an -IR non incoatius (bastir: bastisqui, bastisses, bastís, bastim, bastitz, bastissen);
 - lo punt mai problematic es, cresí, l'utilizacion gaireben sistematica de l'auxiliar AVER e mai amb ÈSTER, contra çò que fa una caracteristica de l'occitan dins son ensemble (*a estat* ≠ occitan: *es estat*). Seria interessant de saber s'aquò's un usatge recent o se i a una realitat istorica autra que l'influéncia de las lengas dominantas vesinas⁸.

A talh d'exemple, comparem un vèrb dels mai irregulars coma creir al present de l'indicatiu, e al preterit. I veirem, al delà de las especificitats aranesas, la semblanças prigondas amb l'occitan general.

1/ present de l'indicatiu

| gascon comun | occitan d'Aran | occitan coserano-comengés | occitan general |
|--------------------|-------------------|---------------------------|--------------------|
| inf. créder~créser | inf. creir | inf. créder | inf. creire~créser |
| credi | creigui | credi | cresi |
| credes | cres | credes | creses |
| cred | cre | cretz | crei/cretz |
| credem | credem/creiguem | credem | cresèm |
| credetz | credetz/creiguetz | credetz | cresètz |
| creden | cren | creden | creson (cresen) |

⁸ Se sap que ésser *estat* èra la forma generala dins lo catalan escrit encara el siècle XVII.

2/ preterit de l'indicatiu⁹

| gascon comun | occitan d'Aran | occitan coserano-comengés | occitan general |
|--------------------|------------------------------|---------------------------|--------------------|
| inf. créder-créser | inf. creir | inf. créder | inf. creire~créser |
| credoi | credí/creiguí | credí | creguèri |
| credós | credís/creiguís ² | crederes | creguères |
| credó | credec/creiguec | credec | creguèt |
| credom | credérem/creiguérem | credérem | creguèrem |
| credotz | credéretz/creiguéretz | credéretz | creguèretz |
| credón | crederen/creigueren | crederen | creguèron |

C) Lexic

Un fum de çò que poiràn pensar èsser de “particularitats” lexicalas dels parlars de la Val d’Aran es comun amb los parlars vesins de Comenge e Coserans (cf., per exemple, *shinhau*), de còps amb los parlars catalans de Ribagorça e Palhars. Tot aquò forma lo fons autoctòn de la lenga. Mas çò que mai es de notar, son las interferéncias mai recentas amb las lengas dominantas. A costat de manlèus mai o mens ancians que rapròchan l’aranés dels parlars occitans de l’estat francés (*creion* per exemple) o mai estranhs (*chapèu*), o que l’aluènhan (ex.: *creu, veu, pare, mare*), las causidas generalas actualas semblan èsser las “ibericas” que sián los *bueno, però, puesto, quedar, amo*, etc. e, sovent, tot çò que concernís l’administracion, la vida politica, etc. L’efièit de frontera es fòrt e pòt èsser mes en parallèl amb çò que se passa en Catalonha del Nòrd. Prengam un exemple significatiu:

| | | |
|-----------------------|---------------------|-----------|
| estat francés | francés | voiture |
| | catalan (Rosselhon) | [bu'tur] |
| | occitan | [bwe'tyo] |
| estat espanyòl | espanhòl | coche |
| | catalan | cotxe |
| | occitan (Aran) | coche |

D) Quant a las diferéncias ortograficas, son minimas estant que las nòrmas ortograficas de l’aranés de 1982 seguisson las de l’Institut d’Recèrcas Occitans. Malgrat aquò, qualques concessions foguèron faitas a unes “localismes” benlèu considerats coma emblematics mas que, en realitat, se tròban endacòm mai en gascon o en occitan pirenenc. Una, la prononciacion [w] de la V intervocalica, es pro correnta en gascon, mas i es pas generala e, çò mai sovent apareis pas dins la grafia del gascon.

⁹ Naut Aran: creigueres/crederes.

Atal, los parlars que dison [a'we] per AVER escrivon generalament "aver" coma los que dison [a'βe] encara que qualques-unes sián partidaris de servar dins la grafia de la lenga las particularitats localas.

La segonda concession me sembla mai importanta ja que, es vertat, es una particularitat grafica que tradusís una particularitat morfologica. Vòli parlar dels plurals en -ES dels mots acabats per -A atòna (ex.: *aranesa* → *araneses*) mas tanben de las -ES de la segonda persona del singular e -EN de la tresena persona del plural dels verbs (ex.: *cantes*; *canten*) e, encara mai, de la tresena persona del singular dels verbs en -AR al present de l'indicatiu, a l'imperfait de l'indicatiu (tanben per èster e aver), dels autres verbs al subjontiu present, de totes los verbs al condicional (ex.: *cante*; *cantaue*; *ère*; *auie*; *bate*; *aparesque*; *cantarie*; *serie*; *condusirie*), fenomèn partejat amb l'occitan-gascon-luishonés e lo catalan nòrd-occidental. Soi plan conscient que l'adopcion de las formas occitanas generalas desestructurariá la morfologia verbala en fasent desaparéisser l'oposicion entre 1^{era} e 3^{ena} persona del singular, coma dins CANTAU (=ieu) ≠ CANTAUE (el, ela). Mas escriure CANTAVA allòc de CANTAUE fariá, fin finala, dintrar l'aranés dins l'occitan classic encara mai quand se sap que, coma lo catalan, l'espanhòl e lo portugués, de parlars occitans vesins (gascon de Coserans, gascon d'una part de Comenge, lengadocian foissenc pirenenc...), an encara uèi la meteissa forma a la 1^{era} e la 3^{ena} persona del singular (ex.: *cantava*; *èra*; *aviá*; etc.), quand la tendéncia generala dins l'ensemble occitan es de distinguir la 1^{era} e la 3^{ena} persona del singular amb una desinéncia diferente (generalizacion a la 1^{era} persona del singular de la desinéncia de 1^{era} persona del present de l'indicatiu → *parlavi-parlave-parlavo*, *èri-ère-èro*; o desinéncia ajustada → *parlàvai*; *èrai*; *àjai*). Me sembla pas impensable qu'un "estandard supradialectal" comenjo-coseranés, incluent l'aranés, adoptès un tal sistèma... Per ne tornar al plural dels substantius, se lo sistèma aranés es coerent per l'aranés e los parlars que fan lo plural de -A en -ES, mena a de confusions dins la pan-occitanitat ja que se *araneses* es un femenin plural en Aran (*aranesi* ≠ *araneses*), es un masculin plural dins l'occitan general (*araneses* ≠ *aranesas*).

L'occitan en Aran: una cabussada dins l'istoria

Me sembla pas que nos poscam acontentar d'una descripcion en sincronia de l'aranés: lo cal observar en diacronia, almens amb los elements que son, ara per ara, a la nostra disposicion. Per ieu, una tala vision istorica ajuda a definir la plaça de l'aranés: es la rason per que la prepausi aici e mai siá pas estada formulada dins la comanda d'aqueste travalh. Aquesta partida a per tòca de donar d'elements sus la realitat lingüistica de la Val d'Aran als sègles XVI e XVII ja que, coma veni d'o dire, una vision istorica - que sabèm dificila - pòt portar d'elements interessants al debat sul ligam entre aranés e occitan. La Val d'Aran se tròba al punt de contacte de l'occitan amb lo catalan, doas lengas qu'an coneigut, a de grases divèrses, la substucion d'una lenga per una autre. D'autra part, l'epòca modèrna es marcada per las

decadéncias literàries occitana e catalanas. Es dins aqueste contèxt que cal situar la question lingüística aranesa.

Dins l'estat actual de las recèrcas i a pas gaire de testimoniatges lingüístics; pel sègle XVI, i a qualques fragments de deliberacions e de comptes municipals de Bausen (1523)¹⁰ e Vielha (1562-1565)¹¹. Pas nombroses, mas d'un interès grand e concordant. Lo problema principal que pausan aqueles tèxtes, a condicion qu'i volgam veire un problema, es lo de la lenga de lor redaccion. Per l'editor dels comptes de Vielha, la resposta es pro clara per qu'escriga : « Aguesti compdes son escrits [...] en catalan tamb paraules araneses intercalades »¹². E, pr'aquò, tanlèu legir las primières linhas, es pas la catalanitat del tèxt que suspren (ja que pensàvem de legir un tèxt en catalan...) mas la siá occitanitat. Disi pas “aranesitat” mas plan “occitanitat” que, per ieu, aquel tèxt es plan escrit en occitan - sovent dins una mena de koinè, tan-plan - amb unes elements locals, de còp en còp, e unas traças de catalan redusidas a quelques ocurréncias coma *rebut* (rebut); de tant que, a la lectura, son paucas las formes qu'apareisson coma vertadièrament catalanas. Se volèm donar una vision estatistica simpla d'aqueles tèxtes, aquí çò que podèm dire:

Elements lingüistics contenguts dins dos tèxtes de produccion aranesa del sègle XVI

| | occitan | catalan | comun occitan e catalan | espanhòl | francés |
|-------------------------------------|---------|---------|-------------------------------|----------|---------|
| Bausen (1523) | 18 % | 4 % | 78 % | 0 % | 0 % |
| Comptes de Vielha (1562-1563) | 21 % | 2 % | 77 % | 0 % | 0 % |

Per ieu, los resultats son sens ambiguïtat: son de tèxtes escrits en occitan. Plan segur, nos podèm enganar que mai de tres formes sus quatre que contenon son comunas a l'occitan e al catalan, es a dire son lo rebat de çò que son, en realitat, aqueles dos idiòmas. Aquela proporcion d'elements comuns “occitano-catalans” es comparabla a la qu'obtenèm dins los tèxtes catalans del sègle XVI, quitament del sègle XVII. Dit d'un autre biais, los comptes de Vielha contenon 98% d'elements occitans! Aqueste taus es de relativizar immediatament que, se nos plaçam del costat del catalan, caldriá dire que son catalans a 79%. Aqueles tèxtes son incontestablement occitans amb un pecic de catalan. Perqué, alavetz, aquela preséncia de catalan, per tant infima que siá? O sauriam pas dire a part d'evocar la pression de la cancelariá catalana? Podèm pas far, aicí, un inventari exaustiu de tot çò que nos fa dire qu'avèm pas un tèxt catalan amb una color aranesa mas plan un tèxt occitan; retengam-ne quelques-unes dels elements.

10 Bausen, un lòc ena frontèra, Vielha, Conselh Generau d'Aran, 1999, p. 25.

11 M. Calzado de Castro, *Es compdes de Vielha*, Conselh Generau d'Aran, 2000, pp. 43-90.

12 M. Calzado de Castro, op. cit., p. 14.

La morfologia verbala es, sens problème, occitana se gaitam las solas e nombrosas formes de preterit presentas : *portec, aguec, prenguec, fec, menec*, etc.; *conbyderem, porterem*, etc.; *aneren, doneren*, etc. Ajustem-i lo sol imperfait del subjontiu que se tròba dins los comptes de Vielha (*entresen*), el tanben occitan (en grafia modernizada: *entrèssen*). Autre trait sistematic e abondós es l'emplec de l'adjectiu *mièi~mièg* jos di-versas grafias (*myey, miey, miei, myec, miets*) que pòt pas far enganar; tanplan, trobam un femenin (*miega* per *mièja*). Tanben, la numeracion es tipicament occitana, quita-ment gascona quand se tracha de *dus, qoate~coate* (*quate*), *sies, goeyt~gueit* ((*g*)*ueit*), *nau, dets* (*dètz*) o encara *desanau, vint e dus*.

La conjoncion de coordinacion “e” apareis gaireben totjorn jos la forma *e*, excepcionalament jos *y*; se l'emplec de la conjoncion “e” es pas un argument per provar l'occitanitat del tèxt ja que los tèxtes catalans de la meteissa epòca contunha de l'emplegar tanben, es pas tanpauc un argument per la catalanitat... La preposicion correspondent a “amb” presenta un polimorfisme remaricable que va dins lo sens de çò que disèm. D'efièit, a costat d'un *ab* (forma medievala occitana e catalana, encara en vigor dins la *scripta catalana* de l'epòca modèrna, e encara viva en occitan actual a travèrs lo gascon *dab*, lo *cisalpin abo*, lo *dalfinés abe*), avèm d'atestacions mai nombrosas de *dam* (*damb*), encara viu a l'ora d'ara en Aran (en *companhia de tamb*) e dins d'autras regions de la Gasconha garonenca e orientala, e de *dap* (*dab*), uèi inconegut en Aran (exceptat a Canejan segon Joan Coromines) mas que senhoreja tanlèu passada la termièra politica, en Luishonés per exemple, e una brava part del gascon. Michel Grosclaude escrivíá que “le mot *dab* semble rarissime jusqu'à la seconde moitié du XVI^e siècle. On rencontre *dam* en 1565 dans la traduction des Psaumes de Pèir de Garros (il est de Lectoure) et en 1578 dans le Dialogue des trois Nymphes de Salluste du Bartas (il est d'Auch)” e ajustava que dins la revirada dels *Psaumes d'Arnaud de Saleta* (1583), es *ab* qu'es encara majoritari, malgrat unes *dab*. Atal, segon aqueste autor, *dab* se generalizariá pas qu'a la fin del sègle XVII dins la produccion literària bearnesa, la *scripta administrativa* conservant gaireben exclusivament lo *ab* fins a la Revolucion francesa (1789)¹³. En nos basant sus aquelas remarcas, vesèm plan, cresí, que la lenga escrita en Aran al sègle XVI se plaça plenament dins lo context mai larg de la *scripta occitana* del sieu temps, que ne participa, encara que siá tanben tirada per las costumas graficas catalanas coma la que consistís a utilizar lo digraf *ny* per transcriure la *n* palatala [ɲ], escrita *nh* en occitan (utilizacion tanben d'un *ly* per *lh*).

Demest los indicis d'occitanitat dels comptes de Vielha de 1562-1563, tanben i a la reduccio del grop -NS final en -S, del tipe *man* → *mans* [mas]; trobam tanben dins lo tèxt *dilus* (*diluns* [di'lys]), forma occitana generala e non pas lo *dilluns* catalan, ni mai l'actual *deluns*, resultat d'una dissimilacion, coneget tanben en defòra de la Val), *pas* (*pans*), *floris* (*florins*), *arosys* (*arrossins*), *tanborys* (*tamborins*) e unes ocurréncias de *caperas* (*caperans*) que, al trait que ne parlam ara (-ANS > [as]), ajusta lo tractament tipicament gascon de la geminada intervocalica latina -LL- < -R-. Me permeti de m'arrestar un moment sus *caperan* per que me sembla important e ensenharèl. Sa-

¹³ M. Grosclaude, *La langue béarnaise et son histoire. Étude sur l'évolution de l'occitan du Béarn*, Per Noste, v. 1992, pp. 70-71.

bèm que a l'ora d'ara es la forma *capelhan* que s'utiliza en Aran e apareis plan coma un manlèu al catalan e la forma vertadièrament autoctòna *caperan* èra en usatge dins l'Aran del segle XVI, almens a l'escrit. Es probable qu'èra *caperan* que se disia tanben coma caldriá dire encara uèi.

Lo -NS- intervocalic passa tanben, normalament, a -SS- de tal biais que trobam cossell (*conselh*) e de nombroses cossos o cosos¹⁴ (*cònsols*) que sián *biels/byeylls/viells/vyeylls* (= *vielhs*) o *nabets* (*navèths*), en occitan. Dins lo vocabulari, notem tanben la freqüència d'entà (qu'existís, vertat es, en catalan de Ribagorça), las formas - soletas - condes (*compdes*) o *glèisa, aute e auta*¹⁵ e, mai discrètament, los *nosauti/nosauty/nosautis*¹⁶ que nos pòdon pas enganar. De biais isolat, avèm *cauque* (*quauque*), *goele* ((*g)oelhèr*), *goart* ((*g)uart*), *goe* ((*g)ué~aué*), *praubes*, *gese* (*gésser*), *Santa*¹⁷ *Crotz de may*, *vey* (*veir*), *dimergles*, *prets* (*prètz*), etc. Es interessant, cresí, de far remarcar - après *caperan* - la preséncia de *crotz*, uèi substituïda pel catalanisme *creu*; gràcies a aquel tèxt del mièg del segle XVI, avèm una pròva de la siá existència en Aran. La preséncia del mot *feyra* es tanben interessanta. Aprofeitem l'escasença per senhalar, a costat de *feyra*, los mots *faure* e *foec* (*huec*), amb conservacion grafica de la F- iniciala coma o fasiá tanben la tradicion grafica bearnesa de la meteissa epòca.

En fonetica, la grafia indica sovent la prononciacion [sɔs] per sòus; la vocalizacion de la -L finala es pas brica rara (*metau, quintau, sensau* – *censau* –, *espitau, nadau*); quelques metatèsis apareisson (*cranva* – *cramba* –, a costat de *canbra* ; *cronpat* e *crompat* a costat d'un *comprat*). Una frasa coma « *a fornit a lo priu de Mig Aran* » indicariá la prononciacion [pri'u], per prior, a l'occitana? Es remarcable - mas sabi pas se ne podem tirar una conclusion - que (a l'excepion d'un *bin*), la -N finala siá pas notada (*vi, by, vy, bi; mayty; testo* - *teston* es una moneda de l'epòca -; *collatio*; *Castel leo*; etc.). Notem tanben la grafia -ys per çò que seriá lo son [ʃ] (*mateys* e *madeys*; *leysen* - *daissen/déishen* -; *Foys*, antroponim notat Foix dins las primières annadas del segle XVII)¹⁸.

Per çò qu'es de la morfologia, los *nosauti* indicavan ja de plurals en -i; sembla plan que n'i aja, almens, dos autres exemples amb *prestadi* e *paguadi* dins una meteissa frasa, mas avèm tanben un *praubes* e avèm assenhalat un *nosautis*. Dins lo tèxt concernint Bausen (1523), relevam los *passi*, es a dire un plural en -i per un substantiu, caracteristica, o avèm dit dels parlars que l'aranés s'i restaca. Per contra, lo cort tèxt de Bausen emplega pas que los articles definits *lo, los, las, dels*. Ja sabèm qu'avèm de parlars pirenencs qu'utilizan los articles definits *eth, era*, al singular, es al plural. Los comptes de Vielha ofrisson de causas estranhas. D'efièit, çò mai sovent - mas pas sistematicament -, los escribas an pas contractat l'article amb las preposicions

14 Trobam tanben las formas *consols*, quonsols amb conservacion grafica de la sequéncia -NS-, coma fasèm encara uèi dins la grafia occitana malgrat la prononciacion ['kɔsuls].

15 Pel tractament gascon de -TR- > -T-, veire tanben *nosauti*; trobam un mèste dins lo tèxt mas, a costat, i a, per exemple, *nòstra*.

16 Doas remarcas. 1/ Es la forma *nosauti* e non pas *nosati* que trobam. 2/ Notem un plural en -is (pura grafia?). La forma *nosautis*, *vosautis* es la forma actuala de Coserans e Comenge.

17 Avèm tanben *Sanct Binsens*, *Sanct Martí*, *Sant Beat*, *Sant Joan*, *Sant Jayme*, mas *Senta Quiteria*.

18 I a la -S- sola dins lo *esyberniu* (eissiverniu/eishiverniu) e *esyberna* (eissivernar/eishivernar) e -CH- dins *lochyvernui* (l'eissiverniu).

“a” e “de”, prepausant de solucions coma *alo, a los, de lo, de los, qu’interrògan*. Què vòl dire? O sabèm pas mas se poiriá - es pas qu’una ipotèsi - que lo redactor foguès estat embarrassat per la manipulacion dels articles occitans classics (*lo, los, la, las*) e aguès pas sabut cossí se contractavan... Aquesta proposicion pòt semblar de mal sosténer: cossí explicar qu’un escriba, acostumat a escriure tot lo sant clame del jorn, siá arrestat per tan pauc? E perqué d’autres còps la contraccion es faita? Es pas lo meteis escriba? Se poiriá qu’aquela non contraccion foguès un indici d’estranyetat, pel redactor que i èra confrontat de l’article *lo*, el que n’utilizariá, a l’oral, pas que *eth e era*. Aquestes darrières, encara que pas plan nombroses, son pas del tot absents dels comptes de Vielha, mas lor raretat provariá lo refús que coneissián dins la practica escrita, que punhián pas que de còp en còp. Es atal que descobrissèm dins un article dels comptes, *bara et pas* (segurament *barrar eth pas*), *cap det pont, enta geta et sargent dera bila* (ont avèm, al còp, lo masculin e lo femenin) o *pes penyores* (ont avèm lo femenin plural *es*, contractat).

Tot compte fait e rebutut, vesèm que l’occitan utilizat coma lenga administrativa escrita dins l’Aran del siècle XVI, fasiá participar la Val d’una koinè occitana, almens gascona, que los traits locals - sens èsser totalament absents - èran pas sistematicament recercats. Plan mai, me sembla, aquel “aranés” escrit es plan pauc catalanizat e pas brica ispanizat çò que l’inscriu plenament dins lo mond aquitan que ne fa partida. E l’utilizacion de las formas gasconas dels prenoms dins lo tèxt (*Pèir, Miquèu, Sauvador*), tanplan dels antropònims¹⁹, o confirma.

L’Archiu Generau d’Aran consèrva un tèxt gascon datat de 1668, còpia d’una letra mandada pel sénher Besombes, procuraire al parlament de Tolosa, adreçada al sénher Dufreche. Sèm pas en situacion de dire se la còpia foguèt faita pel sénher Besombes el meteis que, coma o veirem s’exprimís puslèu en lengadocian, o per una autre persona. Aqueste tèxt ensaja de s’avesinar de la lenga dels araneses mas conten francismes (*prochaine, moyen*) e catalanismes (*sinó*). Lo demai es escrit dins un gascon qu’es pas aranés (per exemple, *granos* = grandas; plurals femenins en [os] allòc de [es]) e que pòt èsser influenciat pel lengadocian coma dins *uno*; los articles son pas pirenencs ja que trobam *lo, l’, los, la* únicament²⁰. La meteissa causa se pòt dire de la notacion faita en 1612 pel mercadièr de Sent Beath, Arnaud Lagarde, que, aprèp aver escrit en francés, ajusta: “Lou quau acte a recoubrat loudit Benouso ma pagat lous tres francs”²¹. S’agís de gascon (*quau fa pas de doble*), mas los articles (*lo, los*) son pas locals. Un autre tèxt venent de Tolosa, en 1683, nos n’aprend pas mai sus l’aranés qu’i cabon de formas lengadocianas del sud, plan caracteristicas (en grafia classica: *le, prumièr, fèit, nos ac faretz saber, jo...*), mas confirma la practica de l’occitan

19 Trobam un *Sauvado de Castetvaquer* (= Castèthvaquèr) quand trobarem la forma catalanizada *Castellvaquer* dins la documentacion del siècle XVII.

20 AIGA, Vielha, “Copia de instructa embiada a Dufreche per M^r Bezombez per sy benguen retira l’argent consignat per pare de M^r Bartier”, 1668. Balhem quelques exemples incontestablement gascons: *lou arrest au ditz atau ; ac pot he ; cau reffuza deu bailla l’argent* ; etc.

21 AIGA, Sent Beath, 20/5/1612.

dins las relacions Aran-reialme de França, e mai dins los afars de justícia²². E pas un occitan dialectalament “local”. L’Aran èra plan dins l’ensemble lingüístic occitan coma i èra Bearn que nos daissèt fòrça mai de testimoniatges lingüístics de l’epòca.

Elements lingüístics contenguts dins los tèxtes en occitan conservats a la Val d’Aran comparats

a la producció bearnesa (sègle XVII)

| | occitan | catalan | comun occitan e catalan | espanhòl | francés |
|---------------------------|---------|---------|-------------------------|----------|---------|
| tèxtes conservats en Aran | 36,5 % | 2,5 % | 58 % | 0 % | 0 % |
| tèxtes bearneses | 27,5 % | 0 % | 68 % | 0 % | 4,5 % |

Annèx 1

Qualques documents sus la lenga a l’epòca modèrna tirats dels archius araneses

Libre des capítols de Bausen, capítol 8, 7 de mai de 1523

Capítol 8 - Plus bolem et ordenam los sus-dits habitants de dit loc que tota persona que aurirà los passi privilegats que son acostumats de ten[] barras en lo loc de Bausen que aquells talls que les aurisca et no les tornaran a barra que pagaran sinc sous a la villa sino que fosse persona innoranta y aquesto que sie tot a la conexensa de la villa y lo sinc sous seran los dus dels cònsols y los tres de la villa.

Comptes de Vielha, 1563-1565

- [3] Ite(m) mes de collatio devant la porta hun pigre de vi e tres migeres e dus pas que Sauvado de Castetvaque les s’enportec enta la companya.
- [4] Ite(m) dus reals e myey que se’n fecs Johan de Sala, cosso, ab lo fuste quan vengueren visitar la cranva.
- [5] Ite(m) mes se’nporteren huna mygera de vi.
- [15] Ite(m) a pres una hola de metau p(er) mas de la tora q(ue) se debie a Guillyamot de Bilac e jo Johan Ane e agut a paua a di Guillyamot de mon propi e boy q(ue) me torne dita hola.

²² Aqueste document conservat a Vielha, a l’AIGA, conten dos tèxtes. Lo primièr, datat de Tolosa, lo 26 de julhet de 1683, es escrit al jutge e al sindic de la val pel senyor Besombes, procuraire al parlament. Lo segond, adreçat amb lo precedent, es la traducció d’una letra, del 17 de julhet de 1683, d’un avocat al Consell, Mestre Segonzac, que s’occupa a París dels afars dels araneses. Es de notar, per çò qu’és de la consciéncia lingüística, que lo senyor Besombes a sentit la necessitat, per s’adreçar a las institucions aranesas, de revirar dins son lengadocian un tèxt en francés. Es possible que la documentació privada, uèi escampilhada e pas inventariada, porgisca, un jorn, d’autres indicacions sus las lengas escritas en Aran a l’epòca modèrna. Cal pas desbrembar, tanpauc, que lo tractat de ligas e patzerias del 22 d’abril de 1513, conegut jol nom de tractat del Plan d’Arrem, es redigit en occitan, çò que mostra qu’aquesta lenga podia servir de lengua veïculara pels occitans, catalans e aragoneses, coma també al País Basc e en Navarra (la costuma de Sola, per exemple data de 1520 - M. Grosclaude, *La coutume de la Soule, Saint-Etienne de Baigorry, Izpegi, 1993, 164 p.*).

[164] Goe qu(e) condam a 21 de mars 1565 an condefinat tot lo consel de Biella dam los consols biels resten debitors 25.

[227] It(em) mes nos deu lo dit Gaspart en auta part pes penyores de cada sinc sous per penyora de l'aygoa [...].

Archiu Istoric Generau d'Aran, « Copia de instructa embiada a Dufreche per Mr Bezombez per sy benguen retira l'argent consignat per pare de Mr Bartier », 1668

Per so que auem consignat mes de so que es deugut cau gardar aquero demande et lou rapport que auem optengut aqueste dia demqu a la Sant Martin prochaine que altra compta et he son compte dessus aquero partida que lou arrest au ditz atau.

A mes de aco Bartier pouyra este appellant de las tacxes de despens et y a granos aparencias quen sera tirat caique cause et per aco bau mes que consignat mes que non pas mens.

Sy Bartier ven cubra largent de las mas de Mosur Dufreche depositary est no cau he sino que Dufreche rettire uno quitanca que sy Bartier se bol rezerua contre los messieurs de la valée est ac pot he et aro no prejudicara en re dap condicion que nous rezerue aré contre lo depositary y mes sy est se rezerue aré [] cau reffuza deu bailla largent.

Mes sy Bartier se rezerua per acté et cau que Dufreche offresco et hasse besse la partida et [] la moneda ques estado consignada et per aquet moyen nou y aura cap de dangé et le desliure largent en ly responé que est no ben pas plan ny que no pretend quet se balgo en re de sas protestacions et rezeruacions de Bartier contre las cuales est he sas protestacions et rezerbacions contraries.

Archiu Istoric Generau d'Aran

A) de Tolose le XXVI juillet 1683

Segnor

Jo ay rebut una carta de l'aduocat de Paris que beiretz la copia que ne faitte et so que laboucat crei ; per le prumie courie laduocat me mandara so que sera estat feit et bous a enbiare.

Jo ay vist per vostre carta que abetz enbiat a Madrit et que atendetz nouuellos quan nauretz nous a faretz sabe.

Bartier es en ville malaut el na pas fait encare res, quand fara quicon jou vous en donare ausis.

Jo vous remerci de l'honor que mabetz fait de descriure, jou nou meritabo tant dhonor et per tout remerciom ent nou podire autre causa sinou que son bostre tres humbe serbitor.

Lo segnor Joan Despagnia troubara assy que jou le remercy de launor que ma fait et que son tabe son servitor.

Besombes

B) À Paris 17 juillet 1683 [letra revirada per M. Besombes]

Jou ay rebut monsieur toutz los papes que m'ab[...] enbiatz on be las memorios de lafe de la valee daran. Jou et pla bist toutes causes et trobi que bost[...] causo nes pas bone et que le consol nou y bouldra pas touca.

Primo que la transaction es estat arestat que serio ensinude al parlomt
 Secundo que las partides se son soumeses a las rigous de la justice daqueste royaume,
 aprep aco on nou pot pas dire que le parlomen nou ne diugo counegue
 Tertio que le scindic sies retirat el mesme, et y a defend[], et que l'executiu nou pot
 estre perseguide en (loc plus).
 Jou ay fait neamens une r(e)queste que baillade a un m(èstre) de requestes per lafa
 delibera jou fare tout [çò] que se pouira.

Archiu Istoric Generau d'Aran, Casa Joan Chiquet n° 1692

À S^t Beat a 18^{me} fevrier 1695

Seignor rectour. Jou ey bolgut vous escriue la presente per vous auisa com jou deguy
 party per Tho[losa] dimercles sy platz a diu et sy abetz beson de algune cose vous
 pouiratz mescritue que jou nou manquare de fer lou que me manaratz.
 Jou vous enboye lou compte de la sere que jou bailheguy per la isgleise que vous veirat
 dare escriut. Nou dic mes sinou que soy per ma vide vostre bon amic y seruidour.

J. Rouanet

Archiu Istoric Generau d'Aran

Jou bas firmat declary ave rebut un fusil de aquels que faltaven en la villa de
 Fos de la besse que lou Seignor Belber aquel temps gouernador y toute la bail
 bacheren en loudit Fos louqual fusil tinc rebut des mans del seignor Don Planes
 gouernador de la bail d'Aran. Fait la presente declaration dia als quatorze del
 mes de avril de lan 1703

Lafont ptre

Archiu Istoric Generau d'Aran, Casa Joan Chiquet n° 2094

Señor,

Jou me trobi obligat de bous escribe per un affe que jou cresioy finit et terminat. Aquo
 es per rason dune saside quel Señor Benouse a het he sur ets habitans de Hos. Jou
 abouy l'haunou den parlar en St Beat al señor jutge de la bal, et a moussen Pau. Lous
 habitans de Hos nous an pagat aqueres sommes que Benouse lour demande, percoque
 eren condannats a nous las pagar per sentence de Toulouse, et monsieur de Bertier,
 mon pere, en passan la transaction dab la balée reserbec per expres l'execution daque-
 re sentence ; de sorte que si la balée nou he pas quara [carar] Benouse alegard dets
 habitans de Hos et he les rende lours effets sasits, nousauts nou poudem pas mous
 empêcha dagir contre la balée et d'executa nostres arrestis, percoque ets de Hos nous
 aperen en garantide. Nou bouliat pas señor sindic que y aye plus d'ahés entre nousau-
 tis. Non y a que trop augut, reglat bostis ahés dab Benouse et que los habitans de Hos
 nou sien pas inquietadis per rason daco, et que seram amigs.

Jou soy tres parfaitemen señor vostre tres humble et tres obeissent servidou.

*De Bertier a Aspet,
le 11e janer 1711*

Archiu Istoric Generau d'Aran, Casa Joan Chiquet n° 2288

Seignor meu

Me an rapportat que en la billa de Bieilla capital de bostra balea abion pres un fil de aquest loc de Santein lo que me obliga embiar bos esto proprio suplican bos ly rendas la libertat com creo esta de rao el no sta hombre per inquietar degun si a passat a nabega a bostra serra los de bostra balea uson de madeich pribilegio en esta casterania ab toda seguridat coma esta portat per los pactes de las passerias estic aguardan bostra resposta y quedo bostron serbidor.

*Santein als 17 de febrer de 1711
Marbé (?)*

Conclusion

Plaçat dins son contèxt lingüistic e istoric, lo parlar de la Val d'Aran presenta, fin finala, paques particularitats pròpries. L'aranés - se nos cal utilizar aquesta denominacion - es pas res mai que d'occitan, dins sa varietat gascona pirenenc orientala, sens autra caracteristica que d'èsser inclús dins un estat different del demai d'aquel meteis occitan-gascon. Sens cap de doblet, los parlars araneses se distinguisson pas gaire dels parlars vesins de Comenge e Coserans. Doni dins un annèx final (cf. Annèx 2, çai-jos), un tròc de la parabòla del filh percut, dins unes varietats d'occitan e, me sembla, que l'unitat lingüistica es clara. Tanplan, me sembla que se poiriá prepauar una mena "d'estandard" pels parlars d'Aran, Comenge e Coserans, e perqué se fariá pas una gramatica d'aqueles parlars²³, en seguint un modèl de lenga comun e en referéncia amb l'occitan "general" (en recercant las solucions occitanas)? E, plan segur, utilizar e difusar lo mot "occitan" mai largament, e subretot pas en oposicion amb "aranés".

Al delà, aqueles parlars an una parentat fòrta amb lo lengadocian sud-occidental (País de Foish, Tolosan...). Ara, çò que dona una fisionomia particulara a l'aranés es la pression de las lengas dominantas (vocabulari, sintaxi, fonética tanben qu'ausissèm de mai en mai, per donar unes pauques exemples, de confusions entre [y], tipicament occitan, e [u]; se pòdon ausir tanben de confusions entre [ɛ] e [e] - per ex. dins los -et finals ont l'occitan a [e] o dins -èr; las assimilacions consonanticas an tendéncia a desaparéisser; me sembla tanben que la realization actuala de la -A

²³ Ja i a la de Jòrdi Deledar pels parlars coseraneses, la de M. Daulon (dins una perspectiva non occitanista) pels parlars del naut Comenge e la d'Aitor Carrera per l'aranés.

finala atòna es plan mai pròcha de [a] que çò qu'èra). Un trabalh de correccions dins aquel sens seriá necessari.

D'un autre costat, qualques causidas graficas serián de revisar, en acòrdi amb çò que fan los gascons de Luishon o dins las Valadas occitanas de l'estat italian ont de fenomèns vesins existisson. Atal, los plurals de las -A finalas atònas, escrits -ES actualament, se poirián escriure -AS sens que la prononciacion [es] ne siá cambiada; meteissa causa dins la morfologia verbala (CANTAS, CANTA allòc de CANTES, CANTE que mena, e mai, una confusion amb lo subjontiu present). Meteissa causa per la 3^{ena} persona del plural dels verbs que se poirián escriure -AN coma dins las autres varietats de l'occitan e dins l'occitan "general". Se pausa, alavetz, la question de l'article definit plural qu'a pas qu'una forma epicèna (comuna al masculin e al feminin), es. Coma endacòm mai en gascon pirenenc se poiriá causir d'escriure eth → eths [es] mas qué far pel femenin? Conservar era → es? O passar a las formas generalas era → eras en tot conservar la prononciacion [es]? Amagui pas qu'aquí lo problema es dificil.

Tanben, se poirián escriure -V- (*aver*), coma es corrent dins lo demai del gascon ont lo fenomèn existís, los [W] intervocalics correspondents a de [β] çò que, tanben, permetriá d'aver una sola forma escrita en Aran ja que lo naut Aran pronóncia [β].

Del sieu costat, la causida d'un occitan "referencial" "orientalizant" es pas sens critica, qu'aluènha las causidas retengudas de la practica aranesa mas tanben de tot l'ensemble del gascon, d'una brava part del lengadocian, de l'auvernhat tot, etc. (ex.: *nuèch/nuèit; fach/fait; dich, dicha/dit, dita - ponch/punt; ponh/punh*). Lo risc, fin finala, al delà d'isolar l'aranés (fixat dins sas normas e sas practicas, d'un costat) e l'occitan "referencial" del traductor (fixat, de son costat, sens téner compte obligatoriament de la practica aranesa) e de ne far doas "lengas", es de far del gascon tot (e benlèu d'autres parlars), un "lengatge estranh". Çò qu'èra pas brica lo cas quand legissèm los tèxtes de l'epòca modèrna...

D'autra part, cal favorizar la "circulacion de la lenga" es a dire la preséncia d'autres parlars occitans en Aran e la preséncia dels araneses dins la vida culturala d'Occitània tota. Es al prètz d'una coneissença mutuala e d'esfòrços faits dels dos costats que la question de la lenga, coma segurament aquò deviá èsser lo cas bèl temps a, serà pas mai vista coma un problema mas al contrari coma un element de solidaritat e d'identitat. E alavetz qui poirà dire que Lúcia es pas una de las cantairas occitanas mai importantas encara que cante en comenjo-coserano-aranés e que la Val d'Aran participa pas, plenament e benlèu decisivament, a la vida culturala d'Occitània? Es, cresí, la jòga per las annadas avenidoiras pels occitans, d'ont que sián, d'Aran o d'endacòm mai.

Annèx 2

La parabòla del filh perdut^{24 25}

| Vielha | occitan de tipe “central” o “referencial” | occitan de Pàmias |
|---|--|---|
| Un òme non auie sonque dus hilhs. Eth mès joen diguec a sa pare: “Ja ei ora de que siga eth mèn pròpi amo e que aja dinèrs; cau que me’n poga anar e que veiga país. Partitz es vòsti bens e datz-me lo que me pertòque.” - “Ai, hilh mèn”, diguec eth pare, “com a volgues! Ès dolent e seràs castigat!” Despús, dauric un caishon, partic es sòns bens e ne hec dues parts. | Un òme aviá pas que dos dròlles. Lo mai jove diguèt a son paire: “Es ora que siái mon mèstre e qu’aja de sòus; cal que me’n pòsca anar e que veja de país. Partejatz lo vòstre ben e donatz-me çò que devi aver.” - “Ô mon filh”, çò diguèt lo paire, “coma voldràs; ès/siás un dolent e seràs castigat”. Apuèi dubriguèt un tirador/una tireta, partegèt lo sieu ben e ne faguèt doas parts. | Un òme aviá pas que dos dròlles/mainatges. Le mès joen diguèc al sieu/a son paire: “Es ora que siái mon mèstre e qu’ajai sòuses; cal que me’n pòscai anar e que véjai país. Partejatz le vòstre ben e donatz-me çò que devi aver.” - “Ô mon filh”, ça diguèc le paire, “coma vuèlgas; ès un dolent e seràs (siràs) castigat”. Apuèi durbisquèc una tireta, partegèc le sieu ben e ne fasquèc doas parts. |
| Un òme non avia sonque dus hilhs. Eth mès joen diguec a sa pair: “Ja ei ora que siga eth mèn pròpri mèstre e qu’aja sòus; cau que me’n poga anar e que veiga país. Partitz eths vòsti bens e datz-me çò mèn.” - “Ai, hilh mèn”, diguec eth pair, “com a volgas! Ès dolent e seràs castigat!” Despús, dauric ua tireta, partic eths sòns bens e ne hec duas parts. | Un òme aviá cap que dus hilhs. Eth mes joés que diguèc/didèc a sa pair: “Qu’è ora que siá eth mèn mèstre e qu’aja moneda/sòuses; que cau que me’n posca anar e que veja país. Partejatz eth vòste ben e datz-me eth çò que devi aver.” - “Ô, mon hilh”, didèc eth pair, “coma volhas! Qu’è un dolent e que seràs castigat!” Après que dauric ua tireta, que partegèc eth son/sòn ben e que’n hèc duas parts. | Un òme avia cap que dus hilhs. Eth mes joés que diguèc/didèc ena sa pair: “Qu’è ora que siá mon mèstre e qu’aja sòuses. Que cau que me’n posca anar e que veja país. Partejatz eth vòste ben e datz-me eth çò que devi aver.” - “Ô, mieu hilh” diguèc/didèc eth pair, coma volhas! Qu’è un dolent e que seràs castigat.” Après que draubic/drauic ua tireta, que partegèc eth ben e que’n hèc duas parts. |
| A partir de las diferentas versions donadas per P. Bec, <i>Les interférences linguistiques...</i> | | |

24 Dins B. Arrous, « De garròcs e de nhèu. Eth gascon deus d’eths auts », *L’identitat occitana e catalana dins los Pirenèus al lum de la lingüística e de l’istòria*, Pàmias, Cercle Occitan Prospèr Estieu, 2003, p. 36.

25 Adaptat segon P. Bec, *La langue occitane*, París, PUF, p. 112

A partir d'aquestas tres versions, me sembla pro aisit de prepausar una version en "occitan arano-comenjo-coseranés" "estandard", comparada amb una version en occitan gascon "comun literari"²⁶ e una version en occitan "referencial":

| gascon "comun literari" | "estandard" comenjo-coseranés | occitan "referencial" |
|--|---|--|
| Un òmi qu'avè sonque dus hilhs. Lo mes joen que digó au son pair: "Qu'ei temps que sii lo men mèstre e qu'agi moneda; que cau que me'n posqui anar e que vedi país. Partejatz lo ben e datz-me çò qui devi aver." "Ai, hilh men", ce digó lo pair, "coma volhas! Qu'èss un dolent e que seràs castigat!" E puish, qu'aubrisco ua tireta, que partegè lo ben e que'n hasó duas parts. | Un òme (qu')avia sonque dus hilhs. Eth mès/mes joen (que) diguec a sa pair (o son pair): "Ja ei ora que sia eth mèn/mon mèstre e qu'aja moneda; (que) cau que me'n posca (poga en Aran) anar e que veja (veiga en Aran) país. Partejatz/partitz eth vòstre ben e datz-me çò que devi aver." "Ai, hilh mèn/mon hilh", çò diguec/diguèc eth pair, "coma volhas/volgas! (Qu')èss dolent e (que) seràs castigat!" Après, (que) dauric ua tireta, (que) partegèc/partic eth sòn/son ben e (que'n) ne hec duas parts. | Un òme aviá pas que dos dròlles. Lo mai jove diguèt a son paire: "Es ora que siáí mon mèstre e qu'aja de moneda; cal que me'n pòsca anar e que veja de país. Partejatz lo vòstre ben e donatz-me çò que devi aver." - Ai, mon filh", çò diguèt lo paire, "coma voldràs; ès un dolent e seràs castigat". Apuèi dubriguèt un tirador, partegèt lo sieu ben e ne faguèt doas parts. |

26 Segon B. Arrous, art. Cit., p. 34.

Estudi 2

Contribucion ara elaboracion d'un occitan «co-mun» : distància entre eth aranés escriut e 'th «lengadocian literari » preconizat per L. Alibèrt

Bernat Arrous

1. Era nòrma ortografica

1.1. Eras finalas ditas « femeninas »

D'acòrd dab ce que's hè tanben en catalan, eras Nòrmes Ortogràfiques que sancionan eth passatge a [e] (= [é] en AFI) der'antica A atòna finala davant consonanta latina (+ S/N/T). Ja's sap qu'eth fenomène aqueth afècta, non solaments eth femenin plurau deths substantius, deths pronòms e deths adjectius acabadi en -a (ex. [akérəs pulíðəz énnəs] : *aquerès polides hemnes*), mès tanben de nombrosas fòrmas verbals. Era nòrma alibertina de qui ei confrontada ad aqueth madeish fenomène, en d'aubuns sectors deths Aups e deras Perinèus, qu'arrestableish pertot era /a/ etimologica.

« Quauques detalhs dera adaptacion d'aquera normativa aranesa son diferentas de l'ús [sic] preferenciu deras autas varietas gasconas : eras particularitats aranesas son en teoria possiblas tanben enas autas varietats de gascon, mes en practica s'utilizan sonque en aranés [sic], per non s'utilizan sonque ...], ja qu'era rèsta deth gascon prefereish solicions mei unitàrias. Essencialament se tracta de la [sic] forma deth plurau femenin en -es en lòc de la grafia -as qu'es [sic] mei unitària e englobanta (podent prononcià's [es/ɔs/as] segon eths parlars. Ex. hemnes araneses en lòc de hemnas aranesas... » (cificacion trèita deth article en occitan subeth eth aranés de Wikipédia, era Enciclopèdia Libra deth malhum).

| Nòrma alibertina | Nòrmes Ortogràfiques |
|---|---|
| <p>• « A atòn deu sempre èsser representat per a quina que siá sa valor : (...) femna, femnas, pòrtas, pòrta, pòrtan (...) Dins lo parlar [donasanenc], -a persistís mentre que -as passa a [-es] : ròda, ròdas, bada, badas /roda, rodes, bada, bades/. » (Gramatica Occitana, 1ra part, § 19).</p> <p>• « a final atone et a des finales atone en <i>as, an</i>, qui peut avoir diverses valeurs, sera toujoures noté par a : <i>bòrda</i> (<i>bòrda, bòrdo, bòrde, bòrdeu, bòrdou</i>), <i>bòrdas, cantan.</i> » (IEO 1951, Application).</p> <p>• « [En Cisaupenc] per notar la terminason caracteristica dau plurau femenin, se nòta -as que se pronóncia [-es] en generau (o tanben : [-ɔs, -a:, -e]) :</p> <p>la <i>frema</i> [la 'fremo] las <i>fremas</i> [les 'fremes (las 'fremɔs, la: 'frema:, le 'freme)] » (CLO, 2007, Preconizacions, 18.7.2).</p> | <p>De faicon, segnificativa, ça'm par, cap deras duas versions consecutivas deras Nòrnes non hè claraments mencion d'aqueth problème, ne en § 1 (a, à), ne en § 3 (e, é). Qu'ei, neaumens, possible d'arrelhevar, tot ath long deth tèxe, divèrsi exemples de qui temuenhan implicitaments der'adopcion dera grafia e per /-a/. Atau :</p> <ul style="list-style-type: none"> • iautes (1999, § 8) • sabie (1999, § 12) • aigües (1999, § 19) • coja, coges (1999, § 25) • abséncias (1999, § 36c) • pronóncien, denóncien, sabien (1999, § 36e) • arrata-cauda, arrates-caudes (1999, § 37) • escoten (1999, § 38a) • d'autes terres (1999, § 38a) |

1. Se consideram qu'eth « bavartesenc » parlat ena Val d'Aran « francesa » e deth quau eth canejanés non constitueish, finalaments que ua variantà, be hè partida integranta deth païsatge lingüistic aranés, qu'ei interessent de constatar qu'eth polimorfisme de qui caracteriza eras *Valadas alpencas*, e's pòt tanben observar en Aran :

| latin | Aranés « comun » | « Bavartesenc » | | |
|----------------------|--------------------------|---------------------------|-------------------------------|-------------------------------|
| | | Canejan | Mètlas | Sent Biath |
| illas feminas | [ez énn̄es] es hemnes | [es sénn̄es] es hemnes | [eres sénn̄es] eras hemnas | [eras sénn̄os] eras hemnas |

2 Ena conjugason, eras desinéncias en **-e** que jògan un ròtle non negligible, estant que perpetuan eras terminasons en **-AT** deth latin. Arrestablir pertot era grafia **-a** qu'auria per consequéncia, dens cèrti cassi, de gomar, per escriut, era oposicion entre era prumèra e 'ra tèrça persona deth singular – a mens d'adméter, peras fòrmas dera prumèra persona, d'aubuas solucion de substitucion de qui, en estat actuau dera evolucion, en tot cas, e son totas estrangèras ara realitat lingüistica aranesa.

| LATIN | Aranés | | Solucion de substitucion possiblas |
|----------|----------------|--------------------|------------------------------------|
| | grafia aranesa | grafia panoccitana | |
| CANTĀBAM | cantaua | cantava | *cantavi |
| CANTĀBAT | cantauē | cantava | X |

| | | | |
|-------------|---------------------|----------|-----------|
| DORMIĒBAM | dormia | dormia | Ø |
| DORMIĒBAT | dormie | dormia | X |
| CANTĀUISSEM | cantèssa per cantès | cantèssa | *cantèssi |
| CANTĀUISSET | cantèsse per cantès | cantèssa | X |
| DICAM | diga | diga | *dígai |
| DICAT | digue | diga | X |

1. 2. Eths diftongs

1. 2. 1. Era reduccion deths diftongs dits « descreishents »

1. 2. 1.1. Eth diftong [èi].

Eras Nòrmes n'admeten era reduccion de [èy] a [è] qu'en fin de diccion. Era norma alibertina qu'arrecomanda d'arrestablir graficaments eth antic diftong en tota posicion.

| Nòrmes Ortogràfiques |
|--|
| <ul style="list-style-type: none"> • Er antic diftong èi [ɛj] a passat a è [ɛ] en posicion final : cantè, è, per cantèi, èi. » (1982 : §8, p. 14). • Er antic diftong èi [ɛj] a passat a è [ɛ] en posicion : finau : cantè, è, per cantèi, èi » (1999 : § 8, nota 1) |
| Nòrma alibertina |
| <ul style="list-style-type: none"> • En [foissenc, donasanenc] e dins lo parlar local d'Agen, ai pòt s'afeblir en èi : <i>fraise, pâisser, fait, lait, mai /frèiche, pèicher, fèit, lèit, mèi/</i>. <p>Per la 1^{ra} pers. del sing. del pres. d'indicatiu del verb <i>aver</i> e la meteissa persona del futur de tots los verbs, lo canbiament de <i>ai</i> en <i>èi</i> s'espadís dins lo narbonés, l'albigés, lo carcinòl e l'agenés (...) Dins lo foissenc, lo tolosan, lo central e lo donasanenc, èi se reduis a è dins : ai, sai, bensai, aurai /è, sè, bessè, aurè/. L'evolucion <i>ai</i>, <i>èi</i>, <i>è</i>, aparenta lo lengadocian al gascon e al catalan e d'una faiçon mas generala a las lengas iberò-romanas.</p> <p>La lenga escrita deu admetre si non que las fòrmas en ai.</p> <p>Los grossiers gallicismes del tipe : /trèt, retrèta, fèt, lèt/ devon èsser remplaçat per trach o trait, retracha o retraita, fach o fait, lag o laid (<i>Gramatica Occitana</i>, 1^{ra} part, § 9). »</p> <ul style="list-style-type: none"> • On choisira, autant que possible, pour l'usage littéraire, les formes les plus conformes à l'évolution normale de la langue et les mieux conservées : èi au lieu de è : <i>hèit</i> et non <i>hèt</i> » (IEO, 1951). |

1. Que pòt tanben arribar qu'era reduccion de [èi] a [è], en fin de diccion, aja lòc davant consonanta, non solaments pas en finala absoluta, mès tanben, ath laguens deth mot : FACTU > [hèit] > [èt] (= *hèt*), FACTA > [hèita] > [ètə] (= *hèta*), TRACTU > [trèit] > [trèt] (= *trèt*). Pensam qu'en d'auti dialèctes gascons dera zòna pirenенca (eth azuèr, eth lavedanés, eth coseranés, ètc), avem, tanben, per exemple : [lèt] < LACTE, per lèit.

2. En matèria de morfologia verbal, eth arrestabliment deth antic diftong dens ua fòrma coma *hèit* (= [èt]), que conduïria, per ua question de coérència, a causir era fòrma *hèita* (= [ètə]) , tath femenin. Era varianta [èðə] (= *hèda*), de qui, contrariaments a ce qu'an pretendut d'aubuns, per non èster etimologica, n'a arren d'incorrèct (que s'arretròba en Luishonés, en Loron, ena Vath d'Aura, etc), mès de qui supòsa neaumens un masculin en *hèt*, que seria, d'ara enlà, hòrabandida deth usatge escriut, (a mens d'admetre la grafia en **hèida*?).

1. 2. 2. 2. Eth diftong [éi]

Eras Nòrmes non trencan cap era question dera reduccion de [éi] a [é] de ma- nièra definitiva. Que lèishan simplaments enténer que ce que's pòt escriver **ei** e pòt èster prononciat [é]. Eth usatge, totun, qu'a fenit per consacrar d'aubuas grafias, coma per exemple, *net* per *neit*. En eths tèxtes de lectura de qui accompanhan era prumèra version deras Nòrmes, ja's pòt léger, per exemple, sos era pluma de Pilar Busquets :

*Er estanh na net doça
Relutz com un miralh,
Dromís en lhet de mossà
Velhat per un gran malh.*

| Nòrma alibertina | Nòrmes Ortogràfiques |
|---|--|
| <ul style="list-style-type: none"> Ei tampat pòt se reduire a <i>e</i> en agenés, carcinòl e tolosan : <i>dreit estreit, creire, veire /dret, estret, vere, crere/</i>. Las fòrmas en <i>ei</i> devon èsser mantengudas dins la lenga crita » (<i>Gramatica Occitana</i> : 1^{ra} part, § 11 bis). | <ul style="list-style-type: none"> I a tendéncia a passar d'ei [ej] a e [e] : <i>trueita o trueta; dret, lhet, net per dreit, lheit, neit</i> (1999, § 8, nòta 1) |

1. 2. 1. 3. Eth antic diftong [òü].

Encara qu'eth tèxte deras Nòrmes non hacia que constatar qu'eth antic diftong [òü] ei passat a [ò] (en realitat, a ua [ó] mès o mens barrada, per amor dera sua posicion finala), ja s'a pres er'abitud en Aran, d'arrestablir eth segond element de diftong per escrit : **vòu** < *UÖL(ET), per [bó] (= **vò**), etc.

| Nòrma alibertina | Nòrmes Ortogràfiques |
|---|---|
| <ul style="list-style-type: none"> ... -òus final se simplifica en -òs en carcinòl : <i>dijòus, buòus, uòus /dijòs, biòs, iòs/</i>. La lenga crita deu servar -òus. » (<i>Gramatica Occitana</i>, 1^{ra} part, § 15 bis). On choisira, autant que possible, pour l'usage littéraire (...) òu au lieu de ò : <i>esquiròu</i> et non <i>esquirò</i>. » (IEO, 1951). | <ul style="list-style-type: none"> Er antic diftong òu [ɔw] a passat a ò [ɔ] : <i>auriò, bò, vò</i> per <i>auriòu, bòu, vòu</i>. Comparatz <i>sau/salat</i> tamb <i>auriòu/auriòla, vò/voler</i>. » (1999, § 8, nòta 3). |

1. Era reduccion de [òú] a [ó] qu'aubedeish a ua tendéncia de qui s'arretròba un shinhau pertot, en gascon, dab ua frequéncia màger en despartament deth Gèrs (32), en Bigòrra e en Haut Comenge (Gasconha Orientala) e tot ath long dera ribèra der'Ador (Shalòssa, Baish Ador). Eth tablèu següent, de qui avem establit a partir deras dadas amassadas entara redaccion deth ALG (Atlas Lingüistic dera Gasconha), que balha ua aidea de ce quin e's pòt distribuir, sus eth terrenh, ua fòrma tipicaments gascona coma [lĩnsó] (= linçò[u]) < LINTEÖLU, per rapòrt aras fòrmas mès arcaïsantas que son [lãnsòw] e [lãnsòl] :

| | Fòrma majoritària | Variantas |
|---|---------------------------------|---|
| Aran (Casau, Mètlas) | [lĩnsó] | |
| Arièja gascona (Coserans) (09) | [lãnsòü] Bathmala : [länθòü] | Massat : [lãnsòl] |
| Arieja foishenca (09) | [lãnsòl] | |
| Gèrs (32) | [lĩnsó] | |
| Bordalés (33) | [lãnsòü] | Sent Savin de Blaia : [lënsò] |
| Haut Comenge (31) + Barossa (65) | [lĩnsó] Bossan : [lãnsó] | Martras Tolosana, Saleish : [lãnsòü]. |
| Volvèstre (31) + (09) | [lãnsòü] | |
| Gasconha Tolzana (31) | [lãnsòl] | Carbona : [lãnsòü] Riumas, Frosins : [lãnsòü] Cadors, Bragairac : [lãnsó] |
| Tolosa madeish (31) | [lãnsòl] | |
| Bigòrra, Lavedan (65) | [lĩnsó] | Sent Léser : [lãnsòü] |
| Shalòssa (40) | [lĩnsó] | |
| Còsta Landesa Lanas de Gasconha (40) | [lãnsòü] | |
| Òlt-e-Garonna (47) | [lãnsòü] | Mezin : [lĩnsó] Pègmiròl, Layrac : [lãnsòl] |
| Baish Ador (Bayoune) (64) | [lĩnsó] | |
| Biarn (64) | [lãnsòü] | Pontacq, Garlin, Salias : [lĩnsó] |
| Tarn-e-Garonna (82) | [lãnsòl] | |

1. 2. 2. Eth diftong -iu

En Aran, eth diftonhg [íü] e 'th trifong [yéü] que son entercambiabiles : [diü] ~ [dyéü] < DÉUS, [estíü] ~ [ustyéü] < ÆSTÍUU, [arriü] ~ [rryéü] < RÍUU, ètc. Globalaments, qu'òm pòt considerar qu'eth diftong [íü] e caracteriza eth Baish Aran, mentre qu'eth trifong [yéü] e demora, en generau, estacat ath arrestant dera Val. Mès, era influéncia deth catalan, entaths mots de qui coïncideishen enas duas lenguas (riu, estiu...)

qu'afavoreish un shinhau mès tot dia era generalizacion deth diftong [íú] ath des-triment deth trifong [yéü] – ce que va, d'aulhors, en sens dera evolucion naturala dera lengua, a pus prètz pertot en Occitània (sonque en Provença). Ara, encara que, dab eth temps, eras finalas en [yéü] ajan fenit per entremesclar-se dab eras finalas en [íú], non se'n destriavan pas mens istoricaments. Eth tèxte deras Nòrmes non ten cap compde d'aqueri critèris etimologics, considerant simplaments eth digrafe **-iu** coma ua grafia “englobanta” :

1. 2. 2. 1. Eth diftong **-iu** « primari » :

| Gramatica Occitana | Nòrmes Ortogràfiques |
|--|---|
| <ul style="list-style-type: none"> « IU (iou fr.) es grafiat regularament iu quand proven d'un i long latin o d'un ü en iatus seguit de u (ou fr.) : riu, liura, nadiu, piuse, tiure, siure (...) Iu se diftonga sovent en ieu en gavaudanés e en roergat. Aquela diftongacion s'es-padissiá dins gaireben tot Lengadòc fins a una epòca re-centa ; las <i>grafias rieu, vieu, lieura, sieure</i> son frequentas dins los documents. La lenga literària deu servar las fòrmas en iu. » (1ra Part, § 14). | <ul style="list-style-type: none"> « iu se pòt liéger segontes era prononciacion de cadun, iu/ieu [iw], [jew] : hiu, Diu, aciu » (1999, § 8, nòta 2). En aranés « normalisat », [arriü] o [rryéü] < RIUU que s'an, doncas, a ortografiar uniformaments : arriu, ètc. |

1. 2. 2. 2. Eth trifong **-ieu** procedent dera diftongason de l longa latina da-uant L

| Occitània Grana | Nòrmes Ortogràfiques |
|---|---|
| <ul style="list-style-type: none"> « I seguit de l pòt se diftongar en iè, ia, iò : fil, abril pila. En tolosan, foissenc, part del cevenòl, òm a : /fièl, abrièl, pièlo/ ; en montpelhierenc, cevenòl d'Alès, besie-renc, narbonés, central, albigés, part del roergat, orlhagués, òm a : /fial, abrial, pia-lo/ ; en gavaudanés, carcinòl e part del roergat, òm a : /fiol, abriol/. La lenga literària deuriá servar i » (1^{ra} Part, § 7). « Le i long du latin (l) diphongue en iè devant l ou ll : anguìlam > angèla, argìllam > argèla, pìlam > pièla, vìllam > vièla » (M. Grosclaude : 2000, p. 23). Eth madeish obratge que balha, en sòn lexic etimologic, p. 64, era fòrma : hieu/hiu, de FÍLUM. | <ul style="list-style-type: none"> « iu se pòt liéger segontes era prononciacion de cadun, iu/ieu [iw], [jew] : hiu, Diu, aciu. » (1999, § 8, nòta 2). |

1. 2. 2. 3. Eth trifong **-ieu** procedent dera diftongason de l brèva latina da-uant velària

| Occitània Grana | Nòrmes Ortogràfiques |
|--|--|
| <p>« Èu obèrt pòt se diftongar en ièu que se reduís sovent a iu : mèu, mièu /miu/. Èu se res-contra en central, tolosan, agenés, albigés, roergat, etc, ièu subsistís en gavaudanés, roergat, orlhagués, carcinòl, montpelhierenc, etc ; iu es corrent en central, tolosan, foissenc, albigés, etc. Las divèrsas formas se mesclan forra-borra dins tot Lengadòc. La lenga literària deu admetre sinon que : èu, ièu : mèu, mièu, dièu, Andrièu, Matièu, romièu. » (Gramatica Occitana, 1^{ra} part, § 12).</p> | <p>« iu se pòt liéger segontes era prononciacion de cadun, iu/ieu [iw], [jew] : hiu, Diu, aciu. » (1999, § 8, nòta 2).</p> |

Conclusion

Ja's pòt constatar que règna ua cèrta disparitat d'un parçan a un aute :

- Era nòrma alibertina propiaments dita qu'arrecomanda de destriar neta-ments per escrit eth produït d'ua [è] aubèrta (< Ě latina) deths produïts de longa davant consonanta (ī+ [w], L) : *mièu, Dièu*, per [míu, díu], mès *riu, fil* per [rrie , fyal], ètc.
- Era nòrma en usatge en Gasconha (en Biarn, mès que tot) non nòta eth dif-tong [yéu] que s'eras fòrmas en question e son estatisticament importantas. Qu'ei eth cas per un substantiu coma *hieu* < FIL(U), en Biarn, o per un advèrbi coma *atheu* (= *aquieu*) < ECCUM īBI, en Hauta Bigòrra.
- Anfin, coma ac avem dejà senhalat mès ensús, eras Nòmes Ortogràfiques n'arretién qu'eth aspèct puraments fonologic dera question, eras considera-cions etimologicas n'entrant cap en linha de compde.

| Etimon | Lengadocien | Gascon de França | Aranés |
|--------------------|---|---|--------------|
| ÆSTcUU | <i>estiu</i> | <i>estiu</i> | <i>estiu</i> |
| RĪUU | <i>riu</i> | <i>arriu</i> | <i>arriu</i> |
| ŪUU | <i>viu</i> | <i>viu</i> | <i>viu</i> |
| FĪLU | <i>fil per [fil, fiú, fyál, fyòl, fyél]</i> (era varianta [fil] de qui s'entén, per exemple, a Tolosa ma-deish, ei ultra-minoritària). | <i>hieu/hiu</i> | <i>hiu</i> |
| APRĪLE | <i>abril per [aβryèl, aβríu, aβryál, aβríl]</i> (era varianta [aβríl] de qui ei documentada pera vila de Tolosa qu'ei ultra-minor-itària). | <i>abriu</i> | <i>abriu</i> |
| *ECCU IBI | [X] | <i>aquiu</i> <i>atheu</i> (< <i>aquieu</i>) (Hauta Bigòrra) | <i>aquiu</i> |
| *ĚU < E(G)O | <i>ieu</i> | [X] | [X] |
| MĚU, *TĚU, *SĒU | <i>mièu, tièu, sièu</i> per [myèu/míu, tyèu/tíu, syèu/síu] | <i>mièu, tièu, sièu</i> (Coserans) | [X] |
| DĚU(S) | <i>Dieu</i> | Diu | Diu |

1. Eth tablèu següent, de qui auem establit, d'après eras dadas hornidas peth ALG , que balha ua aidea dera situacion de qui caracterisa era zòna pirenенca entorant era Val (arrebrembam que, peths parçans aranesi propiaments dits, eras localitats-temuenhs e son Casau, en Espanha; e Mètlas, en França) :

| | DĚU(S) | RĪUU | F LU |
|-------|--------|--------|-------|
| Casau | [díu] | [rríu] | [yéu] |

| | | | |
|----------------------|--------|----------|---------|
| Mètlas (31) | [díü] | [arríü] | [íü] |
| Banhèras (31) | [dyéü] | [arryéü] | [yéü] |
| Vath de Uelh (31) | [dyéü] | [arryéü] | [hyéü] |
| Barossa (65) | [díü] | [arríü] | [híü] |
| Arguenòs (31) | [díü] | [arríü] | [híü] |
| Sent Gaudenç (31) | [díüs] | [arryéü] | [íü] |
| Àrreu (Aura) (65) | [dyéü] | [arryéü] | [hyéü] |
| Tramasagaigas (Aura) | [dyéü] | [arryéü] | [híü] |
| Castilhon (09) | [díü] | [rríü] | [ahyéü] |
| Bathmala (09) | [díü] | [rríü] | [aihéü] |
| Con.hlenç (09) | [díü] | [rríü] | [yéü] |
| Aulús (09) | [díü] | [rríü] | [fyéü] |

Ja vedem qu'eth critèri etimologic ei, acitau, plaments pertinent, eth pòble de Casau comportant-se exactaments coma eras localitats coseranesas, de qui destrian claraments eth produït dera ï longa latina davant L deras au-tas fòrmas. A notar que se Mètlas e 'ra Barossa ac uniformizan tot en [íü] (que seria çò madeish per Canejan), eths parçans d'Aura e de Luishon, en contra, e generalizan eth trifong [yéü].

2. « Dins la màger part dei parlars occitans, ieu e iu se neutralizan en [iw], en [jew], en [i] ... La nòrma manten la diferéncia ortografica ieu ~ iu : Dieu, Andrieu, mieu, tieu, sieu vèrsus actiu, productiu, viu, viure.

Dins la practica, aquela distincion ieu ~ iu s'aplica ben en vivaroaupenc generau, en provençau generau, en niçard e en lengadocian. La practica esita mai en lemosin e en auvernhat. Lo principi es gaire seguit en gascon ont se nòta sovent iu.

En cisaupenc, un dilèma apareis : cau chausir la solucion normala (ieu ~ iu) o admetre una practica de tipe gascon (iu) que semblariá mai acceptabla ais usatgièrs locaus ? Es un ponch que lo cau tractar amb una granda prudència »... (Preconizacions : 2007, p.142, § 18.5).

1. 2. 3. 4. Proposicion

Dilhèu que per mès de coérència, ja seria bon de préner en compde, tot en un còp, eths critèris diacronics e 'ths critèris sincronics, en destriar, deth un costat, peth mèdi deth trifong **ieu** :

- eth frut de ï brèva latina davant U
- eth frut de ï longa latina davant L
- (e, ça'm par) eth frut de ï longa latina davant B.

E, deth aute, peth mèdi deth diftong **iu** :

- eth frut dera ï longa latina davant U.

Ce que, concretaments, abotiria ad aquerò :

| etimon | aranés | gascon de Fr. | lengadocian | Provençal* |
|-----------|-------------------|---------------|----------------|------------|
| DĚU(S) | *Dieu | Diu | Dieu | Diéu |
| ROMĚU | *romieu | romiu | romieu | roumiéu |
| FILU | *hieu | hieu ~ hiu | fial ~ fil | fiéu |
| *APRĪLIU | *abrieu | abriu | abrial ~ abril | abriéu |
| *ECCU ĪBI | aquiu ~ *aquieriu | aquiu ~ atheu | aquiu ~ [aquí] | [aqui] |
| *ECCE ĪBI | aciu ~ *acieu | aciu ~ acieu | [X] | [X] |
| RĪUU | arriu | arriu | riu | riau |
| UĪUU | viu | viu | viu | viéu |
| MOTĪUU | motiu | motiu | motiu | moutiéu |

(*) Eras fòrmas provençalas que son en grafia mistralenca.

1. 2. 3. Era diftongason de [ò] aubèrta (Ò brèva deth latin) en posicion endravada

Encara qu'eth tèxte deras Nòrmes n'i hècia pas expressaments allusion, que s'a pres er'abitud en Aran d'ortografiar [ywàs] < ÖSSU : **uàs** ; [ywart] < HÖRTU : **uart** e [ywèrði] < HORDEU : **uerdi**. En occitan « comun » : **òs, òrt, òrdi**. Encara qu'eth fenomène e sia beròi mes espandit en un dialècte lengadocian coma eth roërgat que non pas en aranés, era nòrma alibertina qu'ignòra, de faïçon testuda, era diftongason de [ò] aubèrta en posicion endravada. Que non la sanciona, donc, pas per escriut.

| Gramatica Occitana | Conselh de la Lenga Occitana |
|--|--|
| « Los parlars septentrionals tendon a diftongar ò obèrt en /uo/ – fr. ouo - : fòc, tòrt, ròda, mòl /fuoc, tuort, ruoda, muol, oquuo/. Roèrgue es lo mai afectat per aquel fenomèn. La grafia deu sevar ò. » (Part 1 ^{ra} , § 5) | « La prononciacion diftongada de ò en [wɔ̃ (wa, wɛ, we)], segon lei parlars, caracteriza lo provençau maritim, lo niçard e una part dau vivaroaupenc. Se rescontra tanben dins de parlars divèrs dau Massís Centrau. Per còntre s'aussí gaire dins la majoritat dei parlars provençaus rodanencs. Dins lei parlars coneissent aquela diftongason, lo fenomèn s'aplica a la granda majoritat dei mots. Aquela tendéncia a la sistematicitat fa qu'es comòde de gardar l'ortografia ò : sa prononciacion per defaut es lo diftong [wɔ̃ (wa, wɛ, we)] : pòrta, nòstre, còrda, pòrc, bòn, fònt, fòrt, sòm. » (Preconizacions, 1999 : p. 150, § 18.10.7.) |

1.2.4.1. Pichon estudi de dialectologia comparada

1. Eth tablèu següent de qui avem establitz a partir deras dadas contegudas en *Tresor dóu Felibrige de Mistral*, que permet de hèr-se ua prumèra idea dera

distribucion geografica – mès tanben dera gran varietat - de quauquas uas d'aqueras fòrmas diftongadas un shinhau pertot en País d'Òc. Per mès de legibilitat, que conservam era grafia felibrenca deth autor.

| Etimon | aranés | roërgat | daufinés | marselhés | niçard |
|--------|--------------|----------|------------------------|---------------|-----------|
| CHÖRDA | còrda | couordo | couardo | couerdo | [X] |
| FÖNTE | hònt | fouont | fouont~fouant | fouent | [X] |
| HÖRTU | uart | ouort | uert | ouert | ouort |
| MÖRTE | mòrt | mouort* | mouart | mouert ** | mouort ** |
| NÖSTĒR | nòste | nouostre | nastre < [nwástre] *** | nouestre | nouostre |
| HORDĒU | uerdi | ouòrdi | uerge | ouèrdi | uèrdi |
| ÖSSU | uàs | ouosse | òu **** | oués ~ ouesse | ouos |
| PÖRCU | pòrc | pouorc | pouarc~puerc | pouerc | pouorc |
| PÖRTA | pòrta | pouorto | pouarto | pouerto | pouorto |

(*) Lou Tresor que balha era madeisha fòrma : [mwért] tanben peth « dialècte deths Aups ».

(**) Lou Tresor que balha era madeisha fòrma : [mwòrt] tanben peths parçans deth Velai.

(***) Lou Tresor que balha era fòrma nouastre peth despartament deth Var (83).

(****) Lou Tresor que balha tanben era fòrma uèrgi peth « dialècte deths Aups » e 'ra fòrma ouèrdi en biarnés (ors en gascon).

(*****) Lou Tresor que balha eras fòrmas ouas, ouasse, peth despartament deth Var (83).

Ja's vei que, contrariaments a ce que s'a podut avançar, era diftongason de Ò en [wa], en aranés, n'a arren a veir dab un pretendut ispanisme. Qu'ei era manifestacion – aquerò, òc, isolada e pontuala - d'ua tendéncia de qui afècta, de hèit, ua gran part deth occitan. Ara, eth hèit que en aranés eth fenomèn non se manifeste qu'en estat embrionari, n'afèctant guaire, fin finala, que tres mots (**uart** + **uàs** + **uerdi**), justifica que l'au se sancione plan per escriut, ce que n'empedeish pas, plan solide, que s'admeta, parallelaments ad aqueras fòrmas propriaments localas, eras fòrmas primitivas e panoccitanas (**òrt** + **òs** + **òrdi**) de qui son en usatge, ath delà dera frontèra, en bathmalon e en luishónés, per exemple.

2. Eth segond tablèu, de qui complèta e precisa eth precedent, que temuenha dera complexitat deths hèits sus eth terrenh e dera importença d'un fenomène que, curiosaments, eths occitanistas e s'esfòrçan de minimisar, esconent-lo darrèr ua ortografia faussaments « englobanta ». Eras dadas – necessarialements fragmentàrias - que son extrèitas deras enquistas miadas sus eth terrenh, ath parat dera redaccion deths divèrsi atlasses lingüistics (eths produïts d'ua diftongason que son senhaladi en arroi)

| | ÖSSU | HÖRTU | HORDĚU | PÖRCU | PÖRTA |
|---|-------------------|---------|--------------|---------|----------|
| Aran | [ywás] | [ywart] | [gwèrδi] | [pòrk] | [pòrtα] |
| Mètla (31) | [òs]1 | [X] | [òrδi] (?) | [pòrk] | [pòrta] |
| Hauta Garona, Arièja Gascona (Castilhonés) | | | | | |
| Senta Fe (31) | [òs] ¹ | [òrt] | [òrδi] | [pòrk] | [pòrto] |
| Bathmala (09) | [òs] | [òrt] | [òrδi] | [pòr] | [pòrto] |
| Lavedan (Hauta Bigòrra) | | | | | |
| Barètja | [òs] | [X] | [owérδi] | [pòr] | [pòrtœ] |
| Gavarniá | [òs] | [X] | [wèrδi] | [pòr] | [pòrtœ] |
| Biarn (Baishas Perinèus) | | | | | |
| Anhòs | [òs] | [X] | [wèrδi] | [pòrk] | [pòrto] |
| Areta | [òs] | [X] | [wèrδi] | [pòrk] | [pòrto] |
| Vièla | [òs] | [X] | [wèrδi] | [por] | [pòrto] |
| La Seuva | [òs] | [X] | [wèrδi] | [pòrk] | [pòrto] |
| Navarrencts | [òs] | [X] | [wèrδi] | [pòrk] | [pwèrtə] |
| Nai | [òs] | [X] | [wèrδi] | [pòrk] | [pòrta] |
| Avairon (Roërgue) | | | | | |
| St Africa (12) | ? | [òrt] | ? | [pòrk] | [pòrto] |
| St German (12) | ? | [wòrt] | ? | [pwòrk] | [pwòrto] |
| St Sarnin (12) | ? | [òrt] | ? | [pòrk] | [pwòrto] |
| Veirau (12) | ? | [wòr] | ? | [pwòr] | [pwòrto] |
| Provençau Rodanenc & Maritime (Bouco-dóu-Rose, Vau-Cluso, Var) | | | | | |
| Z'Ais (13) | ? | ? | ? | [pwòR] | ? |
| Marsiho (13) | ? | ? | ? | [pwáR] | ? |
| Camprieu (30) | ? | [wòr] | ? | [pwòrk] | [pwòrto] |
| Ginolhac (30) | ? | [wòr] | ? | [pwòr] | [pwòrto] |
| Frèju (83) | ? | ? | ? | [pwáR] | ? |
| Z-Aups (83) | ? | ? | ? | [pwòR] | ? |
| Ate (84) | ? | ? | ? | [pwòR] | ? |
| Lo Lauset (84) | ? | [wèRt] | ? | ? | ? |

1 Era fòrma sense cap de diftongason, [òs] que s'arretròba a Canejan. Quant ara fòrma [òrt] de qui se mantén massissaments en Coserans vedin, qu'a fenit per esfaçar-se, en Bavartés coma en Baish Aran, ath profit dera fòrma concurrenta : **casau**. En latin, **CASALIS** que s'aplicava, plan solide, a tot ce que s'arreportava ara demora, **CASA**. Tan pè eth siègle VI^{au}, eth mot **cazal** que pren en occitan eth sens de « bastissa », ce que s'explica un toponime coma **Casau** (en Larbost e en Loron : [kaðáū]), en ancian gascon **Cazaux**. A partir d'atheu, eth mot que va coneïssher ua evolucion semantica divergente en foncion deras regions. En Catalonha, que pren un sens prestigiós pusque n'arriba a designar ua dinastia, ua « maison nòbla » : **el casal de Barcelona** ; en Lengadòc e en Provença, ath contrari, n'arre

| | | | | | |
|--|-------|--------|---------|---------|----------|
| Malaucèna (84) | ? | ? | ? | [pwáR] | ? |
| Gavouot/Provençal Alpenc (Aup de n-Auto Prouvèço, Àuteis-Aup, Aup Marítimo) | | | | | |
| Alòs (04) | ? | [wòRt] | ? | [pwáRk] | ? |
| Barciloneto | ? | [wòRt] | ? | [pwéRk] | ? |
| Abrièrs (05) | ? | [òRt] | ? | [pwéRk] | ? |
| Fraissiniera | ? | [wòRt] | ? | [pwéRk] | ? |
| Orsièra (05) | ? | [wòRt] | ? | [pwéRk] | ? |
| St Veran (05) | ? | [wèRt] | ? | [pwéRk] | ? |
| Escranhòla | ? | ? | ? | [pwòR] | ? |
| Liéusoulo (06) | ? | [wòRt] | ? | [pwòRk] | ? |
| Lo Puget (06) | [wòs] | [wòrt] | [üèrdi] | [pwòRk] | [pwòRto] |
| Nissart/Niçard (Aup Marítimo) | | | | | |
| Nissa (06) | ? | [wòRt] | ? | [pwáRk] | ? |
| Vivarés (Ardescha) | | | | | |
| Beulòc (07) | ? | ? | ? | [pwòR] | [pwòRto] |
| Gravièira (07) | ? | [wòR] | ? | [pwòR] | [pwòRto] |
| Provençau Dromenc (Droumo) | | | | | |
| Glandatge (26) | ? | [wòRt] | ? | ? | ? |
| Sederon (26) | ? | ? | ? | [pwòR] | ? |
| Suza (26) | ? | ? | ? | [pwáR] | ? |
| Vaudroma (26) | ? | ? | ? | [pwéRk] | ? |

1.2.3.2. Eth cas deth nissart/niçard : un precedent ena matèria

Ja's sap qu'ena lenga nissarda/en dialècte niçard (Alps Marini), era Œ brèva deth latin, en posicion endravada aboteish o ben a [wa] (coma en aranés), o ben a [wò] : PÖRTA > [pwáRta] ~ [pwòRta]. Qu'ei interessent d'observar que, locala-ments, tres grafias distintas e's hèn concurréncia :

- era grafia dita « mistralenca » o « felibrenca », de qui pren en compde eth fenomène de diftongason
- e duas grafias d'obediença « occitana » :

a/ era grafia elaborada peth lingüista niçard Reinat Tosacano, de qui ten comp-de dera diftongason

b/ era grafia deth IEO de qui, coma ac avem dejà senhalat, e l'ignòra.

| | ÖSSU | HÖRTU | PÖRCU | PÖRTA |
|---------------------|------|-------|--------|---------|
| Grafia Mistralen-ca | ouòs | ouòrt | pouòrc | pouòrta |

| | | | | |
|----------------|-----|------|-------|--------|
| Reinat Toscano | oàs | oart | poarc | poarta |
| IEO | òs | òrt | pòrc | pòrta |

A notar que Reinat Toscano a causit d'arrepresentar eth diftong [wá] per /oa/ (=oart), mentre qu'era grafia en usatge en Aran l'au nòta /ua/ : *uart*. Mès, quin se volha que sia, era grafia elaborada per Reinat Toscano entath niçard be constitueish un precedent entath aranés.

1. 2. 4. Era grafia de *pòur* < PAUORE

Eth antic *lemozí* (ancian provençau) ***paor*** < latin PAUORE qu'aboteish un shinhau pertot en occitan modèrne a [pòw] [mèsa [po] en Lemosin, [pò] en Peirigòrd, [páua] a Castelar (mentonasc) e [páúR] a Sospèl (roiasc)]. En Aran, mès tanben, pontualaments en Bigòrra (Hautas Perinèus), era necessitat de destriar claraments eth diftong [aú] (« un pau », « era vila de Pau », ètc) deth diftong [òú] explica que s'aja privilegiat mès lèu era grafia « fonetica » : ***pòur***. Era nòrma alibertina qu'arrecomanda neaumens d'arrestablir per escrit eth diftong /au/ (= *paur*) de qui perdura localaments (vej. ací dessús a Sospèl) e de qui s'arretròba en eths derivats (***pauruc***, ***espaurir***, ***espaurider***, ètc).

Nòrmes Ortogràfiques der Aranés

« Quan ua vocau ei seguida des semiconsonantas se formen es diftongs descreixents (...) : **òu** : *pòur*. » (§ 8, 1999).

Gramatica Occitana (Alibèrt)

« Au (fr. *aou*) es notat **au** : *auja*, *autre*, *daura*, *saur* (...) Au s'assordís en òu dins *paur* (*pòu*)... » (1èra part, § 8).

Preconizacions del Conselh de la Lenga Occitana (2007)

« Lo mot emblematic (e relativament isolat) qu'Alibèrt nòta *paur* coneis la realizacion immensament majoritària ['pɔw]. Sa forma primièra èra *paor* [pa'ur] dins la lenga classica.

Lo Clo confirma l'ortografia ***paur*** ['pɔw] e reconeis la varianta *paor* [pa'ur] que s'es mantenguda dins certans parlars. La màger rason es de borrolar pas la nòrma ja fixada.

Prenent en consideracion d'autras fòrmas vesinas, se recomanda las ortografias seguentas (la pronòncia indicada es la de l'occitan lengadocian per defaut) :

paur (varianta *paor*) [**p w**]. Lo vivaroalpenc pòt preferir *paur* o *paor* coma formes referencialas : lo primièr pausa una coeréncia entre los diferents dialèctes, lo segond una coeréncia dintre lo vivaroalpenc. » (9. 3., p. 49).

1.3 Eras consonantas

1.3.1. Era grafia deth « uau » : *auer ~ aver*, ètc

D'acòrd dab eth tèxte deras Nòrmes Ortogràfiques, a ua **-u-** entervocalica, en aranés « comun », que correspón un **-v-** baish entervocalic en « pujolenc » (aranés de Pujòlo) : **auer ~ aver** < HABERE, **lauar ~ larvar** < LAUĀRE, ètc. Contrariaments a ce que sembla, en gascon de França tanben, amduas grafias que son, de Dempús tostem, consideradas coma igualments corrèctas pera nòrma oficiala deth IEO. Mès, ena practica, era pression egemonica exercida, d'un costat peth lengadocian, deth aute costat, peth biarnés – duas varietats deras lenguas d'òc a on eth [β] bilabiau e's mantén sense cap de cambiament : [aβé], [laβá] -, qu'a fenit per imposar, pertot capvath era Gasconha, eth emplec dera grafia **-v-**, considerada coma mès « englobanta ». Eth passatge de [β] a [w] non n'arrepresenta pas mens era solucion era mès tipicaments *gascona* (ath madeish títol qu'eth passatge de F > /h/, de -LL a /t/, ètc), eth manten de [β] bilabiau constituïnt, deth sòn costat, ua arcaisme de qui non s'arrencontra qu'en contact deths parçans lengadocians (eth long dera ribèra dera Garona) e enas regions eras mes estremadas (eth Biarn, eras Lanas, d'aubuas valeas de hauta montanha). De u'aute costat, eth usatge dera grafia **-u-** qu'auhareish eth avantatge non negligible de destriar netaments eths mots a on eth **-v-** « biarnés » e correspón a [w] de toti eths mots a on eth **-v-** entervocalic e s'a efectivaments a prononciar pertot en Gasconha, [β] : **avesque** < EPISCÓPU, **avisar-se** < SĒ AD *UÍSARE, **devath** < DE VALLE, **divés** < DIE UE(N)ERIS, ètc, ètc. Eth lingüista d'origina lomanhòla, Jacme Taupiac, que batalha, de Dempús bèths dias-a, entà que eths dialèctes gascons concernits (era gran majoritat, de hèit) e tornen a adoptar era grafia **-u-** entà notar eth « uau », coma ac hèn dejà eths Aranesi.

Nòrmes Ortogràfiques

- « **u** entre vocaus a un son consonantic corresponent ath signe [w] : *escriuer, víuer, parlaua*. En Pujòlo, a on se pronócie coma **b** [β], se pòt escriuer **v** : *escriver, vivér, parlava* » (1999 : § 10).

Nòrma alibertina

- « Quand lo son *b* proven d'un *v* o d'un *b* intervocalic latins es representat per *v* segon l'usança de l'anciana lenga d'Òc, del provença, d'una part del lengadocian oriental (cevenòl e montpelhierenc de Lunèl) e duna part del catalan : *vida, malva, fava, caval, donava /bido, malbo, fabo, cabal, dunabo/* » (GramaticaOccitana, 1^{ra} part, § 31)
- « V persistís sinon que dins la part orientala del montpelhierenc (Lansargues, Lunèl) e cevenòl ; pertot alhors s'es trasmutat en *b* bilabial non explosiu (*b* del catalan e de l'espanhòl). Aquel *v* correspond a un *v* latin o a un *b* latin inervocalic. La grafia literària deu restablir lo *v* roman dins tots los mots de formacion populara (...) Dins la grafia d'Estiu-Perbòsc, lo son *b* es notat d'après l'etimologia latina : **VIVU**, *viu*, **FABA**, *faba*. Aquel procediment es en contradiccion amb l'evolucion fonética de la lenga d'Òc e amb los divèrses parlars o dialèctes qu'an servat lo son *v* » (GramaticaOccitana, 1^{ra} part, § 33).

- « **v** sera maintenu comme dans la langue classique, le provençal, le limousin, le catalan et les autres parlers modernes qui l'ont conservé, pour noter le **v** latin en toutes positions et le **b** latin entre voyelles : *vin, sàlvia, malva, nòva, auriva, sòlvre, fava, caval, donava, cadavre*. Ce son est généralement passé au **b** dans la plus grande partie des parlers d'Oc. » (Réforme, IEO : 1950).
- « Le **b** provenant d'un **v** latin en toutes positions ou d'un **b** latin intervocalique sera représenté par **v** : *vaca, vin, votz, sàuvia, mauv, sauv, cauv, ne'us* [< ne + vos], *vrèspe, cadavre, vrenha, cavat, anava, hava*. Dans les parlers où le **b** et le **v** latins intervocaliques aboutissent à **u** (*w* semi-consonne), au lieu de **v**, on admettra les doubles graphies : *víver ou víuer, déver ou déuer, dava ou daua, ivèrn ou iuèrn*. » (Application, IEO : 1951) ;
- « On écrit U à la place de V si l'on entend /w/ : *auèui ou avèvi, la cava ou la cava*. La graphie englobante mais peu pratique V, aussi bien pour /b/ que pour /w/ est encore en usage : *la cava /la kawò/ ne se confond pas dans la prononciation avec l'acaba /l'akaβò/ dans bien des parlers gascons.* » (Teulat : 1985, p. 13, § 4.3.5.).
- « Parièr, la *u* entre doas vocalas se pronóncia [w]. Es una semiconsonanta que funciona coma una consonanta. Aquò fa tombar l'accent tonic subre l'avantavantdarríera vocala : en niçard *cawa* ['kawa] (per *causa*) (fòrma similara a *cala*) ; dins certans parlars gascons *parlqua, sentiua* [par'lwɔ, sen'tiwi] que podèm escriure tanben *parlava, sentiva*. » (Preconizacions : 2007, p. 30, § 2.4.1.b).

Ce que ditz Jacme Taupiac

« En occitan de Gasconha i a un fenomèn fonetic qu'es plan conegut : çò que dins l'ensemble de la Gasconha se ditz /la hawò/, /kantawò/, /awansa/ se ditz /la haβò/, /kantaβò/, /aβansa/ dins una zòna que s'espandís sus tota la partida occitana dels Pirenèus Atlantics, lo sud-oèst dels Nauts Pirenèus e lo sud-èst de las Landas (carta 275 de l'Atlàs Lingüistic de Gasconha). A un oau dins los parlars del nòrd e de l'èst correspond un *b* afllaquit (β) dins los parlars gascons del sud-oèst.

Naturalament, tot occitanista pensa sul pic a la grafia meravilhosament englobanta que consistís a emplegar lo grafèma *v*, çò que fa qu'escrivèm parièrament *avançar* :

- l'occitan gascon /awansa/ o /aβansa/
- l'occitan lengadocian /aβansa/
- e l'occitan provençal /avansa/

Sufís de precisar cada còp una clau diferenta de correspondéncia entre grafia e fonia. Pel gascon, sufís de dire : cada còp qu'i a *v* intervocalic aquò correspond a un oau (w).

Malurosament, una analisi un pauc mai aprigondida nos mena a de conclusions differentas. Es totalament fals de dire que dins lo gascon de l'Armanhac, de Lomanha o del Savés, a tot *v* intervocalic correspond un oau. Es longa la lista dels mots ont a un *v* intervocalic correspond un *b* afllaquit exactament coma en lengadocian : *l'avesque, l'avescat, devisar, auer devisèra (...), l'aventura, devinar, un devinaire, la devacion, la diversitat, se revirar, la navigacion, alavetz, la civilisacion, etc.* » (Normalisacion grafica e normalisacion lingüistica : 1984, pp. 36-37).

1. Eth iat de qui podem constatar ací entre eras preconizacions d'Alibèrt de qui se'n ten a ua grafia coma **cantava** (< deth latin CANTABAM), e 'ra causida de qui s'a hèit, en aranés, de privilegiar mès lèu era grafia **cantaua**, non hè qu'arrebàter era evoluciōn divergente deths dialèctes lengadocians per rapòrt aths dialèctes gascons. Encara

un còp, eth pas de -U- e -B- entervocalics a [w] que constitueish un trèit distintiu – e quitaments, constitutiu – deth gascon.

2. Se i-a divergència dab eth tèxte fondator qu'ei era *Gramatica Occitana d'Alibèrt* (de qui, insistim, non pertocava cap eth gascon), non n'i-a bric, en contra, dab er'aplicacion de qui se n'a hèit entath gascon. D'aqueth punt de vista, que podem considerar, tan plan, qu'era Val d'Aran ei *en avança* sus eths auti parçans gascons e qu'eras Nòrmes Ortogràfiques aplican mès fidelaments eras resolucions de qui s'a adoptat en IEO que non ac hèn ath delà dera frontèra, a on an prevalut abituds localistas e mès precisaments, bearnocentristas.

3. Eth hèit de privilegiar, en un amiroament gascon, era grafia *u*, n'empacha cap, plan segur, d'arrecòrrer, eth cas escadent, ara grafia « pujolència », en *v*, entaths tèxtes de qui ajan ua vocacion mès lèu panoccitana.

4. Eth tablèu següent que balha, per tres mots, bèra aidèa dera situacion generala en gascon e en lengadocien. Hònt : ALG, ALLOr.

| | HIBÉRNU | CLĀUĀRE | DE (+ AD) + UALLE + ĀRE |
|-------------------------|---------|-------------|-------------------------|
| Casau (Aran) (gasc) | [iwèr] | [klawá] (?) | [X] |
| Mètla (31) (gasc) | [iwèr] | [klawá] | ? |
| Luishon (31) (gasc) | [iwèr] | [klawá] | [deβará] |
| Barossa (65) (gasc) | [iwèr] | [klawá] | [dəβərá] |
| Arguenòs (31) (gasc) | [iwèr] | [klawá] | [dawará] ~ [dewará] |
| St Gaudenç (31) (gasc) | [iwèr] | [klawá] (?) | [deβará] |
| Carbona (31) (gasc) | [iwèr] | ? | [deβará] |
| Selh (31) | [iβèr] | [klaβá] | ? |
| Senta Fe (31) | [iβèr] | [klaβá] | [deβalá] |
| Tolosa (31) | [iβèr] | [klaβá] | ? |
| Castilhonés (09) (gasc) | [iwèr] | [klawá] | [dəwará] |
| Bathmala (09) (gasc) | [iwèr] | [klawá] | [dəwará] |
| Con.hlenç (09) (gasc) | [iβèr] | [klaβá] | [deβará] |
| Garbet (09) (gasc) | [iβèr] | [klaβá] | ? |
| Massadèl (09) | [iβèr] | [klaβá] | [deβará] |
| Seronés (09) | [iβèr] | [klaβá] | [deβará] |
| Savardun (09) (fois) | [iβèrt] | [klaβá] | ? |
| Saurat (09) (fois) | [œβèr] | [klaβá] | [deβalá] |
| Aura (65) (gasc) | [iwèr] | [klawá] | [deβará] |
| Haut Ador (65) (gasc) | [iwèr] | [klawá] | [daβará] ~ [deβará] |
| Tarba (65) (gasc) | [iwèr] | [klawá] | [deβará] |

| | | | |
|------------------------|---------|-------------------|---------------------|
| Còstas (65) (gasc) | [iwar] | [klawá] | [deβará] |
| Lorda (65) (gasc) * | [iwar] | ? | [deβará] |
| Lavedan (65) (gasc) | [ibér] | [klaβá] ~ [klawá] | [daβará] ~ [deβará] |
| Gèrs (32) (gasc) | [iwar] | [klawá] | [deβará] |
| Biarn (64) (br) | [ibér] | [klaβá] | [deβará] |
| Baish Ador (64) (gasc) | [klaβá] | [klaβá] | [dəβará] |
| Urt (64) (gasc) | [klaβá] | [klawá] | [dəβará] |
| Biscaròssa (40) (gasc) | [iwar] | [klawá] | ? |
| Mamisan (40) (gasc) | [iwern] | [klawá] | ? |
| Sabres (40) (gasc) | [iwern] | [klawá] | [draβá] |
| Labrit (40) (gasc) | [iwar] | [klawá] | ? |
| Tarnòs (40) (gasc) | [ibér] | [klaβá] | ? |
| Aira (40) (gasc) | [ibér] | [klaβá] | [deβará] |
| La Tèsta (33) (gasc) | [iwern] | [klawá] | [draβá] (?) |
| St Mevian (33) (gasc) | [ibér] | ? | [draβá] (?) |
| Mesin (47) (gasc) | [iwar] | [klawá] | [deβará] |
| Puègmiròl (47) | [ibér] | [klaβá] | ? |
| Baumont (42) (gasc) | [iwar] | [klawá] (?) | [deβará] |
| Moissac (82) (lg) | [ibér] | [klaβá] | ? |
| Aude (11) (lg) | ? | [klaβá] | ? |
| Avairon (12) (lg) | ? | [klaβá] | ? |

(*) gasc : gascon ~ lg : lengadocian ~ br : biarnés ~ fois : foishenc/foissenc

Coma se pòt constatar, n'eth cas d'ua fòrma compausada coma *DE UALL(E) + -ĀRE, er'anciana U iniciala latina que mantén, en generau, eth sòn son bilabieu primitiu : [deβará].

1.3.2. Eth [] gessit de C +E,I, TI latins : díder, podom, ètc

Qu'eth son [z] arremonte, en latin, a ua -S- entervocalica, a C + E,I, TI o -D- entervocalic, era grafia alibertina, d'acòrd dab er'evolucion fonetica deths dialèctes lengadocians, l'au nòta uniformaments **s** : ròsa < ROSA, vesina < UÍCÍNA, plaser < PLACĒRE, poson < POTIŌNE, véser (dial.) < UÍDĒRE. Quan C + I,E latins aboteishen localaments a [s], era grafia alibertina qu'admet era dobla grafia **s/c** : ausèl/aucèl < *AUICELLU. Era nòrma en usatge en Biarn, a on -S- entervocalica, C+E,I e TI latins aboteishen pascihaments a [Z] que se'n ten tanben ara solucion en **s**: arròsa, vesia, plaser, ausèth, poson. Quan eth -D- entervocalic latin e's mantén sense cap de cambiament qu'admet era dobla grafia **s/d** : véser/véder, créser/créder < CRĒDĒRE, càser/càder < *CADĒRE. Eras Nòrmes Ortogràfiques que segueishen era madeisha rèula : ròsa, vesia, plaser, mès : vedie <

UIDĒ(B)AT, ètc. Ara, quan -S- entervocalica o C + E, I latins aboteishen a /ð/, d'acòrd dab de vielhas tendéncias evolutivas localas, que'n tién compde dera madeisha manièra en substituir un **d** ara **s** de qui caracterisa era màger part deth dialèctes occitans : *ceridèr* < CERĒSIARIU, *díder* < DICĒRE, *podom* < POTIŌNE per *cereisièr/cerisèr*, *dísér*, *poison/poson*.

Nòrmes Ortogràfiques

- « **d** se pronóncie [d] [ð] entre vocaus : **daurir, cede** » (1999 : § 17.)

Eth tèxte deras Nòrmes non hè qu'abordar indirectaments eth problema en balhar, totun, coma exemple dera prononciacion de [ð] entervocalic eth mot **cede**, de qui, d'acòrd dab er'etimologia latina (< CICĒRE) e poderíam tanben escrivèr **céder**. En occitan centrau : **cese, cese becut, ceseron**. En biarnés : [séze] (= **césèr**).

Gramatica Occitana

Preconizacions deth CLO

- « Z intervocalic es notat **s** : *mesa, ròsa, véser, presa, maison.* » (1^{ra} part, § 37).
- « Lo son s sorda derivant de ci, ti, chi, c + e, i latins es grafiat **c** davant e, i ; davant a, o, u, cal emplegar **ç** : *cèl, cilha, placi, plaças, bracejar, nonciar, cançon, plasença, braç, glaç, eficaç, velòç.* » (1^{ra} part, § 36).

- « Qualques parlars fòrça locals, dintre lo cisalpenc del nòrd e lo gascon pirenenc, an conservadas las oposicions fonologicas ancianas /s/ ~ /θ/, /z/ ~ /ð/. Dins la transcripcion precisa d'aqueles parlars, es admés de notar /θ/ → c/ç, /ð/ → z : *besson* (localament *beçon*), *grandàs* (localament *grandaç*), *cosina* (localament *cozina*). Mas dins los parlars gascons concernits, [ð] intervocalica se pòt notar d puslèu que z : *cosina* (localament *codina* puslèu que *cozina*). » (*L'ortografia del son [z] e l'emplec de las letras z e s*, p. 40, § 5.1).

1. Contrariaments a ce que leisharia pensar eth comentari de qui accompanha eth pas-satge dera Preconizacions aquiu-dessús, s'ei vertat qu'era distincion entre /s/ e /θ/ ja non subsisteish que de faïçon residuala a Bathmala, en Castilhonés (09), era distincion entre /z/ e /ð/ , en contra, e pertòca, un territòri beròi mès espandit, de qui comprén, oltra era Val d'Aran e'th Bavartés, tot eth arrestant deth Haut Comenge, eth Castilhonés, en Arièja (09), eth Medòc, en Gironda (33) e 'ra Gran Lana (Sabras) en despartament deth madeish nòm (40). Ad aquera prumèra zòna, que se n'i horneish ua segonda a on eth produït de S entervocalica latina a fenit per arrejuénher eth produït de C + E, I e TI latins (ECCLESIA > [glèiðo] per *glèisa*), dab eth Larbost e 'ra Vath de Uelh, en Luishonés (31) e 'ra Vath d'Aura, eth Loron, eth Manhoac, eths parçans de Tornai, de Poiastruc e, de faïçon generala, era periferia nòrd de Tarba (Bordèras, Orleish, ètc), enas Hautas Perinèus (65). Se hèm abstraccion deth despartament deth Gèrs (32) de qui ignòra completaments eth fenomène, que s'ageish, donc, d'un deths soli trèits, dilhèu, de qui opause vertaderaments eth « *gascon* » propiaments dit ath « *biarnés* » (e aths dialèctes tanhents : baionés, lavedanés, azuèr, gascon de Shalòssa, ètc). Que s'ageish tanben d'un deths grani critèris oposicionaus entre ce qu'ei permetut de considerar coma un *gascon* « *ga-ronés* » e 'th *gascon aturenc* (eth *gascon* deths païses der'Ador), ad aqueth detalh pròishi que des deth Manhoac estant, eth fenomène e s'ei exportat dinc en Bigòrra.

| | *AUICELLU | CICERE | *CÒCINA | *UÏCINU | CASA | MANSIONE |
|-------------|-------------|--------|----------|---------|------|----------|
| Aranés | audèth | cede | codina * | vesin | casa | [X] |
| Alibèrt | ausèl~aucèl | ceße | cosina | vesin | casa | maison |
| Biarnés | ausèth | césér | cosina | vesin | casa | maison |
| Proposicion | *auzèl | *cézer | *cozina | *vezin | casa | maison |

Haut Comenge [31] (era Barossa que hè partida deras Hautas Perinèus)

| | | | | | | |
|--------------|----------|--------|----------|---------|--------|---------|
| Mètla | [aŭðètš] | [séðe] | [kuðína] | [beðíŋ] | [káza] | [mažúŋ] |
| Banhèras | [aŭðètš] | [séðe] | [kuzíno] | [bezíŋ] | [kázo] | [mažúŋ] |
| Vath de Uelh | [aŭðètš] | [séðe] | [kuðína] | [beðíŋ] | [káða] | [mažúŋ] |
| Barossa | [aŭðètš] | [séðe] | [kuðínœ] | [beðíŋ] | [kázœ] | [mažúŋ] |
| Arguenòs | [aŭðètš] | [séðe] | [kuðíno] | [beðíŋ] | [kázo] | [mažúŋ] |
| St Gaudenç | [aŭðèt] | [séðe] | [kuzíno] | [bezíŋ] | [kázo] | [mažúŋ] |

Castilhonés (Arièja Gascona) [09]

| | | | | | | |
|-----------|----------|--------|----------|--------|--------|--------|
| Castilhon | [aŭðètš] | [séðe] | [kuzíno] | [bezí] | [kázo] | [mažú] |
| Bathmala | [aŭðètš] | [θéðe] | [kuðíno] | [beðí] | [kázo] | ? |

Hautas Perinèus (Quate Vaths, Bigòrra) [65]

| | | | | | | |
|-----------|---------|---------|----------|--------|--------|--------|
| Àrreu | [aŭðèt] | [séðe] | [kuðíno] | [beðí] | [káðo] | [mažú] |
| Galan | [aŭðèt] | [séðe] | [kuðíno] | [beðí] | [káðo] | [mažú] |
| Tria | [aŭðèt] | [séðe] | [kuzíno] | [bezí] | [kázo] | [mažú] |
| Marselhan | [aŭðèt] | [sédye] | [kuðíno] | [beðí] | [káðo] | [mažú] |
| Bòrdas | [aŭðèt] | [séðe] | [kuðíno] | [beðí] | [káðo] | [mažú] |

Gironda (Medòc, Bordalés) [33]

| | | | | | | |
|------------|---------|---|----------|---------|---|--------|
| Castèlnau | [aŭðèt] | ? | [kuðínə] | [bizí] | ? | ? |
| La Canau | [aŭðèt] | ? | [kuðínə] | [bəzí] | ? | ? |
| La Sauva | [aŭðèt] | ? | [kuðínə] | [bəzí] | ? | ? |
| La Tèsta | [aŭðèt] | ? | [kuðínə] | [bəzíŋ] | ? | ? |
| Peçac | [aŭðèt] | ? | [kuðínə] | [bəzí] | ? | ? |
| St Mevian | [aŭðèt] | ? | [kuðínə] | [bəzí] | ? | ? |
| St Sefrian | [aŭzèt] | ? | [kuðínə] | [bəzí] | ? | [mežú] |

Lanas (País de Bòrn, Gran Lana) [40]

| | | | | | | |
|------------|-------------|---|----------|---------|--------|---------|
| Biscaròssa | [aút'èt] ** | ? | [kuðínə] | [bəzíŋ] | ? | [mažúŋ] |
| Moustey | [aút'èt] | ? | [kuðínə] | [bəzíŋ] | ? | [mežúŋ] |
| Parentias | [aút'èt] | ? | [kuðínə] | [bəzíŋ] | [kázi] | [mežúŋ] |
| Sabras | [oút'èt] | ? | [kuzína] | [bəzíŋ] | [kázə] | [mežúŋ] |

(*) Que balham atheu era fòrma de qui pod-òm agüeitar coma panaranesa. En sòn **Pichon Diccionari** quadrlingüe, Frederic Vergés que balha tanben era varianta *cosina*, en precisar, totun, que n'ei pas en usatge ena Val (dV). Ja's sap, en oltra, qu'eth dialècte de Pujòlo e coneish era fòrma [kwéino] (= *era cueina*), a on d'aubuns especialistas an avut lèu hèit de veir ua fòrma catalanizada o s'òm vòu, ua fòrma de transicion tà cap ath catalan. Admetem. Que harèi, neaumens, duas observacions :

1/ era diftongason de Ò brèva latina, abotissent ara creacion d'un trifong semblant ath de *trueita* < TRŪCTA, per exemple, e senhala, d'aviada, era fòrma aquera coma occitana 2/ eth tractament aqueth (per amudiment dera enterdentala : *CŌCĪNA > [koθīna] > [kōīna] > [kwēīno]) que s'arretroba aulhors en tèrra d'Òc, a Nissa (Alps Marini), notadaments, a on « codina, codinar, codinèr, codinèra » e's diden, arrespectivament : *couīna* [= kūīnal], *couīnà*, *couīnié*, *couīnièra* (grafia niçarda).

(**) Fauta de miélor, era ortografia d'usatge pera fòrma landesa aquera qu'ei : *auchèth*. Tant auria valut, ça'm par, escrivé : **aughèth*.

Que's pòt observar que, enas zònas a on C + E/I, TI, latins aboteishen normalments a [ð], era pression exercida peths dialèctes amiroants a hèit qu'era solucion panoccitana en [z] a, totun, fenit per imposar-se per uns quanti mots coma, per exemple, *vesin* < UÏCÎNU o *cosina* < CŎCÎNA. Qu'ei eth cas, en Aran, entaths mots següents : *plaser* < PLACĒRE, *rason* < RATIONE, *sason* < SATIÔNE, *vesin* < UÏCÎNU, *vesia* < UÏCÎ(N)A, en lòc deras fòrmas etimologicaments « corregudas » que serian *plader*, *arradon*, *sadon*, *vedin*, *vedia*.

2. En eths mots [éra seriðə, et seriðə] (= *era cerida*, eth *ceridèr*), deth latin *CERĒSĒA per CERASĒA, *CERĒSĒARIU, qu'ei, ath contrari, era preséncia d'un [ð] (arremontant a ua -S- entervocalica latina), de qui a quauqu'arren de bèth shinhau insolit. Qu'òm a, naturalments, tendéncia a veger-i ua reminiscéncia deth fenomène de qui, en eths parçans vedins deth Larbost e dera Vath de Uelh (Haut Luishonés), e hè a passar tota -S- entervocalica latina o pòc se'n manca a [ð] : *eth cadas dera glèida*, *a cada nòsta*, *uá maidon*, eths *Larbostedi*, eths *Aranedi* ; *er'arròda*, eth *arrodèr*, deth latin RÖSA, ROSARIU, ce que ne hè d'arrigorosi omofònes de *arròda* < RÖTA, *arrodèr* < ROTARIU e explica, ça'm par, eth arremplaçament *d'arrodèr*, dab eth sentit de « hustèr, fabricant de cars », peth galicisme **charron*, ètc. Mès, er'evolucion deths mots « cerida », *ceridèr* » a balhat lòc a ua tala profusion de fòrmas en occitan, que no'n podem cap èster segurs. Quin se volha que sia, d'acòrd dab er'etimologia, eras fòrmas « arrestituïdas » qu'aurian a èster **cerisa*, **cerisèr*.

Nòrma escriuta en usatge

| Lenguas d'Òc/Dialèctes occitans | CERĒSĒA | CERĒSĒARIU |
|---------------------------------|-----------------------------------|--|
| Aranés | <i>cerida</i> | <i>ceridèr</i> |
| Alibèrt | <i>cerièra</i> | <i>cerièr</i> |
| Biarés | <i>cerisa</i> | <i>cerisèr</i> |
| Prouvençau (mistralenc) | <i>cerèio</i> ~ <i>cerieso</i> | <i>cerié</i> ~ <i>cereisié</i> |
| (Baish) Provençau (normalisat) | <i>ceriesa</i> | <i>ceresier</i> |
| Nissart (grafia felibrenca) | <i>cerièia</i> | <i>cerié</i> |
| Rodanenc (Tresor) | <i>cerièiso</i> ~ <i>ceièiso</i> | <i>ceresié</i> ~ <i>cerisié</i> |
| Maritime (Tresòr) | <i>cerèio</i> | <i>cereié</i> |
| Lengadocian (Tresòr) | <i>cerièiro</i> ~ <i>cirièiro</i> | <i>cer[i]eiriè</i> ~ <i>ceriè[is]</i> ~ <i>ciriè</i> |

| | | |
|------------------------------|-----------------------------|--------------------------------|
| Roërgat (Tresòr) | celièio ~ ceièio | cirèch ~ celiès ~ ceiès |
| Lemosin (Tresòr) | cirèijo ~ cerièijo | cireigié |
| Daufinés (Tresòr) | cirèisi | cereiriè ~ cerieiriè ~ cir[i]è |
| Velai (Tresòr) | celèiro | celeriè |
| Gascon (Tresòr) | ceriso ~ cerijo | cerigè ~ ceridè ~ ceri |
| Provençau Alpin | ceriesa ~ ceriera ~ coriesa | cerier ~ cereisier |
| Occitan Cisalpenc (Itàlia) | cerieisa | ? |
| Guardiòl (La Gàrdia, Itàlia) | cereisa | cereisier |
| Velai | cerèisa | cereisier |

Tractament dera -S- latina entervocalica (còdi de color) :

- -S- > [θ]
- -S- > [z]
- -S- > [r] ~ [ž] (autas solucions)
- -S- > [ø] (amudiment)

3. Qu'ei interessent d'arrebrembar que, encara qu'eras circonstàncias n'ajan finalaments descidat autaments, eras totas prumèras disposicions presas en mestior de gascon escriut e condamnavan fermaments eth hèit que's podesse sancionar per escriut eth passatge de -S-, C + E, I, TI latins a [θ]. Era practica dera lengua escriuta qu'aurà doncas fenit per aver fòrça de lei.

L'Application de la Réforme Linguistique Occitane au Gascon (1951)

- « s sonore est représenté par **s** entre voyelles : *arròsa, mesa, pesar, arrasim, crosar, causa, presar*. Cependant, quand le s sonore provient d'un **d** latin intervocalique, on admettra, selon les dialectes, **d** et **s** : *vadut* et *vasut* ; *hòder* et *hòser* ; *créder* et *créser*. En aucun cas, le **d** ne sera admis pour représenter le son issu de s, c, ti latins, bien que quelques parlers le connaissent. » [Vej. atheu dessús eth cas de *cerida*, *ceridèr*]
- « En revanche, en présence de divergences résultant d'accidents linguistiques divers, on choisira, autant que possible, pour l'usage littéraire, les formes les plus conformes à l'évolutions normale de la langue [????] et les mieux conservées : **s** au lieu de **d** : *arrasim, ausèth* et non *arradim, audèth* ; *glèisa* et non *glèida* ».

4. Eth aranés, d'aulhors, n'ei pas eth prumèr dialècte gascon a aver enfranhut, sus aqueth punt, era rèula primitivaments edictada peth IEO. Que i-avec un precedent dab eth famós *parlar negue* dera Gran Lana qu'eth folklorista, Félix Arnaudin (1844-1921), bèth prumèr, e 'th poëta e romancièr, Bernat Manciet (1923-2005), en un segond temps, an contribuit a hauçar ath nivèu d'ua lengua literària. Mès, se, en aranés, eth passatge de C + E, I, TI latins a [θ] e pòt èster considerat - en dehòra, plan solide, deras ipècorreccions de qui avem dejà senhalat mès ensús - coma ua tendéncia

generala, en gascon *negue*, en contra, eth fenomène n'afècta guaire, curiosaments, qu'era conjugason de dus vèrbes corrents : *díder* e *har* (= *hèr*). De tant qu'eras fòrmas aqueras apareishen coma eths darrèri vestigis d'ua tendéncia d'auti còps mès espandida mès de qui, sos era pression normalisatritz, segurament, deths dialèctes vedins, a fenit per hèr arrepè (vej. eth tablèu de qui balham en # 1), non subsistint mès que laguens era conjugason, a on èra mès malaisit de prener-ne consciéncia e doncas, d'autocorregir-se. Eth tablèu de qui segueish que permet de comparar eras fòrmas en usatge en Aran dab eras de qui se pòt trobar per escript enas publicacions en gascon *negue*.

| LATIN | Aranés | Gran Lana | |
|------------|-----------|-----------|-----------|
| | | Arnaudin | Manciet |
| DÍCERE | díder | díder | díder |
| DÍCÉBAM | didia | didí | didí |
| DÍCÉBAS | didies | didès | didès |
| DÍCÉBAT | didie | didè | didè |
| DÍCÉBĀMUS | didíem | didèm | didèm |
| DÍCÉBĀTIS | didíetz | didètz | didètz |
| DÍCÉBĀNT | didien | didèn | didèn |
| DÍXI | didí | dishori | dishoi |
| DÍXISTI | didís | dishores | dishós |
| DÍXIT | didec | dishot | dishó |
| DÍXIMUS | didérem | dishórem | dishom |
| DÍXISTIS | didéretz | dishóretz | dishotz |
| DÍXERUNT | dideren | dishoren | dishón |
| FACIĒBAM | hadiá (*) | hadí | hadí |
| FACIĒBAS | hadies | hadès | hadès |
| FACIĒBAT | hadie | hadè | hadè |
| FACIĒBĀMUS | hadíem | hadèm | hadèm |
| FACIĒBĀTIS | hadíetz | hadètz | hadètz |
| FACIĒBANT | hadien | hadèn | hadèn |
| FĒCÍ | hí | hiri | hadoi |
| FĒCISTI | his | hires | hadós |
| FĒCIT | hec | hit | hadó |
| FĒCIMUS | hérem | hírem | hadom |
| FĒCISTIS | héretz | híretz | hadotz |
| FĒCĒRUNT | heren | hiren | hadón |
| FĒCISSEM | hessa | hèssi | hadossi |
| FĒCISSES | hesses | hèssis | hadossis |
| FĒCISSET | hesse | hèssi | hadossi |
| FĒCISSEMU | héssem | hèssim | hadóssim |
| FĒCISSETIS | héssetz | hèssitz | hadóssitz |
| FĒCISSENT | hessen | hèssin | hadossin |

(*) Que balham ací eras fòrmas deth Bavartés (Val d'Aran « francesa ») de qui, en Aran propiamenti dit,

non son en usatge qu'en eths dus pòbles fronterers de Bausen e Canejan. Encara que non sian james emplegadas per escript, a on les se substitueish eras fòrmas panaranesas en *héja*, *hèges*, *hège*, *hègem*, ètc, un libe coma Es Vèrbs Conjugadi, non manca cap de mentaver-las, totun. Qu'auram eth parat de senhalar mès lonh, que, des d'un punt de vista panoccitan, eth paradigma aqueth (de qui arremonta en dreta linha ath latin) ei probablaments eth mès endicat.

5. Ara, contrariaments a ce que s'espassa en dialècte vedin de Bathmala (Castilhonés), eth aranés de qui aubedeish, en aquerò, a ua tendéncia generala en occitan moderna, non perpetua cap eth sovier der'antica enterdentala /z/ en d'autas posicions qu'era posicion entervocalica. En debut de diccion, en fin de diccion e ath darrèr de consonanta, eth produït de C + E, I latins aboteish a [s].

| ETIMON | Ortografia actuala | Casau | Bathmala | Restauracion grafica |
|--------------|--------------------|------------|-------------|----------------------|
| LUCERNACALA | ernalha | [sarnál'a] | [θœrrnòl'o] | [X] |
| CERÉSÉARIU | ceridèr ~ cesirèr | [sériðèr] | [θezirèr] | [X] |
| LINTÉÖLU | linçò[u] ~ lançòu | [līnsò] | [lānθòw] | [X] |
| Gal. BERCIU | brèç | [bres] | [brèθ] | [X] |
| SETACEU | sedaç | [səðás] | [θəðás] | [X] |
| COSSU | cusson | [kisūŋ] | [küθú] | *cuçon |
| *COSSONARE | cussoat | [kiswát] | [kūθwáč] | *cuçoat |
| Germ. MILTJA | mèussa | [mèusa] | [méuθo] | *mèuça |
| GALLINACEA | gariassa | [garyásə] | [garyáθo] | *gariaça |
| CÖRUACEU | corbàs | [kurβás] | [kurβáθ] | *corbàç |
| *TALIANTES | talhants[es] | [tal'āns] | [tal'āñθes] | [X] |

6. Encara qu'era grafia actualaments en usatge en Aran e sia perfectaments admisibla, au mens en un ambient gascon, eth hèit de notar : 1°/ per miei d'ua /z/ eth produït de C + E, I, TI e -D- latins en posicion entervocalica ; 2°/ per miei d'ua /ç/ « trencada », eth produït de C + E, I latin en debut de diccion, en fin de diccion e darrèr consonanta, no'n presenta pas mens mantuns avantatges indiscutables :

- qu'èra - per ce qu'ei dera posicion entervocalica, en tot cas - era grafia en usatge en lemozi (ancian provençal). Que s'ageish donc dera grafia tradicionala, istorica, classica, dera lengua d'Òc.
- Qu'ei - en rèula generala - coërent des deth punt de vista dera etimologia (era grafia alibertina non n'ei guaire sus aqueth punt).
- Qu'esvita de multiplicar eras grafias en usatge per un sol e madeish mot : *ausèth* ~ *audèth* ~ *auchèth* → **auzèth*, *fasiá* ~ *hadie* ~ *hasè* ~ *hadè* →
- **faziá* ~ **hazia* ~ **hazè*, ètc . Que sufeish, cada còp, de balhar era clau de correspondéncia necessària per cada dialècte.
- Que correspón ath vòt emetut de dempús bèths dias-a dejà per man-

tuns romanistas d'arrenòm (Eth bearinzant e ispanizant Jean Bouzet, eth arregretat Jacques Allières, etc).

| ETIMON | Lemozí (occitan antic) | Alibèrt | Biarnés | Nòrmes Ortogràfiques | Grafia « englobanta » |
|-------------|---------------------------|----------------------|----------------|-------------------------|--------------------------|
| *AUICELLU | auzelh | <i>aucèl ~ ausèl</i> | <i>ausèth</i> | audèth | *auzèth |
| CICERE | <i>cezer ~ sezer</i> | <i>cese</i> | <i>césér</i> | cede | *cézer |
| *CŌCĒRE | còzer | <i>còser ~ còire</i> | <i>còser</i> | còder | *còzer |
| *CŌCĪNA | cozina | <i>cosina</i> | <i>cosina</i> | codina | *cozina |
| *COCĪNARIU | coziner | <i>cosinèr</i> | <i>cosinèr</i> | codinèr | *cozinèr |
| DÍCĒRE | dízer | <i>dire ~ díser</i> | <i>díser</i> | díder | *dízer |
| DÍCĒBAT | dizía | <i>disiá</i> | <i>disè</i> | didie | *dizie |
| FACIĒBAT | fazía | <i>fasiá</i> | <i>hasè</i> | hadie | *hazie |
| UIDĒBAT | vezía | <i>vesiá</i> | <i>vedè</i> | vedie | *vezie |
| POTIŌNE | poizó | <i>poison</i> | <i>poson</i> | podom | *pozon |
| RATIŌNE | razó | <i>rason</i> | <i>rason</i> | rason | *razon |
| SATIŌNE | sazon | <i>sason</i> | <i>sason</i> | sason | *sazon |
| Ar. AZ-ZAHR | ? | <i>asard</i> | <i>asard</i> | edard | *ezard |
| UĬCĪNU | vezí | <i>vesin</i> | <i>vesin</i> | vesin | *vezin |
| UĬCĪNA | vezina | <i>vesina</i> | <i>vesia</i> | vesia | *vezia |
| PLACĒRE | plazer | <i>plaser</i> | <i>plaser</i> | plaser | *plazer |
| CERĒŠĀ | <i>ceriesa~cerisia</i> | cerièr | <i>cerisa</i> | cerida | *cerisa |
| CERĒŠĀRIU | <i>cerier ~ serier</i> | <i>cerièra</i> | <i>cerisèr</i> | ceridèr | *cerisèr |

1.3.3. Eths « gasconismes de base» (J. Allières)

Naturalaments, era nòrma en usatge en Aran, de dempús eths ans 1980, que s'aparta netaments dera « lenga literària » establida per Alibèrt entath lengadocian, per toti aqueri trèits de qui individualizan claraments eths dialèctes gascons laguens eth conjunt occitan. Loís Alibèrt non manca cap, d'aulhors, de dreçar-ne era lista ena *Introducción dera Gramatica*. A mantuas arrepresas, tanben, Alibèrt senhala en sòn obratge - entà condamnar-ne, en generau, tot viste, eth usatge escriut - eths trèits de qui aparentan estretaments ath gascon eths divèrsi dialèctes lengadocians dera region piranesa (foishenc, donasanenc, tolzan, narbonés).

Gramatica Occitana

- « I seguit de l pòt se diftongar en iè, ia, iò : fil, abril, pila. En tolosan, foissenc, agenés, part del cevenòl, òm a : /fièl, abrièl, pièlo/... La lenga literària deuriá servar **i.** » (1^{era} part, § 7) [En gascon : **hieu, pièla**. Localaments (Aran, Luishon, Aura, Loron) : **abrieu**].
- « En foissenc, donasanenc e dins lo parlar local d'Agen, ai pòt s'afeblir en èi : fraisse, pâisser, fait, lait, mai /frèiche, pèiche, feit, lèit, mèi/... La lenga escrita deu admetre si que non las formas en ai » (1^{era} part, § 9) [En gascon : **hrèisho, pèisher, hèit, lèit, mès/mei**].
- « E tampat pòt se reduire a e en agenés, carcinòl e tolosan : dreit, estreit, creire, veire /dret, estret, crere, vere/. Las formas en ei devon èsser mantengudas dins le lenga escrita » (1^{era} part, § 11 bis) [En gascon : **dret, estret**].
- « Lo sufix latin -ARIU, -ARIA, jos d'influéncias mal definidas, benlèu germanicas, se tresmudèt en -ERIU, -ERIA, per donar -er, -eira en vièlh lengadocian. La lenga modèrna a produit : /-è, -èro/ : /prünè, manèro/ dins los parlars locals d'Agen e del Mas d'Asil seguraments jos l'influéncia del gascon... Dins la lenga escrita conven d'admetre exclusivament -ièr, -ièira, -ièra : prunièr, manièira o manièra. » (1^{era} part, § 13) [En gascon : **pruèr**. Localaments (Aran) : **manèra**]
- « Òu passa sovent a au en lengadocian central, tolosan, foissenc, donasanenc, albigés, carcinòl, narbonés : plòure, nou, dijous /plaire, nau, dijaus/. Aquelas formas devon èsser regetadas de la grafia literària. » (1^{era} part, § 16) [En gascon : **nau, dijaus**. Localaments (Biarn, Planha) : **plàver/plàuer**.]
- « Dins lo parlar donasanenc -a persistís, mentre que -as passa a /es/ : ròda, ròdas, bada, badas /roda, rodes, boda, bades/... La lenga escrita deu restablir sempre a atòn...» (1^{era} part, § 19) [En gascon, localaments (Aran, Bavartés, Luishonés, Aura, Loron, Campan, Lavedan) : **era hemna → eres hemnes/es hemnes**].
- « O tampat inicial se càmbia sovent en au : onor, odor, olièra, oelha, ofegar, ofensar /aunú, audú, aulièro, auelho, aufegà, aufensà/. Cal regetar aquelas formas de la lenga escrita » (1^{era} part, § 21) [En gascon : **aunor, aulor/audor, aufensar**. Localaments : **aulha, auelha**].
- « I pretonic, jos l'influéncia de las labialas, passa sovent a u : primièr /prümiè/... Cal servar i dins la lenga escrita » (1^{era} part, § 22) [En gascon : **prumèr**].
- « La diftongacion en iè, ia, iò de i long tonic + l pòt passar a l'atòna : filada, filata, filar, apilar /fialado, fialato, fialà, apialà/. » (1^{era} part, § 22) [En gascon : **hialada, hialar, apielar**].
- « En agenés, foissenc, donasanenc, ai tonic afeblit en èi pòt passar a l'atòna per analogia : daissar, graissam, naissent /deichà, greicham, neichent/. La grafia deu tostamps servar ai. » (1^{era} part, § 26) [En gascon : **deishar/leishar, greisham, neishent**].
- « IA es un fals diftong notat -iá : abadiá, foliá, capelaniá, escudariá, vendiá, auriá, donariás, aimarián, que representa l'anciana desinéncia -ia, dont l'accent s'es desplaçat e l'i s'es consonificat. A donat divèrsas formas segon los parlars : -ia en donasanec : vendiá, beviá (-ía disillabic)... » (1^{era} part, § 29) [En gascon : **abadia, holia, escuderia**. Localaments (Barossa, Aran, Coserans) : **venia/venie, auria/aurie, daria/darie, aimarian/amarien**].
- « IS correspond al francés is dins caisse e al catalan ix dins caixa. Equival quora a iss, quora a ich o ch del francés. Aquel son es representat per iss dins l'interior dels mots e per is a la finala : caissa, foissar, créisser, cais, trois, peis /caisso, fuissà, creisse, cais, truis, peis o caicho, fuichà, creiche, caich, truich, peich/. I pòt demorar sensible o s'amudir del tot : peis /peich o pech/. » (1^{era} part, § 42) [En gascon : **caisha, créisher, peish**. Que calerà demorar un moment abans qu'eth Servici de Lingüistica deth IEO non prena era sàvia decision d'abolir aquera convencion un shinhau absurda de qui hazia que, en un sol e madeish despartament coma 'r Arièja (09), un sol e madeish mot coma [ká o] - localaments [ká o], mès james [ká so] - e hosse ortografiat **caisha** ena zòna considerada coma gascona (eth Coserans) e **caissa** ena zòna tenguda per lengadociana (eth Sabartés, era Hauta Arièja). Qu'òm admet, donc, ath dia de uei (mès arren mès que tath foishenc e 'ths dialèctes de qui l'au tanhen), d'escriver, mès lèu que **caissa, peis, Fois**, ètc, **caisha, peish, Foish**, ètc, ara mòda gascona.]
- « En principi, los parlars occidentals, orientals e septentrionals càmbian lo grop ct latin en ch : FACTUM, fach ; TRUCTAM, trocha ; JUNCTAM, joncha. Mentre que los parlars meridionals donan it o t : fait, troita, junta. Aqueste caractèr se retròba encara en gascon : fèit [??], e en catalan : fet. » (1^{era} part, § 44) [En gascon : **hèit/hèt, trueita, junta**].
- « L final provenent de ll latin o de lh roman demòra inalterat : bèl, aquel, aucèl, pèl, sadol, val, gal, miralh, embonilh, calelh, truèlh, embolh /bèl, aquel, aucèl, pèl, sadol, bal, gal, miral, embunil, calel, trèl, embúl/... En foissenc e donasanenc, ll final dona lh coma a l'intervocalica : bèl, sadol, aquel, flagèl /bèlh, sadulh, aquelh, flagèlh/, e lh persistís : trabalh, solelh, embonilh... La lenga literària deu manténer l e lh finals segon l'etimologia. » (1^{era} part, § 50) [En gascon : **bèth, aqueith, auzèth, pèth, sadoth, vath** ; localaments (Lascun) : **gath** ; **miralh, solelh/sorelh, tribalh**, ètc. Eth hèit de non préner en compde eras fòrmas arcaïsantas (classicas, de hèit !) encara en usatge en Hauta Arièja que contribueish a esluenhar graficaments eth lengadocian deth gascon. Brembam-mos que ua fòrma foishenca o donasanenca coma **[bèlh]** (= **bèl**, per *bèlh) no's destria deth sòn pendent gascon, **[bèt]** (= **bèth**), que per un leugèr cambiament d'articulacion .]

Ara, er'adopcion oficiala peth Institut d'Estudis Occitans, en 1950, dera refòrma lingüistica preconizada per L. Alibèrt, dab era publicacion d'un tèxte entitolat *La Réforme linguistique occitane et l'enseignement de la langue d'Oc*, que davantegèc de pòc, er'adaptacion ath gascon deras suberditas rèulas, per miei der'adopcion d'un segond tèxte oficiau, *L'Application de la Réforme linguistique occitane au Gascon*, en 1951. D'alavetz estant, eths principaus « gasconismes de basi », segon era urosa formula de Jacques Allières, e hèn, en principi, partida integranta deras variantas graficas admesas pera nòrma alibertina entara lengua escriuta. Qu'ei interessent de notar qu'eth plan adoptat peths arredactors der'Application e segueish de près eth passatge déjà mentavut dera Gramatica Occitana, a on Alibèrt e s'atèla a caracterizar, punt per punt, eth lengadocien per rapòrt ath gascon.

| Gramatica Occitana segon los parlars lengadocians | Application de la Réforme linguistique occitane au Gascon |
|---|---|
| <p>« Lo lengadocien se separa del gascon :</p> <p>a/ Per la persistencia del diftong ai reduït a èi en gascon : leng. lait ; gasc. lèit.</p> <p>b/ Per la conservacion de f tresmudat en h aspirada en gascon : leng. forn, flor ; gasc. horn, hlor.</p> <p>c/ Per la reduccion de ll latin intervocalic e final a l contra r e to th en gascon : leng. aquel, aquela ; gasc. aqueth, aquera.</p> <p>d/ Per la persisténcia de n intervocalic amudit en gascon : leng. luna ; gasc. lua.</p> <p>e/ Per la conservacion dels grops mb, nd reduits a m, n en gascon : leng. camba, landa ; gasc. cama, lana.</p> <p>f/ Per la persisténcia dels grops br, dr, tr reduits a b, d, t en gascon : leng. lèbre, autre; gasc. lèbe, aute.</p> <p>g/ Per lo non-desvolopament de a prostetic davant r inicial : leng. ram ; gasc. arram.</p> <p>h/ Per la reduccion dels grops latins kw, gw allòc de lor persisténcia en gascon : leng. quatre /catre/, gardar ; gasc. quate, guardar.</p> <p>i/ Per la conservacion del son v fins al siècle XV que lo gascon a tresmudat en b bilabial non explosiu despuei sa formacion : leng. vòstre ; gasc. vòste /booste/. » (<i>Introducccion</i>, VI).</p> | <p>« D'autre part, les traits phonétiques propres au gascon seront conservés et parfois même restaurés :</p> <ul style="list-style-type: none"> • h aspiré pour f : hòrt, hlama, hrut, in.hèrn. <p>Les groupes mb et nd réduits à m et n : cama, coma, lana, escóner.</p> <ul style="list-style-type: none"> • n intervocalique amuï : ua, cua, haría. • l final latin vocalisé en u : nadau, hiu, hèu. • ll double latin intervocalique > r : bèra, maishèra, aquera. • ll double latin final > th : bèth, aqueth, ausèth. • r amuï dans les groupes consonantiques : libe, lèbe, mèste, aute. • métathèse de r : craba, cramba, praube, dromir, trende. • r initial > arr : arrat, arram, arrai. • w latin ou germanique des groupes qu, gu conservé : quan ou quán, quau ou quáu, guèr ou guér. • ai > èi : hèit, hrèisho, lèit. » |

Quant aras Nòrmes Ortogràfiques de qui n'an pas per tòca d'èster un estudi de fonetica istorica, non s'arrefereishen explicitaments ad aqueri grani trèits de gasconitat que quan era sua existéncia e requeseish ua grafia especificaments gascona, açò es assaber :

- er'antica **h** expirada per **F**
- **(-i)sh**
- **-th**
- **-u- < -U-, -B-**
- e 'th usatge deth punt interior (**-n.h-**, **-s.h-**)

Nòrmes Ortogràfiques

- « **u** entre vocaus a un son consonantic corresponent ath signe [w] : *escriuer, víuer, parlaua*. En Pujòlo, a on se pronóncie coma **b** [β], se pòt escriuer **v** : *escriver, víver, parlava* » (1999, § 10).
- « **ish** ath darrèr de vocau e **sh** enes autes posicions se pronóncien [ʃ] : *caisha, shada*. » (1999, § 22).
- « **th** se lieg coma **t** [t] en bères paraules e coma **ch** [tʃ] en bères autes : *vedèth, eth [t], còth, poth [tʃ]*. En Bausen e Canejan se lieg tostemp coma **ch**. En aguesti lòcs se pronóncien tanben coma **ch** eth **d** finau e eth **t** finau qu'altèrne tamb **d** intervocalic : *hered, cantat/cantada*. Deth punt de vista dera lengua actuau, es critèris entà escriuer **th**, les dan es diferéncias dialectaus e era alternança morfològica **-th/-r** : *vedèth/vederar, eth/era, poth/pora*. » (1999, § 24).
- « **h** non se pronóncie cap [ø]. Correspon a ua antiga aspiracion que proven generalment d'ua **f** etimologica. Se pronóncie encara en Canejan [h] : *hemna, haria*. Cau escriuer eth punt interior (.) en paraules coma **en.hornar** e **des.hèir** entà esvitar era confusion damb es digrafs **nh** e **sh**. » (1999, § 34).

2.5.3. Eras vocalas *svarabhakticas*

En aranés primitiu, eth manten d'ua [h] aspirada (arremontant a ua F latina) davant R qu'entrenèc era formacion, tramas consonantas, d'ua vocala dita « *svarabhaktica* » de qui a suberviscut ath amudiment dera [h] en aranés modèrne : FRAXINU > [h^erēšu] > [erēšu] (= *herèisho*), FRAGA > [h^eráya] > [aráyə] (= *haraga*), ètc. Eth manten intact deth gropo consonantic d'origina per miei d'ua insercion vocalica que constitueish un trèit distintiu deth gascon pirenenc qu'eths dialèctes aranesi e partatjan dab eths auti dialèctes montanhards deth Castilhonés, deth Haut Comenge e dera Hauta Bigòrra, eth arrestant deth gascon auhrint, deth sòn costat, divèrsas solucions alternativas coma :

- eth manten pur e simple dera F etimologica
- eth amudiment dera [h] aspirada sense cap d'arredoblament dera R subsequenta.
- eth amudiment dera [h] aspirada dab arredoblament dera R subsequenta considerada coma iniciala.

| | FRAXINU | FRIGIDU | FRUCTA |
|------------------------------|----------|----------|----------|
| Aran (Casau) | [erēšu] | [irét] * | [frúta] |
| Val d'Aran francesa (Mètlas) | [erēše] | [iréč] * | [erúta] |
| Luishonés | [hérēše] | [héret] | [hérüto] |
| Barossa | [hérēše] | [hérec] | [hrúto] |
| Vath d'Aura | [hérēšu] | [héret] | [hérúto] |

| | | | |
|-------------------------------------|----------|---------|----------|
| Castilhon (Arièja gascona) | [hérèšē] | [héréč] | [hérúto] |
| Bathmala (Arièja gascona) | [hérèšē] | [héréč] | [hérúto] |
| Haut Ador | [hérèšu] | [hérét] | [hérúto] |
| Lavedan | [hérèšu] | [hérét] | ? |
| Parçans de Tarba (Semiciac) | [hérèšu] | [frét] | ? |
| Parçans de Tarba (Poiastruc) | [hérèšu] | [frét] | [frúto] |
| Biarn (Vièla) | [rèšu] | [réť] | [frúto] |
| Biarn (La Sèuva) | [rrèšu] | [rréť] | ? |
| Gèrs | [rrèšu] | [frét] | [frúto] |
| Lanas | [rèšə] | [rœť] | [rúitə] |

(*) Contrariaments a ce que poiríam pensar, era [i] de [iréť] n'ei pas, ça'm par, ua vocala svarabhaktica, mès eth frut d'ua protèsi (vej. mès baishet, § 2.5.4.)

En Aran, mès tanben, en Bigòrra, que s'a pres er'abitud de notar era vocala svarabhaktica, quau se volha que pósquia èster eth sòn timbre : **hered/*heired, haraga, heruta**, ètc. En Biarn, era grafia en usatge que s'acontenta d'arrestablir per escriut er'antica [h] aspirada davant « r » : **hred, hroment (horment**, en aranés) < FRUMÉNTU, **hrèisho**, ètc. Que's cau brembar que, se mo'n tenguem ath tèxte de 1951 de qui fixèc eth usatge deth gascon escriut, eras solas grafias qu'eth IEO arretenga, en principi, coma oficialas, entara lengua literària e son : **hred, hrada, hruta, hrèisho, hroment**, ètc. Lhèu que seria ua bona causa, entara unitat deth gascon e 'ra coëréncia de totas eras «lenguas d'òc» d'acostumar-se a escriver : **hred, heregar, hruta, hrevèr, hrèbe, hrada, hrítions**, ètc, en lòc de : **hered, heregar, heruta, hereuèr, herèbe, haraga, heritons**.

Application de la Réforme Linguistique Occitane au Gascon (1951)

« Les traits phonétiques propres au gascon seront conservés et parfois même restaurés : **h** aspiré pour **f** : **hòrt, hlama, hrut, in.hèrn...** ».

« On choisira autant que possible, pour l'usage littéraire, les formes les plus conforme à l'évolution normale de la langue et les mieux conservées : **h** au lieu de **es, ar** ou suppression : **hlor, hromiga, hrut** et non **eslor, lor, arromiga, romiga, rut, hurut...** »

| | FRAGA | FRIGÍDU | FRŪCTA |
|---------------------------|-----------------------|---------------|----------------|
| Aran (grafia d'usatge) | ahraga/hraga * | heired | heruta |
| Bigòrra (grafia d'usatge) | haraga | hered | heruta |
| Biarn (grafia d'usatge) | ahraga | hred | fruta |
| Grafia Preconizada | hraga | hred | hruta |
| Alibèrt | fraga | freg | frucha ~ fruta |
| Provençau | fraga | freg | frucha |

| | | | |
|--------------|-------|---------------------|--------------|
| Alpenc (Gap) | fraga | fred ~ freg | frucha |
| Vivarés | ? | <i>freid ~ freq</i> | <i>fruta</i> |

(*) Era grafia **ahraga** (= [arráyə]) per aran. [aráyə] qu'ei manlhevada ath biarnés.

1.3.4.1 Eth cas particular deth latin FRIGÍDU

Ja avem vist qu'eth latin FRIGÍDU abotia arrespectivaments a [irét] e [iréč] a Casau e a Mètla. En tot, qu'ei guaireben un detzenat de fòrmas orals diferentas qu'eth aranés auhreish : [irét], [irèt], [eirét], [aírét], [hérét], [érét], [heréč], [eréč] [iréč], ètc (vejatz eth tablèu N° 2, ací davath). Era lengua escriuta, en contra, n'arretén que dues fòrmas possiblas : era fòrma pangascona **hered** (de qui abraça en prioritat eras realisacions : [hérét], [érét], [heréč] e [eréč]) e 'ra varianta propiamenti aranesa **heired** de qui englòba totas eras autas fòrmas dera lengua parlada : [irét], [irèt], [iréč], [eirét], [aírét], ètc. S'ei relativaments aisit d'identificar era fòrma deth gascon pirenenc **hered** darrèr eras divèrsas fòrmas orals en usatge a Canejan, Pontaut e Bausen, eras fòrmas tipicaments aranesas, en contra - [irét], [eirét], [aírét] -, que trencan dab eras solucions deth gascon comun. S'òm ne crei era sedusenta ipotèsi emetuda per Joan Coromines, aqueras fòrmas que serian eth frut d'ua evolucion particular. Eth esfòrç articulatòri de qui arreclamava eth manten der'aspiracion devant R qu'auria necessitat eth apòndi d'ua vocala prostetica, en vertut d'un procès pro comun, un shinhau pertot en gascon, au mens quan er'aspiracion e davanteja ua L, mès soent tanben devant ua R o un iòd : FLÓRE > [ehlú] > [eslú] > [ezlú] (= **es.hlor**), FLAMMA > [ehlámo] (= **es.hlama**), FENÉSTRA > [arrièsto, ihèstro] (= **ahrièsta**, *ihèstra), FÍLU > [ahyéw] (***ahieu**), ètc (vejatz eth tablèu N° 1). Per ce que tanh aths abotissents aranesi de FRIG DU, eras estapas dera evolucion, taus coma las podem arreconstituïr, que serian donc aquestas :

| | |
|--------------|---|
| Canejanés | [hréč] > [héréč] > [hérét] > [érét] (= hered) |
| | [hréč] > [ahréč] > [aíréč] > [eíréč] > [iréč] (= heired) |
| Aranés Comun | [hrét] > [ahrét] > [aírét] > [eírét] > [irét] > [irèt] (= heired) |

Se mo'n tiem ad aquesta ipotèsi, dilhèu que seria bon, per mès de coérència, tot en còp d'un punt de vista istoric e normatiu, d'adoptar eras convencions següentas e d'escriver en consequéncia :

- * **hred** (en lòc de **hered**) per : [hérét], [érét], [heréč] e [eréč]
- * **ehred** - o ***es.hred**, ath imatge de ce que's hè dejà en Biarn dab **es.hlor**, **es.hlama**, ètc - (en lòc de **heired**) per : [irét], [irèt], [iréč], [eirét], [aírét], ètc. Era correspodéncia dab eras fòrmas en usatge en eths auti dialèctes occitans que non se mo'n trobaria que mès ahortida.

| Aranés | Alibèrt | Biarnés | Provençau | Vivarés | Alpenc | Guardiòlo |
|----------------|-------------|-------------|-------------|-------------------|------------------|--------------|
| es.hred | freg | hred | freg | freid/freg | fred/freg | freid |

1. Tablèu N° 1 : **Eth desvolopament de vocalas prosteticas/epenteticas davant [hl-, hr-, hy] en gascon.** Hònt : ALG.

| | FILU | FLAMMA | FLÔRE | FENĚSTRA | FORMIČA |
|------------------|-------------|-----------------|---------------------|-------------------|-----------------|
| Aranés Escriut | hiu | (a)hlama | flor/hlor | hiestra | hormiga |
| Casau | [yéw] | [láma] | [flú] | [yèstra] | [urmíya] |
| Mètla | [íw] | [láma] | [lú] | [yèstra] | [urmíya] |
| Lengadocian | fial | flama | flor | fenèstra | formiga |
| Biarnés escriut | hieu | es.hlama | flor/es.hlor | ahrièsta * | ahromiga |
| St Gaudenç | [íw] | [ezlámo] | [flú] | [yèstro] | [urmíyo] |
| Castilhon | [ahyéw] | ? | [flú] | [yhèstro] | [hurmíyo] |
| Bathmala | [aïhéw] | ? | [flú] | [ihèstro] | [hurmíyo] |
| Vath d'Aura | [hyéw] | [əslòmo] | [əslú] | [hyéstro] | [hurmíyo] |
| Lanamesa | [híw] | [əslámo] | [əhlú] | [finèstro] | [hurmíyo] |
| Arrens (Azun) | [híw] | [əslámæ] | [əslú] | [híestræ] | [hrumíyæ] |
| Ièrda | [hyéw] | [əslémœ] | [əslú] | [yéstrœ] | [hurmíyœ] |
| Uzer | [híw] | [əhlámo] | [əhlú] | [hyéstro] | [hurmíyo] |
| Semiac (Tarba) | [híw] | [əšlámo] | [flú] | [finéstro] | [hrumíyo] |
| Aurelhan (Tarba) | [híw] | [əslámo] | [əslú] | [finéstro] | [hurmíyo] |
| Rabastens | [híw] | [əšlámo] | [flú] | [frinèsto] | [hurmíyo] |
| Poiastruc | [híw] | [əšlámo] | [əslú] | [frinèsto] | [hurmíyo] |
| Galan | [šéw] | [əšlámo] | [əslú] | [finéstro] | [hurmíyo] |
| Vièla (Aussau) | [hyéw] | [əhlámo] | [əhlú] | [arryèsto] | [arrumíyo] |

(*) **ahrièsta** : qu'ei era fòrma aussalesa (vej. mès baishet, en tablèu, era comuna de Vièla). Eth arres-tant deth Biarn qu'emplega era fòrma semi-sabenta : **frinèsta**.

2. Tablèu N° 2 : **eths abotissents deth latin FRIGIDIU en aranés.** Hònt : Otto Winkel-mann, *Untersuchungen zur Sprachvariation des Gaskognischen im Val d'Aran (Zentralpyre-äen)*, Tübingen, 1989.

| | |
|-------------------------------------|----------------------------|
| Localitat Temuenh | Continuator(s) de FRIGÍDU |
| 1. Canejan | [héréc] ~ [éréč] ~ [iréč] |
| 2. Bausen | [héréc] ~ [hérét] ~ [irét] |
| 3. Pontaut | [érét] |
| 4. Les | [irét] |
| 5. Bossòst | [irèt] |
| 6. Arres de Sus | [irèt] |
| 7. Arres de Jos | [irét] ~ [eřét] |
| 8. Era Bordeta | [irèt] |
| 9. Arró | [irét] ~ [eřét] |
| 10. Vilamòs | [irét] ~ [irèt] |
| 11. Es Bòrdes | [irét] ~ [eřét] |
| 12. Benós | [irèt] |
| 13. Begós | [ařet] ~ [irét] |
| 14. Arròs | [irèt] ~ [irét] |
| 15. Vila | [irèt] |
| 16. Aubèrt | [irét] |
| 17. Betlan | [irét] ~ [irèt] |
| 18. Montcorbau | [irét] ~ [irèt] |
| 19. Mont | [irèt] |
| 20. Vilac | [irét] ~ [irèt] |
| 21. Gausac | [irét] |
| 22. Casau | [irèt] ~ [irét] |
| 23. Vielha | [irét] |
| 24. Betren | [irét] ~ [eřét] |
| 25. Escunhau | [irét] |
| 26. Casarilh | [irét] |
| 27. Garòs | [irét] |
| 28. Arties | [irèt] ~ [eřet] ~ [irèt] |
| 29. Gessa | [irét] |
| 30. Salardú | [eřét] ~ [irét] |
| 31. Unha | [eřét] |
| 32. Bagergue | [irét] ~ [řirét] |
| 33. Tredòs | [irét] |
| Hòs (Val d'Aran francesa) | [héréc] |
| Mètlas (Val d'Aran francesa) | [iréč] |

1.4 Er'accentuacion

1.4.1. Eras fòrmas proparoxitonicas

Qu'òm admet, generalaments, qu'eth occitan modèrne ei completaments desaprovedit de fòrmas proparoxitonicas. En Aran, totun, era lengua parlada que'n coneish un gran nombre : **era política, era gramàtica, era música, cau que càniques**, ètc (en occitan « comun » : *era politica, era gramatica, era musica, cau que cantes*, ètc). Eth aranés que compda tanben dab un pialèr de mots *aguts* (paroxitonics) de qui son tradicionals accentuats sus era darrèra sillaba deth aute costat dera frontèra : **catòlic, lògic**, enlòc de *catolic, logic*, ètc. D'aubuas d'aqueras fòrmas n'an d'aulhors cap de correspondent exact en Occitània Grana, a on an coneugut ua auta evolucion : **era ànima, eth músic, eth mecànic** (= *er'anma/er'arma/er'ameta, eth musician/eth*musicaire, eth mechanician*). Ua vesión bêth shinhau « centralista » dera occitanitat qu'amia, en generau, es observators a considerar qu'eras fòrmas proparoxitonicas aqueras e son « d'introduccion recenta » (???) e d'obediença ispanica. Era evolucion de qui's pòt constatar ara lectura deras duas versions consecutivas deras Nòrmes Ortogràfiques ei, d'aqueth punt de vista, segnificativa. Era premèra version entitolada justaments Nòrmes Ortogràfiques [= nòrmex urtugràfikes] (1982), qu'admet er'existéncia deths paroxitons, en tot suggerir, prudentaments, que serie dihèu ua bona causa d'acostumar-se a prononciar autaments. Era segonda version, en contra, entitolada simbolicaments, Nòrmes Ortografiques [nòrmex urtugrafíkes] (1999), que'n condamna, radicalaments, eth usatge, tant en paraulas coma per escrit. A tòrt, dilhèu. De hèit, eth aranés n'ei pas eth sol dialècte occitan a emplegar de talas fòrmas. Toti eths dialèctes avent escapat de longa ara influéncia francesa que son ena madeisha situacion : qu'ei eth cas deth cisalpenc e deth guardiòlo, en Estat Italian, mès tanben deth nissart (niçard) e deth roiasc (liguroalpenc) enas Alps Marini (ancians Estats de Savòia). De demés, era persisténcia, un shinhau pertot en Occitània, de fòrmas sense cap de sincòpi (**aguila** < AQUILA, **lagrema** < LACRYMA, **manega** < MANICA, ètc, per **agla, lèrma, marga**) be sembla endicar qu'era resisténcia deras fòrmas proparoxitonicas en occitan e hoc dilhèu mès longa qu'òm non s'ac figure de costuma.

| Nòrmes Ortogràfiques der Aranés (1982) | Nòrmes Ortografiques der Aranés (Octòbre 1999) |
|---|---|
| « [Pòrten accent gràfic] totes es paraules proparoxítones (es-drúixoles) : lògica, gramàtica, àigua (lògica, gramàtica, hagi). Cau rebrembar qu'era introduccio de paraules proparoxítones en aranés ei recenta. Dilhèu serie possible acostumà-se a díder e a escriuer logica, politica...e parallelament, logic, politic, en tot seguir era tendéncia tradiconal dera lengua, que ditz vibora, povora... (§ 38 e, p. 2O). | « En çò que tanh as paraules proparoxitones, cau rebrembar qu'era sua introduccio en aranés ei recenta. Ei per aquerò que cau díder e escriuer logica, politica...e parallelament, logic, politic, en tot seguir era tendéncia tradiconau dera lengua, que ditz vibora, povora... » (§ 36 f). |

Preconizacions del Conselh de la Lenga Occitana (2007)

« En cisalpenc del centre e del sud, dins una granda sèria de cultismes, se plaça l'accent tonic sus una sillaba que se situa abans la sillaba tonica dels autres parlars. Aquò permet al cisalpenc de téner de proparoxitòns e de seguir una accentuacion convergenta amb lo latin e amb fòrça lengas romanicas (catalan, nòrd-italian, italian, espanhòl, portugués, romanés...). Cal precisar que lo cisalpenc del nòrd seguís puslèu lo modèl global d'accentuacion.

- Modèl global, inclús lo cisalpenc del nòrd : *magic, magica, arcaïc, arcaïca, util, utila, catalòg, mediterranèu, mediterranèa, Caucàs, geograf, geografa, fenomèn, telefòn, proparoxitòn, periòde*.
- Cisalpenc del centre e del sud : *màgic, màgica, arcaic, arcaica, útil, útila, catàlog, mediterràneu, mediterrànea, Caucàs, geògraf, geògrafa, fenòmen, telefòn, proparoxítón, període* (...)
- Lo niçard actual s'alinha pus sovent sobre l'accentuacion occitana majoritària dins lo domeni dels cultismes : *magic, magica, arcaïc, arcaïca, util, utila, catalòg, mediterranèu, mediterranèa, Caucàs, geograf, geografa, fenomèn, telefòn, proparoxitòn, periòde*.

Pasmens, los proparoxitòns del niçard e del cisalpenc se devon servir se son de manlèus a de lengas romanicas modèrnas o se son de mots de formacion populara :

a/ Tipe general d'accentuacion :

- mots populars o ancians : *arma, dimenge, pagina*.
- Manlèus a de lengas romanicas modèrnas : *camèra, número, opèra*

b/ Tipe d'accentuacion del niçard e del cisalpenc :

- mots populars o ancians : *ànima, diménegue, pàgina, Mónegue* (fòrma locala del toponim).
- Manlèus a de lengas romanicas modèrnas : *càmera, número, òpera*.

L'aranés a causit lo principi d'adoptar l'accentuacion majoritària de l'occitan dins totes lo domenis : *magic, magica, arcaïc, arcaïca, util, utila, catalòg, mediterranèu, mediterranèa, Caucàs, geograf, geografa, fenomèn, telefòn, proparoxitòn, periòde, camèra, opèra, número*.

Se i desconsella la reculada de l'accent tonic perque es una influéncia del catalan, qu'es estrangièra a l'estrucció de l'aranés e del gascon en general (*màgic*, màgica*, arcaic*, arcaica*, útil*, útila*, catàlog*, mediterràneu*, mediterrànea*, Caucàs*, geògraf*, geògrafa*, fenòmen*, telefòn*, proparoxítón*, període*, càmera*, òpera*, número** ...). » (§ 15.11, *Accentuacions particularas en cisalpenc, niçard e aranés*, pp. 87-89).

[**Observacions :**]

- Eth pretendut « tipe d'accentuacion globau » n'ai arren mès qu'eth frut d'ua reflexion teorica recenta : pertot en Occitània Grana, eths mots aqueri que son sistematicament accentuadi sus era darrèra sillaba, ath imatge de ce que's hè en francés : *camerà, operà, numerò*.
- Coma ac avem leishat enténer, arren n'endica que er'exiténcia de fòrmes proparoxitoniques en aranés e s'explique pera influéncia deth catalan (o deth castelhan). Tot çò que posquiam díder ei qu'era preséncia conjunta deth catalan e deth castelhan a seguraments contribuït a encoratjar eth usatge deras ditas fòrmes en aranés.]

En aranés, eras fòrmes proparoxitoniques que se mos desparteishen en tres categorias :

- a/ Eths mots d'usatge corrent o d'utilisacion anciana.
- b/ Eths mots de formacion sabenta o d'introduccion recenta (cultismes, neologismes).

c/ Anfin (e qu'ei atheu, ua especificitat deth aranés laguens eth conjunt occitan), eths paradigmars arrelhevant deth subjontiu present.

1. Eths mots d'usatge corrent

En eths tablèus de qui s'ensegueishen, eras fòrmas prparoxitonicas que son senhalas en **arroi (vermelh)**.

| | ANÍMA | MUSICA | MUSICU | MECHANÍCU |
|--|----------------|---------------|------------------------------|------------------------------|
| Aranés Literari | anima | musica | music | mecanic |
| Aranés Parlat | à anima | música | músic | mecànic |
| Alibèrt | arma | musica | [musician] [musiquier] | [mecanician] |
| Biarnés | amna | musica | [musicaire] | [mecanician] |
| Nissart | à anima | música | músicou [musicant] | mecànicou |
| Cisalpenc | à anima | música | [musicista] | maquinista |
| Guardiòl | arma | música | ? | mecànic |
| Mistral (Tresor) (grafia mistralenca) | amo ~ armo | musico | [musician] [musicadou] | [mecanician] [machinisto] |
| Provençau (grafia normalisada) | ama ~ arma | musica | [musician] | [mecanician] |
| Provençau Alpenc | arma ~anma~ama | musica | [musician] [musicaire] | [mecanician] |

Senhalam qu'eth niçard (*nissart*), eth mentonasc e 'th brigasc/roiasc (Alps Marini) qu'an mantengut un pialèr de proparoxitons de qui an desparescut en eths auti dialèctes occitans (aranés comprés). Atheu quauqui exemples :

| | AQUILA | AMYGDALA | HIRUNDO | DIE DOMINICU | FORMICA | LACRYMA | *POPULU |
|----------|------------------|-------------------|-------------------|-------------------|--------------------|------------------|---------|
| Nissart | aigla | amèndoula | arèndoula | dimènegue | fournìga | làgrima | pìboula |
| Niçard 1 | aigla | améndola | aréndola | diménegue | formiga | làgrima | píbola |
| Niçard 2 | [áigla] | ? | [rédula] | ? | [fuRmíga] | ? | ? |
| Mentan | [ákula] | [amá□dura] | [vūndura] | [düménigē] | [fuRnígura] | ? | ? |
| Castelar | [áigRiya] | [aménda] | [rwōndura] | [diménigē] | [fuRnígura] | ? | ? |
| Sospèl | ? | [aménda] | ? | ? | ? | [lágrima] | ? |
| Bruelh | [áigRiya] | ? | [aRédulá] | ? | [fuRmígula] | ? | ? |
| Saorge | [ágwiya] | ? | [rūndula] | ? | [fœmígula] | ? | ? |
| Ra Briga | [áigira] | ? | [pásuRa] | ? | ? | ? | ? |

| | | | | | | | |
|----------|-----------------------|----------|-----------------------|---------|------------|----------------------|---------------------|
| Alibèrt | agla | amètla | aronda | dimenge | formiga | lagrema | pibola |
| Aranés 1 | agla | amelha | aurongla | dimenge | hormiga | lèrma | bíbol |
| Aranés 2 | (a)guila ¹ | (a)mètla | arrenòla ² | [X] | *hormigòla | lagrema ³ | pibola ⁴ |

Nissart : lengua literària (*grafia nissarda*, mistralenca).

Niçard 1 : lengua literària (grafia normalizada)

Niçard 2 : lengua parlada, orala.

Aranés 1 : aranés stricto sensu, tau coma l'au se parla ué ena Val.

Aranés 2 : aranés lato sensu. Eras fòrmas en question ja non s'entenen ena Val (dV), mès que son atestadas en d'auti dialèctes vedins.

1. **er' aguilla/era guila** (per mescopadura) < ***er'aguilla** : eras fòrmas aquestas que son atestadas en d'auti dialèctes pirenencs (Lavedan, Haut Salat).

2. **er'arrenòla** < **era *rénola** : era fòrma aquesta qu'ei atestada en Haut Comenge, a Sent Gaudenç, eth capdulh economic dera Val d'Aran, per exemple.

3. **era lagrema** < **era *lágrema**. Era fòrma qu'ei atestada en eths dialèctes lengadocians vedins. Frederic Vergés la balha coma varianta possibla (dV), a costat de **lèrme/lèrma**, en sòn Pichon Diccionari.

4. **era pibola** < **era *píbola**. Era fòrma qu'ei atestada en Tarn (81).

2. Eras fòrmas semi-sabentas

| | | | | | |
|----------------|-----------|-----------|----------|---------|---------|
| Alibèrt | gramatica | politica | politic | logica | logic |
| Aranés Escriut | gramatica | politica | politic | logica | logic |
| Aranés parlat | gramàtica | política | polític | lògica | lògic |
| Nissart | gramàtica | poulitica | poulitic | lougica | lougeic |
| Cisalpenc | gramàtica | política | polític | ? | ? |
| Guardiòlo | gramàtica | política | polític | ? | ? |

3. Eth subjontiu present

| | Aranés Escriut | Aranés Parlat | Catalan Literari | Catalan Occidentau |
|------|---|--|--|--|
| aver | aja ages age ajam ajatz agen | àgiga àgigues àgigue agegam agegatz àgiguen | hagi hagis hagi hagueu hagin | hàgiga hàgigues hàgiga haguessem haguesseu hàgiguen |

| | | | | |
|--------|---|--|--|---|
| cantar | canta cantes cante cantem cantetz canten | càntiga càntigues càntigue cantegam cantegatz càntiguен | canti cantis canti cantem canteu cantin | càntega càntegues càntega canteguem cantegueu cànteguen |
| bàter | bata bates bate batam batatz baten | bàtiga bàtigues bàtigue bategam bategatz bàtiguен | bati batis bati batem bateu batin | bàtiga bàtigues bàtiga batiguem batiguetz bàtiguен |

« Aguestes fòrmes damb alongament son caracteristiques deth centre e dera part nau-ta dera Val d'Aran e recomanam d'evitar-les, en favor des fòrmes cuertes, mès generaument acceptables entàs gascons » (Es Vèrbs Conjugadi, Morfologia Verbau Aranesa, 2003, p. 26). Qu'eras fòrmas « esdróisholas » mentavudas atheu dessús e pósquian soar de faiçon estranhas aras aurelhas deths auti Gascons ei plan possible. Ara, quan eth madeish tipo de conjugason e s'arretrobaria dialectalaments en catalan, eths paradigmas en question be son d'origina indigèna, ce que temuenha deth enradigament pregond e ancian deras fòrmas proparoxitonicas en aranés.

1.4.2. Eras finalas en -ia

En antic lemozí (era koinê literària elaborada peths trobadors, quau se volha que hos-sa era sua origina efectiva : gascona, peitavina, genovesa, catalana, tolosenca, provençala, lemosina, auvenhasca, ètc), eras fòrmes acabadas en **-ia** qu'èran, en principi, accentuadas sus era /i/ : **día, vía** ... Qu'èra eth cas, en particular, de nombrosas desinéncias verbals, en indicatiu imperfèit, per exemple : **avía, fazía, venía**, ètc, ètc. Ara, tan pè eths toti prumèri tèxtes - eth Boèci (premèra meitat deth S. XIau), entre d'auti -, qu'òm comença a trobar quauquas fòrmes a on era dierèsi primitiva a hèit plaça a ua sinerèsi : **viá, diá, aviá, faziá, veniá**. A partir deth S. XIIIau, de talas fòrmas que's multiplicant. Qu'ei eth cas, per exemple, en famós Breviari d'Amor de Matfre Ermengaud de qui escriu **dia, folia** per [dyá], [fulyá]. Ath dia de ué, era sinerèsi qu'ei generala en eths dialèctes lengadocians e guianesi deths quaus e constitueish un trèit vertaderaments characteristic, senon constitutiu : **l'escudariá, la pastissariá, una foliá, aviá, fasiá, veniá**, ètc, ètc. Que s'a a notar qu'eth desplaçament d'accent ena finala que s'acompanha, tot en un còp :

- dera consonificacion deth [i] en [y] : [fulyo], [benyò].
- dera velarizacion o dera palatalizacion dera [a] finala en [ò], [è] o [é] : [fulyò] o [fulyè].
- e, eth cas escagent, der'aubertura dera [e] precedenta en [a] : [esküdériá] > [esküdariò]

Qu'ei era madeisha causa en provençal, a on era finala *lemozina -ia* aboteish a [yé] : l'ostalarié, la batarié, uno gusarié, avié, aviés, aurié, sarié, ètc, ètc (nòrma mistralenca). En gascon, era situacion qu'ei un shinhau mès complèxe. En gascon centrau e occidentau, eth accent tonic que's mantén sus era /i/ : [hulíɔ] o [hulíə], [díɔ] o [diə], [ɛsküðeríɔ] o [ɛsküðeríə]. En gascon maritime (Baish Ador, Lanas) qu'arriba tan plan qu'era /a/ finala de qui, localaments, e's sòl prononciar [ə] e s'esface completaments : [ɛsküðeríə]>[ɛsküðerí], [garí]>GALLINA. En gascon pirenenc, en contra, era sinerèsi, a pòcas excepcions près, qu'ei generala : [dyá] o [dyò], [ɛsküðaryá] o [ɛsküðeryò] ; **era galariá, era bolanjariá, era farmaciá, qu'auíá o qu'auíé, que haiá < que hadiá, que venguiá**, ètc, ètc. Eth aranés qu'ei donc, dab eth barossenc, eth azuèr (Vath d'Azun) e'th gascon dera ribèra deth Garbet (Coserans estremorientau), un deths soli dialèctes pirenencs a mantier solidaments era dierèsi primitiva. Era madeisha tendéncia conservatritz (d'auti dirian « arcaïsanta ») que s'arretròba d'aulhors tot ath long dera periferia deth domèni occitan, dens tota ua tropa de dialèctes montanhards o, un shinhau, estremats. Mentavem, per memòria, oltra eths dialèctes gascons dejà citadi, eth donasanenc en Arièja, eth niçard enas Alps Marini e, plan solide, eths dialèctes cisalpencs en Itàlia. Alibèrt que preconiza eras fòrmas en **-ia**, ce qu'ei logic entath lengadocian. Ara, arren non ditz qu'eth aranés e s'aja a alinhar sus aqueth modèlle, d'aulhors completaments estrangèr ath sòn pròpi engèni. Après tot, eth manten dera dierèsi be correspón ara solucion en ustage ena lengua classica !!!

| | SCUTARIA | HABÉ(B)AT | Gr. POLIDIA |
|-----------------------|------------------|-------------|----------------|
| Aranés escrivut | escuderia | auie | * polia |
| Aran (Casau) | ? | [awíe] | ? |
| Aran (Mètlas) | [esküðeryá] | [awíe] | [pulía] |
| Alibèrt | escudariá | aviá | * poliá |
| Luishon | [X] | [awyé] | [purió] |
| Barossa | [ɛsküðeríœ] | [awíœ] | ? |
| Sent Gaudenç | [esküðeryò] | [awyò] | [pulíɔ] |
| Tolosa | [esküðaryò] | [aβyò] | [puliò] |
| Castilhon (Arièja) | [esküðaryò] | [awyò] | ? |
| Bathmala (Arièja) | [asküðaryò] | [awyò] | ? |
| Vath d'Aura | [esküðeryò] | (ageua) | [puriò] |
| Haut Ador | [esküðeryá] | (avè) | [puliá] |
| Barètja | [esküðeryò] | [e̯i] | [puliò] |
| Vièla (Aussau) | [ɛsküðeríɔ] | (avè) | [pulíɔ] |
| Artés (Biarn) | [esküðerí] | (avè) | [pulíyə] |
| Biàrritz (Baish Ador) | [ɛsküðerí] | [aβœ] | [pulí] |

Ce que nos ditz Alibert

« IA es un fals diftong notat iá : abadiá, foliá, capelaniá, escudariá, vendiá, auriá, donariás, aimarián, que representa l'anciana desinéncia -ia, dont l'accent s'es desplaçat e l'i s'es consonificat. A donat divèrsas formes segon los parlars :

- 1) -ía en Donasanenc : vendiá, bevía (ia disillabic) ;
- 2) -yo en Central, Tolosan, Foissenc, Albigés, Carcinòl, Agenés, Gavaldanés, Roërgat, Orlagués, part del Cevenòl, Donasanenc, Besierenc : risiá, foliá / rizyò, rijò, fulyò, fulhò/.
- 3) -yè en Besierenc, narbonés, Montpelhienc, part del Cevenòl e de l'Albigés : escudariá, capelaniá /escudaryè, capelanyè /...

La lenga literària deu servar iá . » (Gramatica, 1^{era} part, § 29)

En gascon, eras finalas en /ia/ que son d'autant mès nombrosas que s'i higen totas eras fòrmas a on **-ia** (o **-ea** o **-ua**) e provién deth amudiment d'ua **-N-** entervocalica latina. A notar que n'eth cas deras finalas en **-ea** < -E(N)A, eth desplaçament deth accent tonic subera vocala finala entra resolucion deth iat en [yò] o [yá] : PLĒ(N) A > [pléa] > [plyá] > [pyá].

| | CATĒ(N)A | FARĪ(N)A | GALLĪ(N)A | LŪ(N)A |
|------------------|-------------|----------|-----------|-----------------|
| Aranés escriptut | cadea/cadia | haria | garia | lua |
| Lengadocian | cadena | farina | galina | luna |
| Aran (Casau) | [kaδía] | [aría] | [garía] | [lúa] |
| Aran (Mètlas) | [X] | [aría] | [garía] | [lúa] |
| Banhèras | [X] | [haryò] | [garyò] | [lwá] |
| Larbost | [kaδyá] | [haryá] | [garyá] | [lwá] |
| Barossa | [X] | [haríœ] | [garíœ] | [lúœ] |
| Sent Gaudenç | [kaδeno] | [harío] | [garyò] | [lúo] |
| Castilhon | [kadyó] | [haryò] | [garyó] | [lyò] |
| Bathmala | [kadyó] | [haryò] | [garyó] | [lúo] |
| Vath d'Aura | [kaδyó] | [haryò] | [garyò] | [lyó] ~ [lwó] |
| Haut Ador | [kaδyø] | [haryá] | [garyá] | [lwá] |
| Lavedan | [kaδyà] | [haryá] | [garíø] | [lwò] |
| Vièla (Aussau) | [kaδéo] | [harío] | [garío] | [lúo] |
| Artés (Biarn) | [kaδénə] | [haríø] | [garíø] | [lúø] |
| Baish Ador | [kaδéñ'ə] | [harí] | [garí] | [líβə] (= liva) |

1.5. Ehs artícols dits « pirenencs » : elision e aferèsi

1.5.1. Elision deth articol femenin singular *era*

En Biarn e en Bigòrra, que s'a pres er'abitud de notar sistematicament er'elision deth articol femenin ***era*** davant vocala, i comprés quan non a lòc ena cadena parlada : ***er'aiga, er'auca, er'escòla***. En Aran, no's hè : ***era aigua, era auca, era escòla***.

Jean Bouzet : *Manuel de Grammaire Béarnaise* (1975)

« L'a de l'article féminin [= *era*] est élidé dans la conversation courante devant tout mot commençant par une voyelle.

Ex. *er'ayga, - er'aulha, - er'oumptra, - er'uncla, - er'impressioû*.

Néanmoins si le mot suivant commence par un *e* prosthétique, cet *e* tombe et l'a se maintient : *era'strea, era'scudèla, era'streta carrèra, era'scala*, etc » (p. 19, § 29)

Miquèu Grosclaude : *Lo Gascon lèu e plan* (1977)

« L'article féminin s'élide toujours devant un voyelle : *era taula, er'amiga, ar'escòla, der'escòla*. » (leçon 21^{au} : Eth vilitge, p. 133).

Article definit en occitan (Wikipèdia)

« L'usatge esita sobre l'ortografia de ***era*** davant una vocala : l'uatge aranés escriu ***era*** mès l'a finala s'amudís davant la vocala : ***era istòria***. Un autre usatge, frequent dins l'Estat francés, remplaça ***era*** per ***er'*** davant vocala : ***er'istòria***. »

| | Cadena Parlada (realisacions) | Grafias en usatge | | |
|--------------|----------------------------------|---------------------------|--------------------------|--------------------------|
| | | Aran | Bigòrra | Biarn |
| ILLA AQUA | [er á̯ywɔ, er á̯yo] | <i>era aigua</i> | <i>er'aiga</i> | <i>er'aiga</i> |
| ILLA HÒRA | [er òra, era òra] | <i>era ora</i> | <i>er'òra</i> | <i>er'òra</i> |
| ILLA HÈRBA | [era èrba, er èrba] | <i>era èrba</i> | <i>era ièrba</i> | <i>er'èrba</i> |
| ILLA SCHÒLA | [era skòlo] | <i>era escòla</i> | <i>er'escòla</i> | <i>er'escòla</i> |
| ILLA ÌNTRATA | [era ntráðo] | <i>era entrada</i> | <i>er'entrada</i> | <i>er'entrada</i> |

1.5.2. Aferèsi

Ena cadena parlada, era /e/ iniciala deth articol pirenenc que s'eishavaneish darrè tot mot acabat per ua vocala : ***que's manquà 'r izard, que nse cau barrà 'ra pòrta***, ètc. Deth aute costat dera frontèra politica, que s'a pres er'abitud de notar er'aferèsi [=

de nutá r aferèzi] ath darrèr dera conjoncion de coordinacion **e** < ET (localaments : i) : **er'aigua e 'th huec, eras oelhas i 'ras crapas**, etc. Que's pòt observar que, d'un punt de vista tipografic, e's sòl utilizar alavetz ua sòrta d'apostròfa « ath denvers ». Er'aferèsi deth articol ath darrèr dera conjoncion de coordinacion ja's hadiá en ancian provençal (lemozi), a on eth articol masculin **lo** e passava a .l en contact dera dita conjoncion, mès mès generalaments darrèr tot mot acabat per ua vocala. Comparatz :

E.l rey lur dis → E 'th arrei que les dishec

E si.l Dalfi no vos agues aital sen mes → E si 'th Dalfin non vos aguesse atau metut sen

Ni.l comte → Ni 'th comde

Fo.l pros coms de Barsalona → que ho 'th pros [valent] **comde de Barcelona**

(trèit dera nòva **Abril issi' e Mays intrava**, de **Raimon Vidal de Basalú**)

Eth aranés non nòta cap er'aferèsi deth articol pirenenc.

Jean Bouzet : *Manuel de Grammaire Béarnaise* (1975)

« L'aphérèse de **e** dans eth, era, eths, eras a lieu, non seulement après les prépositions (...), mais pratiquement dans la prononciation après tout mot finissant par une voyelle. Ex : *que-s gahè'rascouba - qu'escribou'ra letra - que cau préne'ra perméra*, etc. » (pp. 19-20, § 30, na en baish de pagina (!)).

Miquèu Grosclaude : *Lo Gascon lèu e plan* (1977)

« **eth e era** s'élident aussi après le préposition « **e** » : **eth regent e'ra soa familha, eth regent e'th curè**. Les deux élisions peuvent se faire simultanément : **eth regent e'r'escòla**. » (p. 133).

Conclusion

Ara lutz d'aqueste brèu inventari, qu'apareish netaments que, sus mès d'un punt, eth aranés be's destria claraments dera lenga literària, tau coma Loís Alibèrt e l'a poduda definir, subera sola base – arrebrembam-ac – deths dialèctes «lengadocians». Aquera distància entre eth occitan parlat en Aran e 'ra nòrma alibertina que ten a duas arrasons essencialas. D'ua man, plan solide, era filiacion gascona, aquitana, deth aranés de qui a estretaments condicionat eth sòn consonantisme, e der'auta, era singularitat dera sua situacion istorica, politica, de qui l'a permetut de perpetuar tot un hèish de solucions arcaïzantas aras quaus eths dialèctes estant-se ena mouençça francesa an fenit per arrenonciar. Ara, cap deths trèits peths quaus eth aranés e s'esluenha deth lengadocian «estandard» non l'au pertanh en pròpi. Toti, sense

cap d'excepcion, que s'arretròban en bèth aute cornèr dera Tèrra d'Òc - en generau, en d'autas zònas conservatritz, coma per exemple, eths parçans alpencs. De tant qu'aqueras caracteristicas de qui, en un prumèr moment, e poirian aparéisher coma bèth shinhau «estranyas» - ath sens, a on eth gascon madeish e podia paréisher «estrany» aths Tolosencs dera Etat Miejancèra -, non hèn, en definitiva, que confirmar era occitanitat foncièra dera lengua aranesa.

Bernart Arrous

Hereuèr 2008

Estudi 3

Aranés de referéncia e occitan referenciau. Eth besonh d'un modèl sople

Jordi Suïls (1968)

Era codificacion der occitan presente un trèt definidor, particular, que sovent hè qu'aguesta lengua non pogue èster tractada pes madeishi paramètres qu'ua auta lengua romanica en procès d'establiment coma eth catalan, eth retoromanic o eth galhec. Era codificacion occitana se tròbe a miei camin enter era consolidacion d'ua referéncia comuna e era pòga implantacion d'a on proven. Eth sòn caractèr ei basaments sople, adaptable a quinsevolh varietat pera simpla aplicacion d'un critèri de correspondéncia grafia-son o mès exactaments grafia-fonèma.

Donques, era madeisha circonstància qu'a servit entà qu'era grafia classica siguesse acceptada quasi pertot a hèt que non i aguesse ua priorizacion d'ua descripcion en tèrmes morfosintactics o lexics, per exemple, de çò que'n poiřiem díder ua lengua estandard.

Òm se pòt demanar, totun, sus eth besonh reau d'ua varietat que'n digam es-standard. Era sua utilitat, ara per ara, serie en dus terrens de desenvolopament incipient dera implantacion dera lengua: er ensenhament, sustot en ambit internacionau; e es mejans de comunicacion. En çò que tanh ar ensenhament, hèm referéncia ara preséncia non cap mespresable der occitan en universitats de dehòra d'Occitània e ara tanben creishenta difusion formau der occitan laguens madeish d'Occitània, mès a estudiants que non an cap recebut era lengua per via mairau. Totun, cau tostemp auer en compde era importància des parlants que coneishen era lengua per auer-la recebut ena família, e que se pòden veir reconeishudi en un modèl de lengua escrita a on simplaments se da ua correspondéncia, coma auem dit, grafia-son sense mès, mès non pas en un modèl a on i a ua prescripcion fòrta en sens morfosintactic o lexic, o encara estilistic.

Qüestionam, donques, era vertadèra utilitat d'acostar er aranés, per via deth

trabalh sus es materiaus de referéncia entad aquera varietat (per exemple, libres de tèxte, gramatiques prescriptives, diccionaris o materiau normatiu en generau), de cap a un occitan referenciau qu'a d'estar encara definit e descriu en detalh mès que podem endonviar coma un lengadocian centrau, damb es trèts arcaïzanti e de centralitat territoriau que li dan era base entà estar un referent d'aplicacion larga.

Se totun calguesse explorar es possibilitats en aqueth sens, poiriem trobar trèts que hèn a contrastar er aranés damb era rèsta de gascon de delà dera termièra interestatau e que, ath madeish temps, la hèn a acostar-se entàs parlars orientaus deth triangle Garona-Arièja, e donques de cap ath lengadocian.

Ne causiram bèth un que pòt estar interessant peth sòn caractèr emblematic. Mès mos mantieram ara per ara en niveù dera exemplificacion d'ua ipotèsi: s'er usatgèr mejan der aranés coneishesse pro es dues varietats, poirie causir enter er aranés madeish e eth lengadocian referenciau, o ben per ua tresau opcion que, sus era base dera lengua ena sua forma autoctòna e tradicionau, renoncièsse a adoptar quauqui trèts emblematicaments gascons, absenti en bona part der aranés, e amièsse, entad aqueri trèts, ara forma mès propèra deth lengadocian. Aquerò simplaments serie non forçar es causes e mantier-se parièraments laguens d'un referent panoccitan, mès prescriuer en favor de formes lengadocianes que se contradiden damb es autocònes (coma tanben era prescripcion fòrta en favor de formes pangascones) serie riscar entà ua finalitat qu'ara per ara non s'ac vau.

Era mia propòsta, donques, passarie en tot cas per deishar que s'establissem entara Val d'Aran, coma entara rèsta de parçans, ua dualitat entre es formes autocònes, localistes se se vò, e un estandard o uns subestards regionaus (gascon, lengadocian, calerie pensar s'ei plantejable optar enter dus), dualitat que derive, coma auem dit, des particularitats de çò que demanen es ambits d'usatge der ensenhament e (sustot) des mèdies.

1. Quauqui trèts emblematics que pòden acostar er aranés de cap a un “occitan referenciau”

1.1. Eth tractament dera representacion v/u enter vocaus

Aguest ei un aspècte damb ua cèrta variacion en aranés: i a d'entrada ua esitacion entre u/v enes derivats deth tipe actiu-actiu/activa. Trèt d'aguesti casi, que son mots d'entrada recenta en aranés, trobam formes en u coma doriu-doriua, en coëréncia damb era preséncia sistematica de u enes formes deth tipe auer, cantaua, auet. Mès aquerò ei d'ua auta forma en aranés de Pujòlo: es formes son aquiu aver, cantava, auet, e dera madeisha forma trobam alternança -iu/-iva en formes coma actiu/activa.

1.2. Era abséncia d'a epentetica

En mots qu'etimologicaments son iniciats per r, en gascon ei pro respandut eth fe-

nomèn dera insercion dera vocau a epentetica (arrason, arriu, arròca). Per contra, en aranés aquera insercion non ei freqüenta sonqu'ena part baisha dera val. Dehòra d'aquiu, non trobam sistematicaments era a epentetica sonque en mots coma arren, arríder e pògui mès.

1.3. Era qüestión deth que enonciatiu

Cau díder qu'eth cas comun en aranés ei era manca de *que* enonciatiu, un trèt que contrasta damb era rèsta deth gascon e, per contra, mòstre eth madeish foncionament qu'en occitan non gascon. En aranés, era utilizacion deth *que* enonciatiu pren un caractèr puraments emfatic.

1.4. Era morfología des pronoms de complement

Aguest trèt a ua relacion dirècta damb era preséncia de *que* enonciatiu: es pronoms de complement dan formes elidides aquiu a on van seguides de mot començat per vocau (m'auie dit aquerò; da-m'ac). Mès aqueres formes non dan elision s'era vocau ei ath finau deth mot precedent (se me vò parlar; se lo vò portar). Era elision sus es formes que seguissen a era logica dera queiguda dera vocau a finau de mot (me > m'; lo > l') e non demane sistematicitat enes contèxtes, de manèr que podem trobar elision o non tot depenen de s'era forma que seguís ei iniciada o non per vocau (lo vò veir; l'a vist). Aquiu a on se da, era elision sus formes precedentes acabades per vocau demane, a diferéncia deth cas anterior, sistematicitat, e per aquerò ei un hèt estranh aquiu a on era preséncia d'enonciatiu ei baisha o non sistematica; ei a díder qu'er enonciatiu foncione, aquiu a on ei sistematic, coma un supòrt fonetic entara elision des pronoms. E donc, aqui a on aquera elision ei sistematica, n'ei tanben era preséncia deth *que* enonciatiu.

2. Quauqui trèts qu'aluenhen er aranés d'un “occitan referenciau”

2.1. Era preséncia de pluraus en -i

Ei evident qu'aguest trèt morfològic represente ua especificitat pro particular der aranés, non sonque ath dauant der occitan referenciau mès ath dauant der occitan en ensemble. Ei, totun, comparable ath cas des pluraus provençaus, que trobam enes determinants e adjectius pluraus de forma sistematica.

2.2. Era morfología d'articles definits

Er aranés mòstre era morfología d'articles definits pròpia deth gascon dera montanya, a on se conserven es formes eth-era. Er article plurau unic, *es*, ei tanben ua especificitat aranesa laguens deth gascon, encara que non pas exclusiva.

2.3. Era manca de dobla seleccion d'auxiliar

Aguesta ei ua caracteristica aranesa unica en domèni occitan, ben problablamens coma resultat dera interferéncia istorica deth catalan. Era preséncia d'un auxiliar unic da lòc a un funcionament parallèl ath deth catalan vesin der aranés. Es verbs occitans que seleccionen auxiliar èster enes tempsi perfectius son es que reben eth nom de verbs de cambi d'estat o de moviment, tecnicaments dits inacusatius (*arribar, passar: son passadas*), e tanben es ergatius (*honer-se: se son honudas*) e es pronominaus (*pendir-se: se son pendidas*); es reflexius admeten tanben en part aqueth auxiliar, mès l'usatge comun, istoricamens, en gascon, ei damb auxiliar *auer* s'eth reflexiu non rebat pas ua referéncia biunivòca enter Subècte e Objècte Dirècte (*se son vistas; s'a vist la man*), mès ei mèsalèu estranh en cas des passives pronominaus (*que son estadas vistas, mès lèu que que se son vistas*). Per ua auta part, er occitan en generau hè sense concordança Subècte-verb es oracions damb verbs inacusatius s'eth subjècte ei de nombre indefinit, mès, en préner auxiliar èster, aqueri verbs hèn concordança damb eth sòn Subjècte enes tempsi perfectius (*arriba toristas vs. ne son arribats pro, de toristas*). Cau díder qu'es verbs intransitius purs (es que non entren laguens dera categoria d'ergatius e inacusatius) prenen auxiliar *auer* e concòrden tostemp damb eth Subècte (*Joan a travalhat tota era setmana; aciu i travalhan tres obrèrs*). En aranés, era existéncia d'un solet auxiliar (*s'an vist; an estat vistes; n'a arribat pro, de toristes*) semble qu'a propiciat que tant es ergatius coma es inacusatius e toti es intransitius manifèsten manca de concordança damb eth subjècte s'aqueith ei de nombre indefinit e independentament de qu'eth temps sigue perfectiu (*se n'a vist moltes, de crabes; n'a arribat pro, de toristes; aciu i travalhe tres obrèrs*).

2.4. Orde des pronoms de complement ath costat der infinitiu

Tostemp ath darrèr, tanben se va precedit de prespcion: *entà's cauhar/ per se calfar* serie er orde generau en occitan non aranés.

2.5. Introducció des interrogatives indirèctes

Damb *se* (*se qué, se qui, se com...*). Aguest trèt se da tanben enes varietats gascones vesies der aranés.

2.6. Ahèrs de particularisme lexic

Sovent en relacion damb contacte de lengües: ua seguida de formes tradicionaus araneses responen ath contacte damb eth catalan o er aragonés (*amo, calaish, dinèrs...*).

2.7. Ahèrs estilistics

Les trobam sustot ena ordenacion de mots: *hilh mèn per mon hilh*.

2.8. Ahèrs lexics pujolencs

Cotrasten damb era rèsta der aranés; aciu *degun* en lòc de *arrés*.

2.9. Er imperfècte damb -v- de Pujòlo

Ei particular en aranés, mès fòrça estienut en gascon non aranés.

2.10. Era morfologia verbau.

Ei dada a mostrar particularismes, enquiat punt qu'en naut aranés trobam formes proparoxítònes inexistentes ena rèsta der occitan.

3. Trèts a on er aranés coïcidís damb eth gascon generau

3.1. Trèts fonetics

Caracteristics deth gascon (pèrta de n intervocalica, resultat n < nd...).

3.2. Expression deth gerondiu

En tot+infinitiu coma forma predominanta en aranés. En gascon generau trobam aguesta forma, o era forma *en+*infinitiu o simplaments eth gerondiu morfologic. Ena rèsta der occitan trobam *en+gerodiu* entre aguestes formes, mès non pas era forma aranesa.

3.3. Manca de partitiu

Eth gascon contraste damb era rèsta der occitan pera abséncia d'article partitiu, e donques trobam çò de madeish en aranés: *voi pomes* vs. *voi de pomas*.

3.4. Manca de possessiu lor, e preferéncia pes possessius articulats

Aguesta manca non ei cap generau en gascon, mès aumens en gascon dera montanya ei mès infreqüent: *era sua casa* vs. *la lor maison*. Ath costat d'aquerò, es possessius aranesi, coma es gascons en generau, son articulats damb excepcions molt particulars: *era mia casa* vs. *ma maison*. Formes araneses deth tipe *sa pair* son arcaïsmes; en tot cas, *sa* ei era sola forma de possessiu non articulat que manten ua cèrta vitalitat en aranés.

3.5. Opcion per/entà.

Un trèt generau deth gascon, absent ena rèsta der occitan, a on era soleta opcion ei per: *ac hèsqui entà tu* vs. *lo fau per tu*.

3.6. Abséncia d'article damb noms pròpris

Tanben fòrça generau en gascon: *Joan ei eth mèn amic* vs. *lo Joan es mon amic*.

3.7. Usatge de preposicion a damb objècte dirècte

Un trèt sintactic fòrça particular deth gascon per oposicion ara rèsta der occitan: *auem vist a Joan* vs. *auem vist lo Joan*.

3.8. Expression dera negacion

Aquest punt presente un trèt caracteristic der aranés e ath madeish temps un trèt caracteristic deth gascon en generau, enes dus casi en contrast damb era rèsta der occitan. En aranés, era negacion pren era forma tipica d'advèrbi *non* preverbau damb, opcionaument, era preséncia d'un component postverbau *pas/cap* (*non a (cap) vengut*). Era dobla negacion ei tanben pròpria deth gascon en generau, mès damb freqüència damb advèrbi preverbau *ne* e postverbau *pas* (*ne n'a pas portat*). Ena rèsta der occitan, en contrast, era negacion ei tipicaments postverbau, jos era forma *pas* (*es pas vengut*). En gascon generau ei estienuda era forma *que* (*non avèva que dus hilhs*) entara quantificacion negativa, ena rèsta der occitan pren tanben era forma *aviá pas que dos filhs*. Totun, era forma *sonque* a d'estar considerada coma non particulara der aranés.

4. Ahèrs grafics

4.1. Era represencion des pluraus femenins en -es e de formes verbaus damb eth madeish contèxte fonetic.

Ei clar qu'aquest trèt grafic, exclusiu der aranés, mèrque ua divergència importanta enter eth foncionament dera ortografia occitana aplicada ar aranés particularament e era sua aplicacion ar occitan generau. Aguesta ei ua caracteristica des tèxtes aranesi que les hè immediataments identificables e, donc, foncione coma un trèt particularizant que ne dificulte era assimilacion a un modèl generau.

5. Un plantejament sople entar aranés

Eth tèrme “aranés” admet definicions en dus sens per çò que tòque ara lengua: o ben ei ua realitat dialectologica, o ben ei ua realitat sociolingüistica representada en un referent estandard locau (ne podem díder paraestandard aranés), ei a díder era varietat de lengua qu'a servit coma referent normatiu entar ensenhament dera lengua e

en bona partida entara practica literària des escrivans aranesi. Dempús d'ua trentea d'ans de practica planificadora, se pòt parlar d'un establiment der estandard aranés. Mès, en tèrme dialectologics, er aranés presente varietats locaus que confluïssen de cap as varietats de delà dera termièra.

Se da eth cas, totun, qu'es très qu'auem identificat coma confluents damb er occitan "referencieu" son aqueri a on er aranés s'aluenhe deth gascon transfrontalier, e es très a on determinades varietats der aranés manifèsten un ligam de cap ath delà dera termièra aluenhen er aranés d'aqueth occitan "referencieu".

En tot aquerò, ei excepcion eth très sintactic qu'auem descrit entàs auxiliars e es particularitats dera concordança d'ergatius, inacusatius e intransitius. Aqueth très, ac auem vist, non mòstre continuïtat damb cap d'auta varietat occitana.

Podem contemplar aqueth enjòc en tot bastir tres tèxtes damb tres possibilitats de realization. Era prumèra ei un tèxte que rebat es très der aranés pujolenc. Veiram com bèth très qu'a un caractèr territoriauments mercat en aranés se correspon damb çò que podem trobar en un nivèu mès larg en gascon. Era dusau rebat çò que'n poiríem díder aranés de referéncia, a on auem adoptat bera convencion que vò evitar eth particularisme dera realization grafica -u- de çò qu'ei foneticaments [w] en auer o anaua, e s'i adòpte tostemp -v- entad aqueri casi. Eth tresau vò rebàter ua varietat baish aranesa, damb quauqui très de confluència damb eth gascon de delà dera termièra. Aquiu aplicam era grafia panoccitana que hè -a çò que foneticaments pòt estar -e (casas, planas entà [kazes] [planes]). A mès, i adoptam era distincion d'auxiliars e atau mostram com, sense practicament gésser der aranés, mos podem trobar en ua practica escrita que non sembla particularizanta.

Qué podem proposar? Pensam que non i a reduccion possibla: er aranés ei gascon de montanya e, per molt que i pogam trobar très que l'acòsten entath lengadocian quasi vesin, era realitat ei qu'es sòns très definidors non admeten d'estar redusits ath lengadocian se mos volem mantier laguens der aranés. Encara, es très que son presenti en aranés e que mòstren continuïtat damb er occitan vesin, en baish aranés, cèrtaments acòsten er aranés ath domèni gascon en sens larg, as sòns très mès estienudi, e per contra l'aluenhen d'aqueth lengadocian referencieu. Se, totun, mos cau profitar dera variacion intèrna entà bastir un aranés propèr deth referencieu, era opcion mès simpla ei mantier-se en aranés que'n didem de referéncia, a on quauqui très pangascons son absenti, e, se cau, adoptar convencions panoccitanes coma es formes -a e era distincion d'auxiliars.

Entà exemplificar era nòsta argumentacion e aufrir un cas practic des options que se mos daurissen ath dauant, podem portar aqueres options ath bastiment de quate tèxtes que i donguen còs. Son quate versions dera Prabòla deth Hilh Prodigue, un tèxte sovent utilwizat entà exemplificar es très d'ua varietat lingüistica. Entà ua version lengadociana d'aqueth tèxte podem reméter a <http://www.corpusdelaparole.culture.fr/spip.php?article40>, per exemple. Aufriram prumèr es tèxtes; eth prumèr anarà seguit d'ua analisi d'acòrd damb era classificacion de très qu'auem vist mès tà naut. Enes auti poiram hèr un simple exercici de contrastacion qu'explicaram ara seguida, en apartat de conclusions.

Tèxe 1, damb formes naut-araneses:

Un òme non (3.8) avie (1.1) sonque (3.8) dus hilhs. Eth (2.2) mès joen (1.3) diguec a sa (3.4) pair: "Ja ei ora de que siga eth mèn (3.4) amo (2.6) e me cau dinèrs (2.6); cau que créishiga (2.10) e que veiga mon. Se voletz, partitz es vòsti (2.1) bens e datz-me çò que me (1.4) pertòque. "Ò hilh mèn (2.7)", diguec eth pair, "com a volgues (4.1): ès un dolent e seràs castigat". Alavetz dauriguec un calaish, partiguec es sòns bens e ne hèc dues parts.

Quauqui dies (4.1) mès tard, eth gojat se n'anèc deth parçan en tot hèr-se (3.2) eth capinaut e sense díder adiu a degun (2.8). Quan avie (2.3) passat per fòrça planes, bòsqui e rius (1.2), arribèc en ua grana vila a on despenec toti es dinèrs. Ath cap de quauqui mesi non sabeve (2.9) se qué (2.5) hèr, li calguec véner era ròba a ua vielha hemna e se loguèc entà (3.5) estar vaillet. Li manèren qu'anèsse tás camps entà tier compde es saumèrs e es bueus. Alavetz estèc molt malerós. Non aguec mès lhet entà dromir de nets ne huec entà cauhar-se (2.4) quan avie heired. Bèth còp avie tanta hame que s'aurie plan minyat aqueres huelhes de caulet e aquera fruta poirida que mingén es porcèths. Mès degun li dave arren.

Ua net, damb eth vrente ued, se deishèc quèir sus un tronc e vedeve pera hièstra es audèths que volaven laugèrs. Dempús veiguec campar en cèu era lua (3.1) e es lugrancs e se diguec en tot plorar: "Aqui, era casa deth mèn pair ei plea de vaillets qu'an pan, vin, ueus e hormatge (3.3) tant que ne vòlen. Mentrestant, jo me morisqui de hame aci".

[mercam es très qu'auem remercat ena argumentacion prealabla, e seguim era madeisha numeracion e ordenacion. Totun i hè bèth subapartat que mos a semblat de besonh:]

1. Trèts que pòden acostar er aranés ar usatge "referenciau":

- 1.1 tractament de u/v: en aranés de Pujòlo ei tostemp -v-
- 1.2 abséncia de a- epentetica (*riu per arriu*)
- 1.3 abséncia de *que* enonciatiu. En tresau tèxe veiram eth contrast
- 1.4 morfologia de pronoms de complement. En tresau tèxe veiram eth contrast

2 (a) Particularimes aranesi, damb preséncia generau en aranés e, en bèth cas, en ua partida de dehòra dera val:

- 2.1 pluraus en -i particulars der aranés damb preséncia tanben enes varietats gasones vesies
- 2.2 es articles deth gascon montanhòu
- 2.3 auer coma auxiliar unic. Eth tresau e quatau tèxtes mòstren es formes panoccianes
- 2.4 orde des pronoms de complement ath costat der infinitiu, tostemp ath darrèr, tanben se va precedit de presposicion: *entà's cauhar/per se calfàr* serie er orde generau en occitan non aranés
- 2.5 introduccion des interrogatives indirèctes damb *se* (*se qué, se qui, se com...*).

Aquest trèt se da tanben enes varietats gascones vesies der aranés

2.6 ahèrs de particularisme lexic, sovent en relacion damb contacte de lengüies: ua seguida de formes tradicionaus araneses responen ath contacte damb eth catalan o er aragonés (*amo, calaish, dinèrs...*). Enes tèxtes segon, tresau e quatau les substituïram en part per formes d'origina occitana

2.7 ahèrs estilístics que trobam ena ordenacion de mots: *hilh mèn per mon hilh*

2 (b) Trèts que responen a variacion intèrma aranesa, sense preséncia generau en aranés mès que pòden èster presenti dehòra der val:

2.8 ahèrs lexics pujolencs, que cotrasten damb era rèsta der aranés; aciu *de-gun* en lòc de *arrés*. Evidentaments, aguesti elements son absenti enes tèxtes segon, tresau e quatau

2.9 er imperfècte damb -v- de Pujòlo ei particular en aranés, mès fòrça estienut en gascon non aranés

2.10 era morfologia verbau ei dada a mostrar particularismes, enquiat punt qu'en naut aranés trobam formes proparoxítònes inexistentes ena rèsta der occitan

3. Trèts pangascons absenti en lengadocian (les podem contrastar damb ua version lengadociana deth tèxte):

3.1 trèts fonetics characteristics deth gascon (pèrta de *n* intervocalica, resultat *n < nd...*)

3.2 expression deth gerondiu: *en tot+infinitiu* coma forma predominanta en aranés. En gascon generau trobam aguesta forma, o era forma *en+infinitiu* o simplaments eth gerondiu morfologic. Ena rèsta der occitan trobam *en+gerodiu* entre aguestes formes, mès non pas era forma aranesa

3.3 manca de partitiu

3.4 possessius articulats. Es possessius non articulats son arcaics en aranés, açò se ve en formes fossilizades coma *sa pair*, a on non se rebat eth contrast de genres

3.5 entà coma preposicion gascona

3.8 dobla negacion, pre e postverbau, e expression dera quantificacion negativa

4. Ahèrs de particularisme grafic:

4.1 resultats de '-a+cons. etimologica, foneticaments *e*, grafiat *a* en occitan generau, e en aranés

Tèxte 2, en aranés “de referéncia” e adaptacion lexica e dera representacion v/u (soslinham es dus aspèctes):

Un òme non avie sonque dus hilhs. Eth mès joen diguec a sa pair: “Ja ei ora de que siga eth mèn mèstre e me cau sòs; cau que cresca e que veja mon. Se voletz, partitz es vòsti bens e datz-me çò que me pertòque.” “Ò hilh mèn”, diguec eth pair, “com a volgues: ès un dolent e seràs castigat”. Alavetz dauriguec un calaish, partiguec es sòns bens e ne hèc dues parts. Quauqui dies mès tard, eth gojat se n'anèc deth parçan en tot hèr-se eth capinaut e sense díder adiu ad arrés. Quan avie passat per fòrça planes, bòsqui e rius, arribèc en ua grana vila a on despenec toti es sòs. Ath cap de quauqui mesi non sabie se qué hèr, li calguec véner era ròba a ua vielha hemna e se loguèc entà estar vaitet. Li manèren qu'anèsse tás camps entà tier compde es saumèrs e es bueus. Alavetz estèc molt malerós. Non aguec mès lhet entà dromir de nets ne huec entà cauhar-se quan avie heired. Bèth còp avie tanta hame que s'aurie plan minyat aqueres huelhes de caulet e aquera fruta poirida que mingue es porcèths. Mès arrés li dave arren.

Ua net, damb eth vrente ued, se deishèc quèir sus un tronc e vedie pera hièstra es audèths que volaven laugèrs. Dempús veiguec campar en cèu era lua e es lugrangs e se diguec en tot plorar: “Aqui, era casa deth mèn pair ei plea de vailets qu'an pan, vin, ueus e hormatge tant que ne vòlen. Mentrestant, jo me morisqui de hame ací”.

Tèxte 3, baish aranés damb adaptacion grafica e distincion d'auxiliars (volem remercar com damb aqueri dus aspèctes se pòt bastir ua varietat escrita que s'acoste as parlars vesins deth Coserans):

Un òme non avia sonque dus hilhs. Eth mès joen que diguec a sa pair: “Ja ei ora de que siga eth mèn mèstre e que'm cau sòs; que cau que cresca e que veja mon. Se voletz, partitz es vòsti bens e datz-me çò que'm pertòca.” “Ò hilh mèn”, diguec eth pair, “com a volgas: qu'es un maishant e que seràs castigat”. Alavetz que dauriguec un calaish, que partiguec es sòns bens e que'n hèc duas parts.

Quauqui dias mès tard, eth gojat que se n'anèc deth parçan en tot hèr-se eth capinaut e sense díder adiu ad arrés. Quan èra passat per fòrça planas, bòsqui e arrius, qu'arribèc en ua grana vila a on despenec toti es sòs. Ath cap de quauqui mesi non sabia pas se qué hèr, que'u calguec véner era ròba a ua vielha hemna e que's loguèc entà estar vaitet. Li manèren qu'anèsse tás camps entà tier compde es saumèrs e es bueus. Alavetz qu'estèc molt maleros. Non aguec mès lhet entà dromir de nets ne huec entà cauhar-se quan avia heired. Bèth còp qu'avia tanta hame que s'auria plan minyat aqueras huelhas de caulet e aquera fruta poirida que minjan es porcèths. Mès arrés li dava arren.

Ua net, damb eth vrente ued, que's deishèc quèir sus un tronc e que vedie pera hièstra es audèths que volavan laugèrs. Dempús que veiguec campar en cèu era lua e es lugrangs e que's diguec en tot plorar: “Aqui, era casa deth mèn pair qu'ei plea de vailets qu'an pan, vin, ueus e hormatge tant que ne vòlen. Mentrestant, jo que'm morisqui de hame ací”.

Tèxte 4, aranés de referéncia damb adaptacion grafica e distincion d'auxiliars:

Un òme non avia sonque dus hilhs. Eth mès joen diguec a sa pair: "Ja ei ora de que siga eth mèn mèstre e me cau sòs; cau que cresca e que veja mon. Se voletz, partitz es vòsti bens e datz-me çò que me pertòque." "Ò hilh mèn", diguec eth pair, "coma volgas: ès un maishant e seràs castigat". Alavetz dauriguec un calaish, partiguec es sòns bens e ne hèc duas parts.

Quauqui dies mès tard, eth gojat se n'anèc deth parçan en tot hèr-se eth capinaut e sense díder adiu ad arrés. Quan èra passat per fòrça planas, bòsqui e rius, arribèc en ua grana vila a on despenec toti es sòs. Ath cap de quauqui mesi non sabia se qué hèr, li calguec véner era ròba a ua vielha hemna e se loguèc entà estar vaillet. Li manèren qu'anèsse tás camps entà tier compde es saumèrs e es bueus. Alavetz estèc plan malerós. Non aguec mès lhet entà dromir de nets ne huec entà cauhar-se quan avia heired. Bèth còp avia tanta hame que s'autria plan minyat aqueras huelhas de caulet e aquera fruta poirida que minjan es porcèths. Mès arrés li dava arrén.

Ua net, damb eth vrente ued, se deishèc quèir sus un tronc e vedia pera hièstra es audèths que volavan laugèrs. Dempús veiguec campar en cèu era lua e es lugrangs e se diguec en tot plorar: "Aqui, era casa deth mèn pair ei plea de vaillets qu'an pan, vin, ueus e hormatge tant que ne vòlen. Mentrestant, jo me morisqui de hame aci".

6. Conclusion:

Enes quate tèxtes prealables auem mostrat quate opcions entà escriuer er aranés. N'i a mès, plan segur, mès mos a semblat que damb aquerò podíem dar ua idea deth tipe de paramètres a on mos botjam: es variacions dialectaus intèrnas, que pòden o non auer un ligam damb es territòris vesins; es caracteristiques dialectaus comunes a tot er aranés, tanben damb o sense ligam dehòra dera val; es convencions grafiques que pòden representar particularismes aranesi, singularament era representacion deth son -e- atòn seguit de consonanta etimologica o resultat d'analogia damb aqueth cas, sustot enes pluraus femenins e es tresaus personnes verbaus.

Enes tèxtes dam quate opcions que combinen tres possibilitats de variacion geolingüistica e dues de representacion grafica: aranés pujolenc, aranés centrau, baish aranés; representacion v o u deth son [w] intervocalic (adoptam sistematicament era opcion v) e representacion e o a deth son [e] atòn finau (aplicam sistematicament a ath tèxte baish-aranés e aplicam alternativaments e e a ara varietat centrau).

Era adopcion dera varietat baish-aranesa mos pòt servir entà trobar un aranés sense contrasti massa mercats damb er usatge gascon generau: a- epentetica, que enonciatiu, formes elidides entàs pronoms de complement... E encara mès se i adoptam era representacion a entà e atòna finau e era distincion d'auxiliars. Per contra, auem vist qu'era varietat centrau, que'n didem aranés de referéncia, ei mens marcadament gascona en bèth un d'aqueri très e, complementàriaments, s'acoste tath lengadocian. Entà remerciar encara mès aqueth acostament der aranés entath lengadocian (o entath refe-

renciau, se volem) n'i a pro d'aplicar ad aqueth aranés de referencia ua simpla operacion d'adopcion de très panoccitans: representacion *a* de *e* atòna finau, representacion -v- entà [w] intervocalic, distincion d'auxiliars. Ei aguesta darrèra opcion que podem recomanar se desiram un acostament de cap ath referenciau, e per contra ei era que rebat eth texte tresau era que recomanaríem entà acostar-mos de cap ath gascon generau.

Estudi 4

Distància entre occitan aranés e occitan referencial o estandard

Jacme Taupiac

Al començament de las annadas 80 del sègle XX participèri a la Comission entara normalisacion ortografica dera lengua dera Val d'Aran ambe Pèire Bèc e lo defunt Miquèu Grosclaude. Aquela Comission se reüniguèt mai d'un còp a Vielha e a Barcelona, jos la direcccion d'Aina Moll qu'èra, a l'epòca «Directora general de política lingüística» a la Generalitat de Catalonha. A aquela epòca èri responsable del Sector de lingüistica de l'Institut d'estudis occitans (e mon mestier de professor dins l'ensenhament segondari me permetia pas d'i consacratar tot lo temps qu'auriái volgut). Ai lo remembre de reünions de trabalh intens que se debanava dins la serenitat e ambe una granda eficàcia.

Ne sortiguèt una brocadura intitulada *Nòrmes ortogràfiques der aranés*, publicada pel Departament de Cultura de la Generalitat de Catalunya. (Primièr tiratge : setembre de 1982.)

A partir d'aquel document, l'ortografia de l'occitan aranés, segon las nòrmas de l'Institut d'estudis occitans comencèt de se socializar e, actualament, es impensable d'escriure l'aranés autrament que segon aquela normativa estableida fa gaireben 25 ans. Lo contrast es estabosissent entre las publicacions sortidas abans e après aquela data. Degun escriuriá pas, ara, *Ún lenguatge duç è armuniús, estimat è parlat per tuti, coma se legís dins Amás líric de'ra Val d'Aran* (1972, pagina 9), dins una grafia qu'es una barreja de sucursalisme catalan e castelhan e que nos sembla òrra.

...

L'idèa qu'aviái, al moment de la fixacion de las nòrmas ortograficas aranesas, èra que caliá destriar clarament *codificacion grafica* de *codificacion lingüistica*. Per la *codificacion grafica* ma doctrina èra que caliá l'unitat totala ambe la rèsta de la lenga occitana. Concrètament, aquò voliá dire, per exemple, que caliá escriure *Un lenguatge doç e armoniós, estimat è parlat per toti*. Mas, per la *codificacion lingüistica* mon vejaire èra que caliá daissar tota la libertat als araneses. Me permetiá pas de lor dire qu'«avián pas lo drech» d'emplegar, per exemple, la fòrma *eth lenguatge*, a remplaçar per *eth lengatge*. Soi pas aranés e doncas me permeti pas de dire que, dins l'occitan aranés, cal pas emplegar tal mot o tala fòrma : son los araneses, e eles sols, que pòdon decidir dins quina mesura lor cal aver lo «volontarisme lingüistic» de s'avesinar lo mai possible de l'occitan del nòrd del Pont del Rei, e dins quina mesura pòdon estimar que tala o tala particularitat aranesa, lexicala o grammatical, se deu manténer, quitament s'aquò establís una distància, siá pichona, siá grandassa, al respècte de l'occitan «referencial» o «estandard».

Los exemples son mutiples. Legissi, dins de tèxtes araneses *eth quadèrn, ua airina de consula, eth trebalh, era madeisha consonanta*. Seriá ridicul qu'un «occitanista francés arrogant» se permetesse de dire als araneses : «Es pas aital que vos cal dire. Vos cal corregir aquelas fòrmas tròp localas en : *eth quasèrn, ua aisina de consulta, eth trabalh, era medisha consonanta.*» Dins nòstra lenga occitana que n'i a que la qualifican de «descentralizada», *trabalh, trebalh e tribalh* son tres fòrmas bonas, quitament de *trabalh es, sul terren, immensament majoritari* e donc s'es la fòrma de l'occitan estandard.

Los respècte total de l'«autonomia aranesa» dins lo domeni de la «codificacion lingüistica» èra mon idèa en 1980 e n'ai pas cambiat en 2008.

...

Aquò dich, un còp convengut que los araneses son tant occitans coma los occitans de la Republica francesa o los de la Republica italiana, es plan evident qu'an lor mot a dire, tant coma los «franceses» e los «italians», dins tres domenis de la codificacion de la nòstra lenga, «una dins lo respècte de la diversitat» :

- 1) La codificacion de quelques detalhs de nòrma ortografica ont i a encara divergència dins lo public «occitanografe» (concrètament, n'i qu'escrivon *cantaràn* a la catalana sense cap d'accent e d'autres *cantaràn* a la castelhana ambe un accent; analisi detalhament aquel problema dins *L'occitan escrich*, 2004, paginas 67-103));
- 2) La codificacion de quelques milièrs de mots de formacion sabenta ont lo problema se pause de saber se cal o se cal pas un -e final de supòrt (concrètament, vesi de tèxtes ont Frederic Vergés escriu *eth vèrb* e Aitor Carrera *eth vèrbe*; es evident que totes dos son dos grand sabents e que lors causidas divergentas son tan respectablas una coma l'autra);

2) La codificacion de milièrs de neologismes per far de l'occitan una de las lengas de cultura d'Euròpa. Naturalament, los neologismes d'aquela mena dévon aver la meteissa fòrma dins totas las varietats localas de lenga occitana : pòt pas èsser question de dire *la televista* dins un dialècte nòstre e *la television* dins un autre.

Torni dire que dins aquelas tres question de codificacion lingüistica, lo punt de vista d'un lingüista aranés a tant de pes coma lo d'un lingüista de Montalban o de Niça.

De mai, la politica assimilacionista drastica d'aquela «parisencocracia» qu'es la Republica francesa, fa que la lenga de París menaça de consomar la glotofagia, mentre qu'a la Val d'Aran los poders publics (Generalitat de Catalonha e Conselh generau d'Aran) ménan una politica mai democratica d'autentic respècte de la diversitat lingüistica. La «politica lingüistica occitanista» de la Val d'Aran es, per nosautres los occitanistas de la Republica francesa, un model a imitar que fòrma un contrast formidable ambe la «politica lingüistica assimilacionista» qu'es una tradicion en cò nòstre despuèi 1539 e que n'avèm vergonha. Nosautres, los occitanistas ciutadans franceses, avèm pas cap de leiçon de «democracia lingüistica» a donar als occitanistas ciutadans espanyòls. Es lo contrari : avèm de leiçons a recebre d'eles.

...

La Seccion de lingüistica de l'*Institut d'Estudis Aranesi* a publicadas qualques brocaduras de codificacion de l'occitan aranés :

Reglament dera Seccion de Lingüistica der Institut d'Estudis Aranesis (2003);

Era formacion deth femenin (2003);

Eth vérb èster (2005);

Pronòms Relatius (2005).

I a tanben d'autras publicacion pedagogicas, coma la brocadura *Escríuer en aranés*, de Manuela Ané Brito e Jovita Ané Sanz (1989, 62 paginas).

E Aitor Carrera ven de publicar una excellenta *Gramatica aranesa*.

Çò que m'impressiona, dins aquelas publicacions, es l'unitat de grafia ambe la nòrma de l'*Institut d'estudis occitans* e la granda qualitat lingüistica e pedagogica de tot aquel material.

Los qualques problèmes de nòrma que se pòdon pausar son pas mai importants que los que se pàusan dins d'autras fòrmas localas d'occitan. Se pòdon senhalar, per exemples, los francismes tant presents al sud coma al nòrd del Pont del rei : *blu* per *blau*, *eth sanglièr* per *eth singlar*, *eth caièr* per *eth quadèrn ~ eth quasèrn*, *eth camionur* per *eth camionaire* (?). Per ieu, son la pròva manifèsta de l'occitanitat de l'aranés. La menaça de sucursalisme francés se fa sentir tanben a la Val d'Aran ! Quant als detalhs de codificacion de la fòrma de quelques mots (coma *vèrb ~ vérbe*), de divergéncias d'aquela mena existisson dins totas las lengas de cultura e menàçan pas l'unitat fondamentalala de la lenga occitana. Entre l'anglés de Granda

Bretanya e l'anglés dels Estats Units, i a de diferéncias encara mai bèlas, dins los domenis grafic, lexical emai grammatical: aquò empacha pas l'anglés d'aver l'immenç prestigi d'èsser la lenga veïculara de la planeta. Las qualques esitacions de codificacion presentas dins l'occitan aranés coma dins l'occitan estandard e las diferéncias lexicalas e grammaticalas entre aquelas doás fòrmas de lenga nòstra son quicòm d'acceptable e qu'empacha pas l'unitat fondamentalala de la lenga nòstra.

Fin finala, ai una granda admiracion pel bon trabalh fach per la Seccion de Lingüistica der Institut d'Estudis Aranesi, mai que mai quand constati l'unitat de nòrma grafica ambe l'occitan tal coma s'escriu a l'Institut d'estudis occitans.

...

Lo trabalh de la Comission lingüistica entara confeccion deth traductor catalan-occitan a començat de se far a partir d'una sola fòrma de catalan mas ambe la tòca que lo logicial siá capable de produsir de traduccions dins doás fòrmas d'occitan : l'occitan aranés e l'occitan estandard (o «referencial»). Coma la reunions se son fachas duscas ara a la Val d'Aran, coma l'occitan i es lenga oficiala e coma es la Generalitat de Catalonhha que paga, totas aquelas circonstàncias sociolingüísticas me sémlan justificar perfièchament aquela causida de doás fòrmas d'occitan.

La granda utilitat d'aquela empresa collectiva es de nos encaminar cap a la codificacion de mai en mai precisa d'un occitan estandard a basa de lengadocian. L'essencial es reglat. Preni dos exemples :

1) Malgrat la preséncia, sul terren, de l'article le dins un vast airal a l'entorn de Tolosa, totes sèm d'acòrdi qu'en occitan estandard disèm *lo pan, lo vin*.

2) Malgrat la preséncia en lengadocian meridional e en gascon, de las fòrmas *çò qu'as dit, lo dret, a dreta, la fruta, lo trabalh fach — lo tribalh hèit*, totes sèm d'acòrdi qu'en occitan estandard causissèm lo tractament plan mai central en Occitània e plan mai majoritari *çò qu'as dich, lo drech, a drecha, la frucha, lo trabalh fach*.

Mas, tot es luènh d'èsser reglat dins lo domeni immens de la causida dels lexèmas mai generals. Quin es lo mot mai general, lo de l'«occitan larg» coma ditz Patric Sauzet, per dire un *mainatge* (occitan aranés e occitan de força autres regions); *ua truha ~ ua trufa ~ ua mandòrra* (occitan aranés e tanben occitan d'autres regions occitanas, quelques unas plan alunhadas de la Val d'Aran)? Soi persuadit que la bona solucion se pòt pas improvisar sonque en donant la paraula a quinze personas assetadas a l'entorn de la meteissa taula. L'examèn pacient e atentiu de las mapas dels atlasses lingüistics e de lecturas nombrosas e divèrsas m'an portat a la conviccion que lo tèrme de l'occitan estandard (present d'un cap a l'autre del grand domeni lingüistic occitan) èra d'una part *lo mainat*, d'autra part *la trufa*. Aqueles dos mots

demandan pas un grand «volontarisme lingüistic» a un aranés : *mainat* es portat dins lo Petit diccionari de Frederic Vergés coma un dels lexèmas que s'emplégan en defòra de la Val d'Aran, a costat de *mainatge*; e *trufa* es un del mots de l'occitan aranés per *la pomme de terre* (francés), *la patata* (catalan).

Mas, soi persuadit que cal pas creire que sovent se pòt determinar «a vista de nas» quines son los lexèmas o los torns sintactics mai dignes d'èsser causits coma los de l'occitan estandard en rason de lor espandiment. Per trabalhar seriosament, cal passar un temps ènòrme a analisar la realitat encara socializada e revelada mai que mai pels atlasses lingüistics. Dins las reunions de Vielha, avançam un pauc dins lo bon sens e perdèm pas nòstre temps. Mas, nos cal pas aver la pretension d'arribar cada còp a la solucion definitiva. En gròs, fasèm de bon travalh, mas nos cal pas aver l'arrogància de nos creire infallibles.

...

Aquò dich, cossí far per tal que l'occitan aranés aja «*un melhor encaish ena lengua referenciau*»?

Vesi doás orientacions de la codificacion que van dins aquel sens :

1) Me sembla una plan bona causa qu'a la Val d'Aran los lingüistas de la «Section de lingüistica der Institut d'Estudis Aranesi» fàgan l'esfòrç de fòrabandir los catalanismes e los castelhanismes (que, de segur, son inconeguts al nòrd del Pont del Rei, per de rasons sociolingüísticas evidentes, e doncas establissen una divergència ambe l'occitan estandard).

Un sol exemple : al lòc de *era física*, *era música*, *era política*, que dévon èsser de fòrmas recentas, se recomanda de dire, coma gaireben pertot en Occitània : *era fisica*, *era musica*, *era politica*. Es un esfòrç benvenut per se desliurar del sucursalisme lingüistic catalan e castelhan.

Es amusant de constatar que, per contra, los occitanistas del país niçard son gloriooses de lor particularitat prosodica anciana e autoctòna dins los mots *la física*, *la música*, *la política*. Es, per eles, l'ocasion de dire : «Vesètz que nòstre occitan es pas brica dins una situacion de sucursalisme francés !»

Cossí que siá, çò segur es que dins de lexèmas d'aquela mena, l'acentuacion paroxitonica remonta a las originas de lenga, es la mai generala dins los parlars actuals e es doncas la de l'occitan estandard. Aquò es vertat tant dins los mots de formacion populara (*las lagremas*) coma dins los mots de formacion sabenta (*l'informatica*).

Per s'encaminar cap a l'unitat — en admetent, pasmens, las particularitats localas respectables — cal que los occitans de la Republica francesa fàgan l'esfòrç de fòrabandir los francismes; los de l'Estat espanyòl, los castelhanismes e los catalanismes; e los de la Republica italiana, los italianismes.

2) Tant a la Val d'Artan, coma dins las «Valadas alpinas italianas», coma dins

l'immensa Occitània francesa, cresí necessari qu'ajam pro de contactes entre especialistas de la codificacion de la llenga nòstra per tal de fargar un vocabulari comun dins totes los domenis ont cal crear de neologismes : *matemáticas, biología, geografía, informática, lingüística, micología*, etc. Siquenon, las divergéncias seran inevitables per la rason tota simple que çò que nos semblarà mai «natural» serà l'alinhament sul vocabulari de nòstras «lengas estatalas» respectivas : lo francés, lo catalán e l'italian. (Una nuança : cresí qu'a la Val d'Aran, lo pes del catalan es tanben plan important.)

Prendrai un exemple : per un occitan francés, çò mai natural es de dire *la democracia, l'encyclopedia, la farmacia, la toponimia*; per un occitan aranés *la democràcia, l'enciclopèdia, la farmàcia, la toponímia*; per un occitan italian *la democracia, l'encyclopedia, la farmacia, la toponomàstica* (puslèu que *la toponimia*). Quand sabèm que se ditz tanben *a democracia* en portugués, solide que la fòrma *la democracia*, sentida coma perfièchament naturala per un occitanoparlant de França o d'Itàlia, se pòt pas considerar coma un òrre francisme o un italianisme criticable. Mas, es qu'un aranés aurà pas de pena a admetre que dins un «occitan blos» cal accentuar *democracia*? Es qu'es realista d'aver lo volontarisme lingüistic, a la Val d'Aran, de passar de *democràcia a democracia*, coma de passar de *física a fisica*? Ieu, soi pas aranés. E doncas, sabi pas quin ès lo vòstre «sentiment lingüistic» davant un problema d'aquela mena. Mas, soi prèst a respectar lo vòstre biais de veire quina es la melhora nòrma possibla (o la mens marrida !) Es que cal dire : «Vos recomandam de dire *era física* e cal considerar que *era física* es una fòrma sucursalista castelhana que cal evitar», o «*Era física* es la fòrma recommandada mas la fòrma *era física* es tolerada tanben»?

La question se pauza per de milièrs de mots — que son en general de mots del registre sabent — ont plan sovent i a convergència d'una part entre lo francés e l'italian e d'autra part entre lo castelhan e lo catalan. Los mots qu'illústran plan aquela dobla possibilitat d'accentuacion son *la democràcia, l'enciclopèdia* (accentuacion a la castelhana e a la catalana), *la democracia, l'encyclopedia* (accentuacion a la francesa e a l'italiana). Fin finala, la pichona Val d'Aran se tròban èsser la sola region occitana ont *era democràcia* e *era enciclopèdia* son de fòrmas sentidas espontanèament coma las que demàndan pas cap de «voluntarisme lingüistic». Es que cal, dins la codificacion de tota la lenga occitana, admetre una «dobra nòrma» d'accentuacion pels mots terminats en -ia?

D'avança, sabi pas la responsa institucionala que se donarà. Mas, sabi que nos cal una «paraula institucionala» que faga la sintèsi de las «paraulas individualas».

...

Per resumir aquela question, vesi necessàrias doás causas : d'una part un organisme que jògue lo ròtle d'*Acadèmia de la lenga occitana* — quitament se pòrta pas aquel nom —, que sos membres sián plan atencionats a las realitats sociolingüisti-

cas; d'autra part una granda soplesa dins l'establiment de nòrmas graficas, lexicalas, sintacticas.

Una autoritat encargada de la codificacion d'aquel punt plan sensible qu'es la grafia d'una lenga s'engana pas jamai quand permet mai d'una grafia pel meteis mot, se per cas risca d'i aver de «resisténcias socialas» davant l'assag plan justificat d'introducir mai de coéréncia o de fonologicitat. Cal respectar totas las sensibilitats personalas. E es aital qu'una granda convergéncia se farà sul còr de la nòrma qu'es, de plan l'uènh, çò majoritari.

La lenga nòstra es divèrsa «sul terren» e pòt pas èsser question d'admetre pas aquela indefugibla diversitat. La diversitat, la cal admetre tanben dins la «nòrma lingüistica» quand una partida del public ten fòrt e mòrt a una certana nòrma, justificada scientificament. Es una carrièira bòrnia de confondre la lingüistica prescriptiva ambe la politica o l'etica, es a dire en considerant que las nòrmas establecidas per l'autoritat an una valor legala o morala e que los que s'i plégan pas «cométon un delicte» o «màncan de deontologia». La solucion es d'aver una granda soplesa cada còp que de lingüistas competents son pas d'acòrdi sus tal o tal punt. Es aital que s'evitaran las polemicas que fan pèdre de temps a tot lo mond.

Fòrça grandas lengas d'Euròpa conéisson de «nòrmas doblas» que las empàchan pas d'èsser consideradas coma de lengas de cultura prestigiosas. Degun s'es-calustra pas qu'en castelhan se pòsca escriure *la psicología o la sicología*, en portugués *a lingüística o a linguística*, en francés *l'événement o l'évènement*, en anglés *to realise o to realize*, en alemand *eine Lithographie o eine Litografie*?

Cal aver de sen. Cal pas anat trop luènh dins lo sens d'un laxisme descabes-trat. L'essencial es que l'Acadèmia determine çò comun a totes los occitans (e los araneses son occitans) e los punts lexicals, grafics, grammaticals en general, ont la nòrma es divèrsa coma la lenga.

Autors

Patrici Pojada (1965)

Abilitacion per dirigir recèrcas. Doctorat d'istòria (1996). Diplòma d'estudis apri-gondits d'estudis occitans (1990), President del Grop de Lingüística Occitana. Autor de divèrsas publicacions, entre las qualas:

- Los vèrbs conjugats. *Memento verbal de l'occitan*, Lobièras, Institut d'Estudis Occitans, 1993; segonda edicion: Pàmias, IEO, 1996; tresena edicion: Pàmias, IEO, 2005.
- Diccionari occitan-catalan/català-occità, en collaboracion amb Claudi Balaguer, Barcelona, Llibres de l'Index, 2005.

Bernat Arrous (1966)

Professor d'occitan d'ensenhament segondari (H. Pyrénées, M. Pyrénées), especialista dels parlars gascons pirinencs, membre de la Seccion de Lingüística de l'Institut d'Estudis Aranesi. Autor d'articles:

- *Eth Gascon deus d'Eths Auts. L'identitat occitana e catalana dins los Pirenèus al lum de la lingüistica e de l'istòria De Garròcs e de Nhèu*; Pàmias, 2004.
- *Eras votzes dera montanha. La nouvelle littérature d'expression gasconne en Comminges (Haut-Comminges, Aran, Couserans)* La Revue de Comminges et des Pyrénées centrales, numeròs 2006-1, 2006-2, 2006-3, 2006-4.

Jordi Suils (1968)

Doctor en Filologia Catalana, professor de sociolingüistica occitana e dialectologia romanica. Autor d'articles:

- *Aportacions a la teoria de la interdependència lingüística a partir de l'anàlisi de tres models d'escolarització plurilingüe a la Vall d'Aran* (Treballs de Sociolingüística Catalana, núm. 16)
- *Una enquesta de coneixement i ús de les llengües a la Vall d'Aran. Comparació entre la situació a l'any 2000 i la situació a l'any 1984. Llengua i ús*, núm. 22.

Jacme Taupiac (1939)

Licenciat d'ensenhamant de castelhan obtenguda a l'Universitat de Tolosa e Grenoble, membre del Grop de Lingüística Occitana. Autor de diversas publicacions, entre las qualas:

- *La pronunciation normalisée du gascon*, 1963. Editor: «Per noste», Ortès.
- *L'occitan escrich – Analisi del principi fologic e exàmen de sas restriccions oportunas e inoportunas dins una escriptura alfabetica coma la de l'occitan*. Institut d'estudis occitans.